

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

1 Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

²Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹Uzías oy ung'adyii Jotam. Jotam oy

ung'adyii Acaz. Acaz oy ung'adyii Ezequías. ¹⁰Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹Josías oy ung'adyii Jeconías miid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹²Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor.

¹⁴Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimzy yajmajch ma Babilonia y'it, e ñañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy miid José; e ma anajty ca'ni ñaybudigíyigixy, chi María oy y'ungdzimígy miid yi Dios yjihui'ñ ymic'ajt. ¹⁹José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäygoty. Hue' janchtiy yhuinma'ñybaty co ixmadza'ñ ayüch ameech ca' pín yajnejhuñhua'ñ. ²⁰Huin'it ma jadu'n anajty nihuinmayy, chi Huindzin Dios tüg y'áangel ñayquëxici cumäygoty ma José, chi ñimaayi:

— José, David y'ap y'oc, ca' mijcajee mdzachhuinmay nej m'octöxyijc'adiiyb María, com yi' y'ung huidibi yajma'xung'adamy hue' miid Dios yjihui'ñ ymic'ajt ycixpi. ²¹Yi' ypadamy tüg y'ung e mxiimöhuipy Jesús. Jadu'n yi' xii'adiiyb com jégíx co yi' yajpocyñihuädzam ñaax ycajp.

²²Tüg'óciy jada ytundaayi yjajtaayi yciyxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapiiyip ma anajty jadu'n yjaybetyity:

²³Je töxyjäy huidibi ca' yëydijc miiddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbidzimy Dios miid iich ajt.

²⁴Co José ymäyhuijy, chi cuyduñ jadu'n nej anajty Dios y'áangel ti nimäy, chi huoy María jadu'n nej jihuiy töxyijc'adyii. ²⁵Per ni ca'

ajcxy jadu'n chinaay jadu'n nej jäy ypicy chinäy ixti cooni oy María y'ung yajma'xung'aty. Chi yxiimoy Jesús.

Madza' ni'ixpigiyyb oy co'ixiiygixy pi'c'ung

2 Jesús yma'xung'ajty ma tüg cajp huidi yxii Belén, jim ma Judea ñaaxjot, huin'it co anajty Herodes yrey'aty ma yi jimbi naaxjot. Chi huin'it yja'ty ma Jerusalén cajp nijëjity yëydijctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigiyygixy. ²Chi ajcxy yajtiy:

— ¿Ma je judíojäy yrey tiibi yma'xung'aty? Ti iich ajcxy n'ijxi yi' ymadza' jim ma xii ypidzimy, e yi' iich ajcxy ya miñ nhuindzigíhuaangixy.

³Co je rey Herodes jadu'n midooy, chi ooy ytiigiyy tajpi maybi miid tüg'óciy cajpjäy jim Jerusalén.

⁴Huin'it je rey huomujctay tüg'óciy teedytijc huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵Chi ajcxy y'adzooy:

— Jim Belén ma Judea ñaaxjot, com Dios y'ayucnajtzcapiiybi jadu'n je' cojaay:

⁶E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷Huin'it Herodes oy yajhuoyii ameech huidibi anajty ti íjxcixy yi madza'. Chi tiybijcy yajxon mina anajty oga'n ti ijxcixy je madza'. ⁸E

huin'it ajcxy quejxy jim Belén. Chi jadu'n nímay:

— Níxcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydēbi iich nícxy nañ jadu'n nhuindzigiyich.

⁹Co jadu'n rey najtzcapiyday, chi ajcxy choñ. E je madza' tiibi anajty iñxcixy ma xii ypidzimy, chi ajcxy iñxy jayijp je' anajty ñícxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰Co je rey ixpiyitjic jadu'n iñxy yi madza', chi ajcxy oy janch jotcuje ñayjihuiyíi. ¹¹Co ajcxy ytijctigíi, chi ajcxy iñxy je pi'c'anäg miid ytaj je María. Chi jada' ajcxy ñaygojxtinaydaaci huindzigíi ojadaity ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tüg tzoy huidi yxii mirra. Chi ajcxy moy je pi'c'anäg. ¹²Chi cumäyjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynícx.

**Co José etz María
yqueegyñicxcixy Egipto**

¹³Co je rey ixpiyitjic ajcxy yhuimbijttaayñi, chi cumäjoty José iñxy tüg Dios y'ángel, chi ñimaayi: — Pidig, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooni iich miich nimähuipy. Com yi Herodes y'ixtāhuamy yi' yi pi'c'anäg e yaj'ōga'n yi'.

¹⁴Chi huin'it José ypidigy miid tzooñ coodz je pi'c'anäg miid ytaj,

chi ajcxy ñícxy jim Egipto. ¹⁵Jim ajcxy y'ijty ixti cooni oy y'ōgy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcapihybi: “Jim Egipto iich n'ung ti nhuoy.”

**Herodes pidacy y'ane'min co
huen pi'c'anäg yaj'ōctäyíi ajcxy**

¹⁶Co Herodes oy huinma'n yajyöy co ti anajty ooy yhuin'iiñyíi je rey ixpiyitjic ajcxy co ca' anajty ti ñihuimbidyíi, chi ooy yjot'ambijcy, chi ni'ane'mdiy co huen nícxy jim Belén etz majaty cajn mihuingon Belén, yaj'ōctaaygixy tüg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷E jadu'n jada yajcuyduñ jadu'n nej anajty Dios y'ayucnajtzcapihybi, je Jeremías, anajty ti cojaay:

¹⁸Jim Ramá yajmidoy co anajty chachjiy chachyäxy jäy ajcxy; yi Raquel tzachjiyby tzachyaaxp miid y'ung ajcxy ycixpi, ca' ajcxy anajty yjotcuje'aty miid co anajty y'ung ti y'ōctäy.

¹⁹Co oy y'ōcni Herodes huin'it jim Egipto, Dios tüg y'ángel ñayguëxici cumäyjoty ma José. Chi ñimayi:

²⁰— Pidig, miidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'ōctaayñi yi huidibi anajty yaj'ōgam yi pi'c'anäg.

²¹Huin'it José ypidigy, miid nícxy yi pi'c'anäg etz yi' ytaj jim ma Israel ñaaxjot. ²²Per co José nejhuiy co je Arquelao yi' anajty jim ane'mb jadu'n nej anajty je yteedy Herodes, ooy chigíi nej ñicxip jim. E co jadu'n anajty ti ycumäy co ca' jim ñicxip, chi ajcxy

ñicxy jim Galilea ñaaxjot. ²³Co jim yjáty, chi jim chinaydacpijcy ma je cajp huidi yxii Nazaret. Jadayaabi je' jadu'n tun jajti jadu'n nej anajty ycojaayity ma Dios y'ayucnajtzcaxiiybi ñecy co Jesús xii'adiiyb Nazareno.

**Juan el Bautista y'ayuc
capxhuäcxy ma tîdz naax it**

3 Huin'it tiempo ña jadu'n Juan je Bautista (huidibi jäy yajniibejtpi) ymiñ tüg tigädum ma Judea ñaaxjot capxhuäcx Dios y'ayuc, ²yminañ:

—Jothuimbíjtcix ma Dios com yi Dios y'ane'min huingoniñ yi'.

³Jada Juan yi' je' huidibi je profeta Isaías nigapxy yminañ:

Jim mîjtigädum yajmidoy tüg ayuc minañ: “Ni'ixiiygixy yi mHuindzin ytü'aa, ni'ixiiygixy tüg tü'aa tiybi.”

⁴Je Juan hue' anajty yhuitt'ajtpy iyujc nîbijc (huidibi jäy ytiipy camello) e hue' anajty yhuinîp iyujc ac, e yi' anajty yjicxy'ajtpy mu' etz tijaty iyujc päg jim tüg tigädum. ⁵Chi choon jim Jerusalén jäy etz tüg'óciy huidijaty tzinaayb ma Judea ñaaxjot, ña jadu'n huidijaty tzinaayb ma Jordán mijniiba', ñicx ajcxy ma Juan amido'íjtiy yi' y'ayuc. ⁶Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajniibedyii ma Jordán mij nii.

⁷Per yi Juan y'ix co may fariseo jäy etz saduceo jäy miñ anajty ajcxy niibejtcixy, chi ajcxy nimay:

—iMiich ajcxy, m'ajuugy m'amigüg ahua'n iyujc! ¿Pin ti

xyajni'ixiiygixy nej jëbi huaad mgögueeccixy yi ayo'n huidibi huingomb? ⁸Yajxon jäy'ajtcix tiydudägy huen niguëxgy co ti mjothuimbijtcixy. ⁹Ca' jadu'n mdzachminaangixy co Abraham xy'ap'adyii xy'oc'adyii. Hich miich ajcxy yam ndimnimaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰Yi jach ni'ixi yi' y'ijtni ma quipy y'ijx, tüg'óciy quipy huidi ca' oy ytim'aty yajpujxp yi', e chi jada' yajnögy jijnjoty. ¹¹Hich, janch yajniibejtpich miid nii, yi' yi' jadu'n nej tüg ixpejt co ti mjothuimbijtcixy; per jacminamb tzojc huidi ajcxy xyajniibedipy miid Dios yjihui'ñ etz miid jijn. Je' ymiid mic'ajtin etz cötujcin, nîgi ca'ydi iich, ni xycapaadyich nicxy ycig nyajtecyjendügyich. ¹²Ymiid mic'ajtin pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögihua'ñ yi moc actz moc jaam jijnjoty ma je jijn huidibi nicaminaaxii ycapîch.

Co Jesús ñiibejty

¹³Huin'it Jesús choon ma Galilea ñaaxjot, chi ñicxy ma Jordán mij nii ma anajty Juan yjäyyajniibety, niibedam anajty yi' ña jadu'n.

¹⁴Juan ca'jadim'a'ixiy, chi nimay Jesús:

— Hich miich ixypy xyajniibejtpich, ¿e miich mimb ma iichi?

¹⁵Chi Jesús y'adzooy:

— Jadachambi oc'a'ixi jadu'n, com ooy yi' ycopityity co nguydundayim tüg'óciy tiibi Dios xyaj'ane'mim.

Huin'it Juan a'ixiyy chi yajniibejty Jesús. ¹⁶Co Jesús ñiibejtay, chi Jesús ijxy Dios yjihui'n ñigidägyii jadu'n nej tüg pi'cmuuxy. ¹⁷E huin'it yajmidoy tzajpcíxy tüg ayuc ymina'n:

—Jada je' iich n'ung'ajtypich huidibi ooy ndzocyich huidibi ooy miid jotcujc nayjihui'yijich.

Je mujcu' tuñ ijxta'ni Jesús

4 Chi Dios yjihui'n yajnicxy Jesús mǝjtig'äduum jaydëbi je ca'oybi yjot'ixiyyb yhuinma'n'ixiyyb. ²Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³Chi je ca'oybi nimijhuägy Jesús ocjot'ixa'n oc-huinma'n'ixa'n, chi nimay:

⁴—Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähuiipy, nañ jadu'n nitzinähuiipy tüg'óciy yi ayuc huidibi Dios ycapxp.”

⁵Chi je ca'oybi miidnicxy Jesús jim Jerusalén, chi ymiidpejty tzajptijc cöduum. ⁶Chi nimay:

—Pen janch co miich Dios xy'ung'adyii, cödijpnax jiiby naaxcíxy, ca' yi' nej mjadipy com jaybety jadu'n ymiñ co jadu'n ymina'n:

Dios yquexyp yi' y'ángeles jigix xycuend'adipy xyhuidzipy miid yci', ca'ydi ninej mgönepy ma tzaagop.

⁷Chi Jesús y'adzooy:

—Nañ jadu'n ymiñ jaybety: “Ca' mjot'ixipy mhuinma'n'ixipy yi mhuindzin Dios.”

⁸Jadüg'oc je ca'oybi ymiid'ajty Jesús ma tüg copñicx janch cijxpi, e jim yajni'ixiyyday tüg'óciy naax cajp co ooy miidity oy'ajtin etz mic'ajt.

⁹E chi nimay:

—Iich jada miich nmoydähuipy tüg'óciy, pen miich cojxtina' xyhuindzigiyich xy'ojadatyich.

¹⁰Huin'it Jesús y'adzooy:

—Huinhuäctutcich miich mujcu', com jadu'n yjaybetyty: “Tüg'pajc yi mHuindzin Dios yi' mhuindzigihuipy m'ojadadipy.”

¹¹Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹²Co Jesús nejhuiy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³E ni ca' yhui'miyy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴Jada je' jadu'n tuni jaiti jadu'n nej Dios y'ayucnajtzcaxiyybi Isaías anajty ti cojaay:

¹⁵Zabulón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij nii. Jim Galileajäy chinäy huidibi ca' yjudiojäyity.

¹⁶Yi jäy ajcxy huidibi jim tzinaayb agootztuuby ijxpaty ajcxy tüg tiicxin jajin. Je huidijaty anajty ajcxy tzinaayb ma je jibicpi y'anicíy, chi ajcxy ycodicxiy tügi tiicxin jajin.

¹⁷Ixti huin'it Jesús ytiigiyy ayuccapxhuäcxp ymina'n:

—Jothuimbijtcix, yajmingix yajmejtcix mjot mhuinma'n ma Dios, com yi Dios y'ane'min huingonip yi'.

**Jesús nimay nimidaax je
acxmajtzpi: “Pajamgich”**

¹⁸Jesús tüyöyb anajty ma Galilea mejypa', co ijspxty metz yëydjic ac tüg quëxpi, hue' anajty yi' je' je Simón, huidibi nañ jadu'n yxii Pedro, e je jadügpi hue' je' anajty Andrés. Acxmadzii anajty ajcxy yi' ytung'ajty e jim anajty ajcxy yi' tzachniigöhuich y'acxmadzi'ñ.

¹⁹Chi Jesús nimay ajcxy:

—Pajamgich, iich miich ajcxy nyajni'ixihuipy nej jäy myaj'ixpigipy je Dios ytiy'ajt.

²⁰Huin'it je' ajcxy ixmajtztay tüg'óciy yi' y'acxtzaay, chi ajcxy panicxy Jesús.

²¹Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco miid yteedy, yi' anajty ajcxy yi' jim chach'adagiib y'i huidibi mi'acxmajtzcixy. Chi ajcxy Jesús yhuoohui. ²²E huin'it ajcxy ixmajtztay je barco etz yi' yteedy, chi ajcxy panicxy Jesús.

Jesús yaj'ixpicy mayjäy

²³Huidijttay Jesús ma tüg'óciy Galilea ñaaxjot, yaj'ixpicy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocoy huen ytimyhuidipá'mity anajty ajcxy ymiid. ²⁴Chi Jesús oy yajnejhuiiñi ma tüg'óciy yi' Siria ñaaxjot, e chi ajcxy miidmiñ ma Jesús tüg'óciy huidijaty anajty ajcxy ca'oybi miid, etz huidijaty anajty ajcxy cixuxy tecyxuxy, chi Jesús yajtzocoy.

²⁵Huin'it Jesús ypanicxi mayjäy huidijaty anajty ajcxy tzinaayb ma

Galilea ñaaxjot etz yi' Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

**Je tiy'ajt huidibi Jesús
ycapx ma tüg cögop**

5 Co Jesús ijxy tüg'óciy je mayjäy, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigi. ²Chi Jesús ytiigi yaj'ixpijcp yminañ jadu'n:

Je pinjaty ajcxy jotcújcip

³—Janch jotcuyc je jäy ajcxy huidibi nejhuiyb co yajmayajtpy Dios y'oy'ajt, yi' ajcxy paatip Dios y'ane'min.

⁴Janch jotcuyc je jäy ajcxy huidi yajpatp taj may, yi' ajcxy yajmöhuam jotcuyc'ajtin.

⁵Janch jotcuyc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuanii.

⁶Janch jotcuyc je jäy ajcxy huidibi cuydunamb huidibi Dios chojcpy, Dios yi' ajcxy pubediib.

⁷Janch jotcuyc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuiib.

⁸Janch jotcuyc je jäy ajcxy huidibi huädz yjot yhuinma'ñ, yi' ajcxy y'ixipy yi' Dios.

⁹Janch jotcuyc je jäy ajcxy huidibi ca' ti tzip tzojccixy, com yi' ajcxy Dios ung'adiib.

¹⁰Janch jotcuyc je jäy ajcxy huidibi yajnixiicp yajni gapxp miid je Dios ytiy'ajt yci xpi. Yi' ajcxy idamb ma Dios y'ane'min.

¹¹Janch jotcuje miich ajcxy co jäy jibic xytungixy co nigoob xyñihuambejticy etz capxcixy huidijaty ca' ytiy'ajtity miid iich ycixpi. ¹²Xondaaccix jotcuja'ajtcix co mbadaangixy tüg oy'ajtin jiiby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxxiybi jecy'ajty.

Miich ajcxy je tudägyjäy ya naaxhuiñ

¹³Jadu'n nej caan ca' yajpüch je tzüch jüicxy tim jadu'n miich ajcxy myajpaady ya naaxhuiñ. Pen je caan ca' miid ti xücx'ajtin, ¿nej jëbi nyajtuunim? Ca' y'oc'oyyajtunity, chi yajnajtzxidiinyi, chi yhuaani tembejt hua'cpejt.

¹⁴Oc'ix tüg je cajt jim copcix, ca' jëbi mhuijtyzüdzim mgoyüdzim. ¹⁵Co tüg jiin nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jëbi xycodicxtaayim jadu'n nej ajt nyajpaatim ma tijc. ¹⁶Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumy. Huin'it ajcxy ojadadipy je mDios teedy huidibi jiiby tzajpjoty.

Jesús yaj'ixpicy nej yi' yi Dios ycötujcin

¹⁷Ca' mhuinmay co iich ti nmiñich ya co nbigaanich je Dios y'ayuc je' huidibi anajty ti jaay Moisés etz je profetitijc. Ca' iich nyajmijaagixa'ñ je cötujcin, iich ti nmiñich co nguyduna'ñich jadu'n nej ymiñ jaaybety. ¹⁸Janch tiy'ajt jadu'n nej nimaaygixy, je huidibi mimb jaaybety jadu'n tundähuam

jajtähuam. Ni tüg letra oy mabaad ymúdzity nicxy ycayajcuyduñ.

¹⁹Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ñich miich ajcxy nimaayb, pen ca' miich ajcxy jac'oy mdúngixy ca'ydí fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹Miich ajcxy mnejhuiygixy jadu'n nej yi m'ap mdeedy ajcxy ayuc yajhui'my: "Ca' jäy myaj'ögip; e pin anajty jäy yaj'öcp ypaadip je tzaachypi." ²²ñich miich ajcxy jadu'n nimaayb pinjaty ymígügtijc mijotma'tp, je' Dios tiydunaanipy; e pin ymígüg xidijp tzuudijp, yajtiydunipy je' ma Dios tiydundac; e pin ymígüg tzuudijp locidijp ayo'ndumb, je' y'ity co ñicxip ayoodactuuby.

²³Pen myajnicxpy miich mhuindzigi'ñ ma Dios ytiyc, e pen jim jäymetzgodyyi co mmígüg ti xyhuin'iinnaxy ti xyhuincapxynaxy yinjaty hueenjaty, ²⁴jim myajhui'm je huindzigi'ñ ma je altar yhuinduu, e nicx jayijp nayyaj'oyihuii miid je mígüg, huin'it mhuimbedip e chimgyecy je mhuindzigi'ñ.

²⁵Tzojc naygapxjotcidägi miid je midzip, pen yam miid tüyöy nii'am tü'am, ca' jecyity co je midzip xyciyegip ma juez, e je

juez xyciyegip ma je policia, e
je' nicxy xypidägy pujxtigoty.
²⁶Janch tiy'ajt iich miich nimäy
co ca' jiiby mbidzimipy ixti cooni
mgüejtahuipy je meen.

**Jesús yaj'ixpicy co ca'p
ndundigóoyimipy miid huingbi töxyjäy**

²⁷Miich ajcxy mnejhuiyb
co jecyip tiy'ajt ymina'n: "Ca'
mmidundigoyipy huingbi töxyjäy."
²⁸Hich miich ajcxy nimaayb, pen
ji pin huindixy tüg töxyjäy, e
jot'adiyb nejaty, ti je' anajty
ñitundigooyñi ma yjot yhuinma'n.

²⁹Pen yi mhuin a'oy'amybi
xyajtundigoyamb tim yajpidzimb;
jac'oy co tüg'idu'mbi mhuin
ytigoyipy ca'ydí co cixyca'px
mnixipy jijnjoty. ³⁰E pen yi mgi'
a'oy'amybi xyajtundigoyamb tim
ixpux etz najtzjibibi' jiguem; jac'oy
co tüg mgi' ytigoyipy ca'ydí co
mminixipy metz mgi' jijnjoty.

**Jesús yaj'ixpicy co jäy ca'p huaad
ytöxyijc ixmach mañ'ajtingíxy**

³¹Nañ jadu'n ymiñ jaaybety: "Pin
ixmajtzp ytöxyijc, huen möhuipy tüg
necy ti ycixpi co ñay'ixmáztzigixy."
³²Hich miich ajcxy nimaayb, pen ji
pin ixmach ytöxyijc, e ca' anajty ti
ytundigooy miid huingbi yëydijc, je
yëydijc anajty nigiydeyiyb ytöxyijc
co anajty ytundigooy miid huingbi
yëydijc; pin yëydijc pijcp miid je
töxyjäy huidibi anajty ti yaj'ixmach,
pocytumy je' anajty.

**Jesús yaj'ixpicy nej nguyduunim
tiibi n'ahuaniiyim ma Dios yhuinduu**

³³Miich ajcxy mnejhuiyb nej
jecy'ajty m'aptijc mdeedytjic

ajcxy yajnimay: "Ca' nigo ti
m'ahuaniihuipy, mguydunipy jadu'n
nej anajty ti mmina'n." ³⁴⁻³⁶Per
iich miich ajcxy nimaayb: ni
mga'iibaadip ni mgacapxpaadip; ni
mgamina'nip; "y'ijxpy tzajpjoty,"
com yi' Dios chinaydac. E ni
mgamina'nip, "y'ijxpy naaxhuiñyi,"
com Dios yajpatp oy ytimyaaajty.
E ni mgamina'nip; "y'ijxpy
Jerusalén," com jim je' Dios
chajptijc; ni mga'iibaadip ni
mgacapxpaadip mgohuajc, com
ca' m'ajty myaj'ahuimbity poob o
tzixy tüg cöhuay. ³⁷Hue' janchtiy,
tiydudägy minaangixy: "oy" o "ca'."
E pen miich ajcxy anaxy jaccapxp
jadu'n mujcu' y'ayuc je' anajty ajcxy
mgapxpy.

**Jesús yaj'ixpicy co ca'p huaad
jibic nyajhuimbijtim**

³⁸Miich ajcxy mnejhuiyb co
jecy'ajty yajmina'n: "Pen ji jäy
mhuin xyajpidzimi, nañ tim jadu'n
yhuin myajpidzimipy; pen ji migüg
mdiitz xyajpidzimi, nañ jadu'n
myaj'ahuimbidity." ³⁹Per iich miich
ajcxy nimaayb: Ca' myaj'ahuimbidity
jibicpi ma migügtijc; pen ji pin xycoxy
ma mhuiniyijp tüg adu'mbi, jac tim
mo' jadüg adu'm'amybi. ⁴⁰Pen ji pin
xyxix e xypigaani yi mnijen, najtz'ixi',
huen xyajnicxi nañ jadu'n mjocx huit.
⁴¹Pen ji pin adzip tziy xyajminicxa'n
tüg kilómetro jiguemity, yajnicx jac
tim jadüg kilómetro. ⁴²Pen tijaty
xypijctzoohui, mo'. E pen ji pin
xyminuucxa'n, yajnuucx.

Co ndzojcim nmidzip

⁴³Jadu'n ymiñ jaaybety nej
jecyip Moisés yjay: "Migüg'adii yi'

huidibi xymigüg'ajtp, e midzip'adii yi' huidibi xymidzip'ajtp." ⁴⁴Hich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojiiyb, e nañ mi'oyjäy'at yi' huidibi xycalixamb. ⁴⁵Huin'it miich ajcxy xy'ung'adiiby yi' Dios tzajpjotypi huidibi yxii yajtiicxp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶Pen miich ajcxy mdzojcpy je huidibi xychojcp, ðti jäygidaacin yi' m'ocpadamyb? Nañ jadu'n yi' ajcxy yja'idiitzp yi' pocyjäydijc etz yi' yajcogüejpgidijc. ⁴⁷Pen miich ajcxy mgapxpocxyp yi' mjugymigüg, ðti oybi yi'? Nañ jadu'n ajcxy yi' yja'idiitzp yi' huidibi ajcxy ca' Dios nejhuiigixy. ⁴⁸Jäy'ajtcix tudägy jadu'n nej ajcxy yi' mdeedy tzajpjotypi ytudägy.

**Jesús yaj'ixpicy co
nduunim oy yjäy'ajtin**

6 Ca' mdungixy je oybi ma jäy y'ixy yhuindicxy miid co mdzachyajhuindicxaangixy co mdungixy oybi. Pen jadu'n m'idiitzcixy mDios Teedy huidi jiiby tzajpjoty tzinaayb, ca' ajcxy xymöhua'n je oy'ajtin. ²Paady co mbubedipy mmigüg, je ayoobi jäy huidi yajmayajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idiitzp je jäy huidi mij cix nayjihuiyip huidi anidaacp co huen jäy y'ixyii mijpidägyii co anajty jadu'n y'idich. Janch iich miich ajcxy jadu'n nimaaygix

co yi' ti patcixy je oy'ajtin. ³Co miich mmöhuipy mmigüg tijaty yajmayajtpy, hue' janchtiy mdunipy ca' myajnejhuihuipy huidi miid mnaymigüg'adyii. ⁴E co miich amoñ m'idipy, mDios Teedy huidi iixp co amoñ tijaty mduñ, je' xymöhuamb tüg oy'ajtin mayjäyduum.

**Jesús yaj'ixpicy nej Dios
nmibijctzoohuim**

⁵Co miich ajcxy Dios mmibijctzoy, ca' jadu'n m'idiitzcixy jadu'n nej je jäy huidibi capxtacp ma Dios huin aguy ahuac aguy. Yi' ajcxy capxtacp ma Dios huäctina' jiiby tzajptigoty jaydëbi jäy y'ixiiyb etz ymijpidägyiyb. Hich jëyi jadu'n nimaayb, co jadu'n oy'ajtin'adiiby. ⁶E co miich Dios mmibijctzoy, nicx tigoty etz m'agihuipy je mdijc aguu. Huin'it Dios mibijctzou. E je Dios y'ixpy ymidooyb co jadu'n mmibijctzoy, e je' je m'oy'ajtin xymöhuipy mayjäyduum.

⁷Com Dios mmibijctzoy, ca' m'agapxiyo'cip je huidi anajty ti m'occapxpi, jadu'n nej ajcxy y'idiitzcixy huidi ca' nejhuiigixy Dios ytiy'ajt. Yi' ajcxy huinma'ñypidägy co miid ajcxy ymay'ayuc huin'it ajcxy ymidoohuiiyb. ⁸Ca' jadu'n m'idiitzcixy jadu'n nej je' ajcxy; mDios ñejhuiiyb ti miich ajcxy myajmayajtpy ma anajty ca'ni mbijctzooyñi. ⁹E jadu'n miich ajcxy Dios mibijctzohuiipy, jadu'n mina'nip:

Dios Teedy, miich huidibi
tzajpjoty tzinaayb; huindzigiy
miich mxii y'ity.

- ¹⁰ Huen miñ ya miich yi
m'ane'min. Huen mdzojcin
yajcuyduñ ma je jäy yjot
yhuinma'n jadun nej
yajcuyduñ jiiby tzajpjoty.
- ¹¹ Mooygich ajcxy ngaayin n'uucin
jabom jabom.
- ¹² Mécxibich ajcxy nbocy
ngaydey huidibi iich ajcxy
ndundigooyb, jadun nej iich
ajcxy meecxyich huidibi ajcxy
xymidundigooybich.
- ¹³ Ca' m'a'ixiy co iich ajcxy
nhuinma'n tigoyipich.
Yajnihuaatzcich ajcxy ma yi
jibicpi. Co miich yi' mje' je
cötujcin, je mic'ajtin etz je
oy'ajtin huinixii huinitiempo.
Amén.
- ¹⁴ Pen miich ajcxy mhuinmeecxyp
je huidibi xymidundigooygixp, je
mDios Teedy huidibi tzajpjoty je'
nañ jadun xyhuinmeecxip miich
ajcxy mbocy. ¹⁵ E pen miich ajcxy
ca' pin jäy mhuinmeecxy nej
xymidundigooygixy, nañ jadun
mDios ca' xyhuinmeecxip ajcxy ma
ti mdundigooygixy.

**Jesús yaj'ixpicy nej huaad
n'ijtim jaygaay**

¹⁶ Com ajcxy m'ida'nip
jaygaay jay'ügy (mina
Dios mmibijctzoogixy), ca'
mnaybidáaccigixy tajy may, jadun
nej ajcxy idiitzcixy yi' huidibi ajcxy
minamb co Dios mibijccixy e ca'
yjanchity. Yi' ajcxy yajtigajchpy
yhuinyijp jigix jäy ajcxy oc'ixiiyb
co jaygaay jay'ügy y'ijtcixy; jëyi
jadun oy'ajt'adiiyb. ¹⁷ Miich
ajcxy co m'idipy jaygaay jay'ügy
jotcujc naybidägi, caax mgohuajc

etz puj mhuin mjijp, ¹⁸ ca' ydi
myajniguëxigy mayjäyjoty co
m'ity jaygaay jay'ügy, hue' janchtiy
myajniguëxig ma je mDeedy
huidibi ca' yaj'ijxy; e je mDeedy
huidibi ijxp huidibi miich ajcxy ca'
mduñ ijxna' quëxna' yi' xymöhuipy
oy'ajtin mayjäydum.

Je jugy'ajtin tzajpjoty

¹⁹ Ca' nigi m'adzocy huidibi ya
naaxhuiñ, je' co ya huindigooyb
oy ytimtijty huidibi yi huech
yajhuindigooyb, huidibi tougaayip
etz ma je meetzpi ajcxy meetzcixy
pigëccixy tijaty. ²⁰ Je' miich
nijot'ajtcixy je' oy'ajt huidibi
miich ajcxy Dios xymöhuamb
jiiby tzajpjoty ma ca' huech
yajhuindigooy ni ti, e nañ ni
ycatougaayii ni ti, etz ma je
meetzpi ca' ajcxy meetzcixy
pigëccixy tijaty. ²¹ Ma miich ajcxy
miidity je oy'ajt nañ jiiby ajcxy
mjot mhuinma'n pidäg.

Yi mhuin jadun yi' nej tüg tiëcxin

²² Yi mhuin yi' yi' jadunip nej
tüg tiëcxin jajin ma mninïcx, e
paady pen ca' miich yi' mhuin
xyajtundigoy, tüg'óciy mjot
mhuinma'n huadz yi'. ²³ Pen miich
mhuin xyajtundigoyb nañ jadun
mjot mhuinma'n huidi miich miid
ca' y'oyity, jadun yi' nej coodzpi
ijac tim nigi ca' y'oyity ca' ydi je
coodzpi!

Dios etz je comeen'ajtin

²⁴ Ni tüg pin ca' huaad miid tuñ
metz huindzin com mijotma'ti tüg
je', e jadügpi chogipy; o ixtijipy
tüg e jadüg ymigüg'adiiyb. Nañ

jadu'n ca' huaad miich ajcxy metz m'ojadajtcixy, Dios etz je meen.

Dios ycuend'ajtpy yi' yjáy

²⁵Paady iich miich ajcxy nimaaygixy: Ca' mdzachhuinmaaygixy ti ajcxy mnitzinähuiipy, ti ajcxy mgayipy m'ügiipy o ti ajcxy mhuit'adiiyb mducxy'adiiyb. MDios yi' ti xymooygixy je mjugy'ajtin, e paady ycixpi yi' nejhuiiyb ti ajcxy myajmayajtpy. ²⁶Oc'ix miich ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjiicxyp. E miich ajcxy mjactzoobatp ca'ydi yi' joon. ²⁷¿Pin ji ma miich ajcxy, ooy mij jahuinmay, jëbi tüg nuux yjacyeegyí?

²⁸¿E na'amy co miich ajcxy mdzachnidajy mdzachnimay miid je mhuit mducxy ycixpi? Oc'ix miich ajcxy nej yoñ tüg je pijy huidi yajpatp tun nigap. Ni yi' ycatuñ ni piidy. ²⁹Per janch tiy'ajt jadu'n nej nimaaygixy, ni je comeen'yjáy huidi yxií rey Solomón, ni ycaquipxíy je' yxojxin miid je pijy. ³⁰E pen mDios xojxpy jadu'n je aay ujtz cham etz tzojcy ytiíztäy ñicxtäy, jac nigi miich ajcxy Dios xymöhuañ huidibi myajmayajtpy, miich ajcxy huidibi hueeni mmibijcin. ³¹Paady ca' nigoobi mdzachhuinmaaygixy ma ajcxy mbaadip ti mgayipy m'ügiipy o ti mhuit'adiiyb mducxy'adiiyb. ³²Yi' jáy ajcxy huidibi ca' mibicy yi' Dios oy tzach nijot'ajtcixy jadayaabi, per miich mDeedy huidibi tzajpjoty

je' ñejhuiiyb ti miich ajcxy myajmayajtpy. ³³E pen miich ajcxy mbidacpy Dios jayijp ma mjet mhuinmañ etz mguydun ajcxy yi' y'ane'min, huin'it miich ajcxy Dios xymöhuiipy tijaty myajmayajtpy. ³⁴Paady ca' mhuinmaaygixy cham miid je jabom cixpi, je' co je jabombi ymimiñ je tajin mayin. Tzoc mijotcuje'ajtim je tajin mayin huidi cham nminajx nyajnaxim.

Ca' mbocy ixxy yi' mmigüg

7 Ca' m'ix'ijxpy mba'ijxpy ti mmigügtijc ytundigooyb, jigix ca' Dios xytiydunipy chaachytunipy. ²Pen miich m'ix'ijxpy mba'ijxpy mmigügtijc ti ytundigooyb, nañ jadu'n miich Dios xytiydunipy xychaachytunipy, e yi' quipxiñ huidibi miich mhuamby quipxiñ, nañ yi' Dios yajtunamyb ma miich. ³¿Nej co miich m'ixy huidibi mmigüg ytumy e hueeni ytundigooyb, e ca' mnay'ixy huidibi miich jac mij mdundigooybi? ⁴¿Nej jëbi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmiidpi jac mij pocy? ⁵Miich ci'm mnayhuin'iiñy. Nicx jayijp mbocy mgaydey ocyajhuadz, huin'it jëbi mbubety je mmigüg.

⁶Ca' mmöy yi' jibicjäydijc huidibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi' jáy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷Mibijctzougix yi' Dios e yi' xymöhuiipy ajcxy; ixtaaygix, huin'it

mbáatcixipy; cogapxiygix e ahuádzip ajcxy mdijc aguu. ⁸Com pin tijaty pijtzoob ypaatp yi'; e pin tijaty ixtaayb ypaatp yi'; e pin cogapxiyb ma tijc aguu, yaj'ahuaatzip ytiyc aguu.

⁹¿Nej ji jada' miich ajcxy nidügti co m'ung pijtzoohuipy tzajcaagy nej mmöhuipy tüg tzaaji? ¹⁰¿O pen ypijctzooby tüg acx nej mmöhuipy tüg tza'ñi? ¹¹Miich ajcxy oy mjibicjäyity e majatpy ajcxy nej m'ung m'anäg mmöhuipy je oybi. iNigi Dios Teedy tzajpjotypi möhua'ñ je oybi pinjaty pijtzoob!

¹²Tzinaaygix tiydudägy miid je mmigügtijc, pen miich ajcxy mdzojcpj co je mmigügtijc chinähuipy tudägy miid miich ajcxy; com jadu'n y'ane'my Moisés yley etz yi Dios y'ayuc najtzcapxiyb ajcxy ñecy.

Je xützpi tü'aa

¹³Tigiyygix ma yi tigiyyidac xützpi: yi tigiyyidac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytigiiygixy. ¹⁴E janch je tigiyyidac etz yi tü'aa huidibi ja'tp ma je jugy'ajtin huinixiibi, xüdz je' etz tzip naxiyyñi; janch tim hueeni jäy huidibi ji nicxiyb.

Yi jäy yhuinma'ñ miid ñiguëxgy pen oyjäy o pen ca'

¹⁵Nayguend'ájtigix miid yi jäy anijjatypi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ miidity; nigoobi ajcxy jadu'n ñaybidägyii, ymiid ajcxy

jibic-huinma'ñ. ¹⁶Miich ajcxy jëbi m'ijxcapy nejaty ajcxy miidity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tiim tucy ma jaam'apy quipy. ¹⁷Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. ¹⁸E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰Nañ jadu'n miich ajcxy jëbi mnejhuüy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytigihuipy ma Dios

²¹Ca' nminaanim nidüg'óciy jäy ajcxy ytigihuipy jiiby tzajpjoty huidibi xyñimaaybich: “Huindzin, Huindzin”, jëda'ajty ajcxy tigihuamb huidibi ycapxymidooyb je Dios chojcín y'ane'min. ²²Mayjäy oy mina'na'ñ huin'it xii huin'it tiempo: “Huindzin, Huindzin”, ti iich ajcxy ngapxhuäcxy miich m'ayuc, e miid miich mxii ti iich ajcxy nyajpidzimy je ca'oybi; etz miid miich mxii ti nduñ iich ajcxy mij huinma'ñ. ²³Huin'it nimähuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴Nidüg'óciy pinjäy huidibi xymibijcpich etz midooyb jadu'n nej iich n'ane'myich yi' ajcxy quipxyjatp miid je jäy huidibi cohunma'ñ huidibi ytiyc ycojp ma yhuingixity. ²⁵Co ymicpojtüy etz

ycomy je mij nii, ca' ypadyii niigom je tijc, je' co anajty cixy je' ycojyity. ²⁶Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytiijcoj ma pu' jot. ²⁷Co ymiñ je mic poj tuu, chi ycomy je mij nii. Chi yciday je ytiijc; mij ayo'n oy yjajti.

²⁸Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹Com je' co Jesús anajty yaj'ixpicy nej tüg huidibi cõtujcin miid, ca' yjadu'nity nej je escribas ajcxy.

Jesús yajtzögy tüg jibic nĩbützpa'mmiidpi

8 Co Jesús oy chooni ma je cögop, chi ypagidaci mayjäy. ²Huin'it nĩmiini tüg jäy jibic pützpa'mmiidpi. Chi ycojxtinay'ahuiiy ma Jesús yhuinduu. Chi minañ:

—Huindzin, pen m'a'ixiyyb jēbi xyajtzögyich.

³Huin'it Jesús nĩdoon je jäy. Chi nimay:

—Ndzojcpyich, jēbi mdzögy.

Co Jesús jadu'n nimay je pa'mjäy huin'itiy je ypützpa'm oy ytiigooy.

⁴Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzigi'n huidi Moisés y'ane'my. Huin'it jēbi yi jäy ajcxy ixipy co ti m'agidägy.

Jesús yajtzögy tüg capitán romano ymang

⁵Co Jesús yja'ty jim Capernaum huin'it tüg capitán nĩmiini e ycohuaniiy. ⁶Chi nĩmaayi:

—Huindzin, jim iich tüg ndumbi ma iich ndiyc huidi tim cöcnaayñip, ca' y'ocyücxni.

⁷Chi Jesús minañ:

—Iich nicxy nyajtzögy.

⁸Chi je capitán y'adzooy:

—Huindzin, ca'p iich n'oyjäyity, ca' yhuaadity mdigihuipy ma iich ndiyc, jēyi miich nigoo capxy e ti anajty iich ndumbi chögy. ⁹Iich nañ jadu'n ane'my n'ityich, e nañ nmiidich soldadtijc cĩ'am. Co iich nimäy: “Nĩcx”, nĩcxp; e co iich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰Co Jesús jadu'n midooy, chi nigooobi yciixy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yēydijc.

¹¹Iich jadu'n nimaayb co mayjäy oy miinaangixy xiipidzimy'amy xiicidägy'amy, chi ixtäga'n quipxyi miid Abraham, Isaac etz Jacob jiiby ma Dios y'ane'min. ¹²Je judíojäy huidibi ixipy ajcxy jēbi yjatzinäy jiiby tzajpjoty, je' ajcxy nĩcxamb agootztuuby, jiiby ajcxy yjiihuipy yäxipy etz y tiitzmúcxipy ytiitzqueedipy.

¹³Huin'it Jesús nimay je capitán:

—Nĩcx ma mdiyc. Jadu'n nej miich xymibicyich, ti iich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymĩd töxyjäybi

¹⁴Chi Jesús nĩcxxy ma Pedro ytiijc. Chi ijxy je Pedro ymĩd co jim cijx'am ycöcnäy miid je toyba'm.

¹⁵Co Jesús cínixajy huin'it je toyba'm ñajxy. Chi pidígy. Chi mic'amy ni'ixiyy je caayin uucin.

Jesús yajtzögy mayba'mjäy

¹⁶Co oy chu'iiyñi ycoodzyiñi huin'it yajmimiñ ma Jesús may je huidi ca'oybi miid. E miid yi' y'ayuc yjeda'ajty ypidzimday je ca'oybi, e huin'it tüg'óciy je pa'mjäy chooctay. ¹⁷Jadayaabi je' ytuni yjajti jigix yajcuyduñ jadu'n nej je profeta Isaías minañ: “Yi' ci'm ajt nyuu nba'm ti xyajtzoctaayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸Co Jesús ijxy janch mayjäy anajty ti yjübigiyyi, chi nimay co huen nájxcixy jim'amy meyy nínaxy. ¹⁹Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ypeñ. Per iich, je jäy huidibi tzoon jiiby tzajpjoty, ca' nmídidyich ma nmähuibich ma nbócxibich.

²¹E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigiyich huin'it nbanicxip.

²²Huin'it Jesús y'adzooy:

—Pamiingich, ixmajtcix yi öcpi huen ymi'öcpi yajnaaxtigiyi.

Jesús jijpcogapxiy je micpoj etz je meyy co anajty ooy ypidígy

²³Huin'it Jesús oy ybarcotigiyyi. Chi ypadzooni je ydiscípulos ajcxy.

²⁴E jim anajty ytüyöy mejyhuingíxy, huin'it mic poj ñaymibidzimi.

Janch mic y'ocpidicni je meyy jigo jigo je barco cayajnidigoy, pero Jesús anajty chachmaab. ²⁵Huin'it oy ymigapxyii yajmäybidigyyi je' ydiscípulos ajcxy. Chi ñimaayi:

—iHuindzin, ocyajtzogich ajcxy! iCheeby iich ajt n'ocquiinim!

²⁶Huin'it Jesús y'adzooy:

—¿Na'amy co mdzachtzigígyixni? iMiich ajcxy hueeni miidity mibijcin!

Huin'it Jesús ypidígy. Chi migapxy je poj etz je meyy. Huin'it je meyy etz je poj yhua'cxijptay. ²⁷E je' ydiscípulos ajcxy nigoobi y'occíx y'occuejtni chachminaangixy:

—¿Pin yëdyjc jada jada', co je meyy je poj ti ycapxymidoyii?

Je Gadara jäy ajcxy huidibi anajty ca'oybi miid

²⁸Co Jesús yja'ty ma yi niiba' ma yi Gadara ñaax ycajp, chi metz yëdyjc, huidi anajty ca'oybi miid oy yjijpcoyöyiyi anajty ajcxy, ti choon ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa.

²⁹E co anajty Jesús jim ñaxy huin'it janch ahua'n ymigapxqueeci:

—¿Ti miich mdunamyb miid iich ajcxy, Jesús, miich Dios y'ung? ¿Nej ti mmiñ jayijp co xychaachytúngixich ma ca'ni xii tiempo paady?

³⁰Jíguem ma anajty ajcxy je' yajpaady jim anajty may'idzim y'ojccixy. ³¹Chi je ca'oybi yminañ: —Pen miich xyajpidzim iich ajcxy, xyaj'adigiyyigixy xyajjottigiyyigixy yi may'idzim.

³²Chi Jesús ñimay yi' ajcxy:
—Níxcix.

Huin'it ñíhuaatzi je yéydíjc je ca'oybi. Chi oy ytigíyigixy je ca'oybi ma je idzim. Huin'it je idzim oy ñíigöboyictäy. Jiiby ajcxy yjicxtäy.

³³E je jäy ajcxy huidibi anajty idzim ycuend'ajtp, huin'it ajcxy yqueegy miid je tzigi'ñ. Chi co ajcxy yja'ty cajpjoty, huin'it ajcxy ytigíy miydaacpi jadu'n nej anajty ti ytuñyii ti yjadyii. ³⁴E huin'it chonday je mayjäy ma je cajp. Chi ajcxy ninícxxy je Jesús. E co ajcxy ijxpaty, huin'it ajcxy cohuaníy co huen pidzimni ma je naax je cajp.

Jesús yajtzögy tüg jäy címätpi tecymätpi

9 Chi Jesús ybarcitigíy. Chi ñícxxy jím'amy mejnáxy. Chi oyjäty ma yci'mgajp. ²E jím yajmimiñ tüg yéydíjc huidibi anajty címät tecymät. Yajciy ymiñ ma'ndzaayjoty. E co Jesús ijxy co ymiid je mibíjcin, chi ñimay je pa'mjäy:

—Jotcugi' miich, ti je mbocy nhuinmeecxyich.

³Huin'it nijējity je escribas ajcxy, je ley yhuindzin, jot'ajti: “Jadayaabi yéydíjc capxtigooyb yi' ma Dios co jadu'n ymina'ñ.” ⁴Com Jesús ñejhuiy jadu'n nej anajty ajcxy je jäy tzachjot'ájtigixy, chi ajcxy ñimay:

—¿Nej co ajcxy jibic mdzachjot'ájtigixy jotjoty huinma'ñyoty? ⁵¿Huidibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidíg etz tüyöy”?

⁶Hich ndzojcpyich co miich ajcxy mhuinjíhuíhuip co iich ti ndzooñich tzajpjoty e paady nmiidich je cötujcin ya naaxhuiñ e jēbi nhuinméecxibich pocyjäy ajcxy.

Huin'it Jesús ñimay je címätpi tecymätpi:

—Pidíg, huijtzíg yi mdögy etz nícxni ma mdíjc.

⁷Chi je címätpi tecymätpi ypidígy. Chi ñícxxy ma ytíjc. ⁸E co je mayjäy jadu'n ijxy, huin'it ajcxy ooy jihuiy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús ñimay Mateo: “Pajamgich”

⁹Co Jesús oy chooni jím, huin'it ijxy tüg yéydíjc, yxií Mateo, huidibi anajty ññaayb ma yajcogüejttac. Chi ñimay:

—Pajamgich.

Huin'it Mateo ytinayígy. Chi panícxxy Jesús.

¹⁰Jadu'n ytuni yjajti co Jesús jím ycaý ma Mateo ytíjc, e may nañ jadu'n ymiñ yajcogüejtpidíjc etz pocyjäydíjc. Chi ajcxy jím tú'ciy y'ixtactay miid Jesús etz miid yi' ydiscípulos. ¹¹Co je fariseos jadu'n ijxy ajcxy, chi ñimay ajcxy je' ydiscípulos:

—¿Na'amy co yi mHuindzin ycaymucy miid je yajcogüejtpidíjc je pocyjäydíjc?

¹²Co Jesús jadu'n midooy huin'it ñimay ajcxy:

—Ca' yajmayjaty tzoydumbi huidi ca' ajcxy ypígyi, jēyi huidi ajcxy pijcip. ¹³Nícx ixpíjccixy nej ymiñ jaaybety ma Dios ñecy: “Hich ndzojcpyich co miich ajcxy miid'adipy je pa'ayo'n, ca'ydi co

myajhuindzigiy tijaty iyujc.” Ca' iich ti nmiinich ma je jay ajcxy huidibi ca' pocy miidity. Iich ti nmiinich miid yi pocyjyay ycixpi co huen jothuimbijttaaygixy ma Dios.

Amidoogixy Jesús miid je' ycixpi co jaygay y'ijtcixy

¹⁴Huin'it ajcxy ymiñ Juan ydiscipulos ma Jesús. Chi je ajcxy nimay Jesús:

—¿Na'amy co iich ajcxy etz fariseo ajcxy ayuu'ijtcixy, e yi' ajcxy huidibi xymiidhuidijtp ca' ajcxy ayuu'ijtcixy?

¹⁵Huin'it Jesús y'adzooy:

—¿Nej jëbi yaj'ayuu'aty jay ajcxy huidi yajpaatpi ma je pijcpi yajnixiiduñyi, pen quipxyi yam yajpaady miid je huidibi pijcp? Minamb je xii je tiempo mina je pijcpi yajtzoniib, huin'it janchtiy ajcxy jëbi y'ayuu'ajtcixy.

¹⁶Ni pin Tuc huit ca' agiyiyy miid tüg pedas jemyhuit, com nigi je Tuc huit ñajtzciidziy, chi nigi o'ctiy yajtni.

¹⁷Ca' pin pidägy vino nii ma tucpi cochac, yciidzip je', e tüg'óciy anajty ti y'ayoodäy je vino nii miid ñigochac. Pidägipy ajcxy jemy vino ma jemy cochac, chi jadu'n ca' ayoohuipy je cochac.

Je Jairo ñiix, etz je töxyjäy huidibi Jesús yhuut nïdoni

¹⁸Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuuy ma Jesús yhuinduu. Chi yminañ:

—Nniixich ti y'ögy. Nicx ma iich ndijc etz mginixajipy, jugypigipy ya.

¹⁹Huin'it Jesús ypidigy. Chi ñicxy miid je ydiscipulos ajcxy. ²⁰Ma

anajty ajcxy jim ytüyöy huin'it ymiñ jixci'py'amy tüg töxyjäy huidi yxii ybo' ti mi'ijtiinyi majmetz jimijt. Chi nïdoni Jesús yhuitpa'. Huin'it ñajxy je' ypa'm. ²¹⁻²²Jadu'n anajty ti yjot'adyii: “Oy Jesús jëda'ajty yhuitpa' nnidónibich, ti iich anajty n'agidäygich.” Huin'it Jesús yhuäc-huimbijty. Chi huindicxpejty je töxyjäy. Chi nimay: —Jotcuje'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³Chi Jesús oy yjäty ma je mijjäy ytijc. Chi ijxy je xuuxpidijc miid je ymigügtijc ajcxy huidi chachyaaxcixy co anajty ti y'ögy je töxy'anäg. ²⁴Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵Co anajty je jay ti ixquejxtäy, chi Jesús ytijctigiyy ma anajty je töxy'anäg huijtnäy. Chi majch ma yci'. Chi ypidigy. ²⁶Chi je jay oy yajnejhuuiydaayñi ma je jimbì naax cajp nej anajty ti ytuñyi ti yjadyii.

Jesús yajtzögy metz jäy huintzpi

²⁷Ma anajty jim ti choñ huin'it metz jäy huintzpi ypamiini.

Chachñimäyii jadu'n:

—iPa'ayoogich ajcxy, miich David y'ap y'oc!

²⁸Chi Jesús yajpajäty ma anajty ti yjättägy. Co ytigiiy tigoty, chi Jesús yajtiy:

—¿Nej mmibijcipy miich ajcxy co jëbi nyajhuindicxixcixy?

Huin'it je' ajcxy y'adzooy:

—Mibijcy iich ajcxy, Huindzin.

²⁹Huin'it Jesús nidoñ je jäy ajcxy huintzpi ma yhuin. Chi nimay ajcxy:

—Jadu'n nej miich ajcxy mmibicy, jadu'n ytuniib yjadiib.

³⁰Chi je' ajcxy y'ijxigy. Huin'it Jesús y'ane'min pidacy:

—Ca' huaad pin myajnejhuiygixy.

³¹Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxigixy.

Jesús yajtzögy tüg jäy uumbi

³²Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi miid. ³³E co Jesús yajpidzimy je ca'oybi, chi je mayjäy ooy yciixy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴Per je fariseos jadu'n yminaangixy co Jesús je' miid je ca'oybi ymic'ajt yajpidzimy ca'oybi ma jäy.

Jesús ymiid pa'ayo'n ma mayjäy

³⁵Jesús jadu'n yhuidijty cajp cajp yaj'ixpijcy majaty tzajptijc. Yajhuingapxiy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity.

³⁶Co Jesús jadu'n ijxy je mayjäy, chi oy pa'ayooni co yi' ajcxy ca' miidity ni pin huidibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huidi ca miidity cuend'ajtpi. Ca' nejhuiygixy pin y'ane'mip e pin ypanicxip. ³⁷Huin'it Jesús nimay yi' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸Paady

pijctzou miich ajcxy ma Dios co huen quexy tumbidijc ma yi' ytung.

Jesús huin'ixy je majmetz ydiscípulos

10 Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huidi ca'oybi miid. Etz nañ jadu'n yaj'agidägip huen ytim huidi yuu huen ytim huidi pa'mity.

²Jada je' je nimajmetzp yxii: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³Felipe, Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴Simón, je cananista; e Judas Iscariote, je huidi yciyejc Jesús agojix.

Jesús quejxy je' ydiscípulos ajcxy ayuccapxhuächxi

⁵Chi Jesús quejxy yi' nimajmetzpi, e jadu'n najtzcapxiy ajcxy:

—Ca' ajcxy mnicxipy ma je naax cajp ma ajcxy je jäy chinäy huidibi ca' ajcxy Israeljäyity. Ni mgatigihuipy ajcxy ma Samaria naax cajp. ⁶Nigi jac'oy co ajcxy mnicxipy ma je Israeljäy huidibi ca' nejhuiy huidibi ca' paduñ Dios ytiy'ajtin.

⁷Nicx miich ajcxy capxhuäch Dios y'ayuc co ti yhuingoni Dios y'ane'min. ⁸Yaj'agidaaccixy yuujäy pa'mjäy huidijaty pützpa'm ymiid. Myajjugypijccixy tiibi ögy. Myajnihuädzip huidi ca'oybi ymiid. Ninigoobi miich jada cötujcin ti myajmooygixy, nañ ninigoobi yejccixy.

⁹Ca' ni ti meen mminicxcixy.

¹⁰Ca' mbijty mminicxcixy tü'amgixpi. Mminicxcixy jëda'ajty yi mhuit huidi miid ma mninix. Ni mgaminicxip huingbi mgig etz mdajc; com ycopicity co je cajpjäy xyajcáaygixipy xyaj'úuccixipy miich ajcxy.

¹¹Co anajty mjäty miich ajcxy ma tüg cajp nidiu yajtiu pinjäy jim tudäcyip. Jim ajcxy mhuimipy ma je' ytije xti cooni ajcxy mdzoonip.

¹²Co anajty miich ajcxy mdigiy tigoty huin'it mgapxpóxcixipy je codijc jadu'n nej tzocy. ¹³E pen je codijc ymihuaad'ajtpy, yejccixy jim iibocxin capxpocxin. E pen je jäy ca' ytudägyity, ñaadig'adip huidi anajty ti mgapxcixy. ¹⁴E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tijc o ma je cajp. Chi ajcxy mdecy huinnebipy, je' je' je tiy'ajt co ca' miich ajcxy ti pocy miidity. ¹⁵Janch tiy'ajt jadu'n nej nimaangixy co anajty je xii tiempo paady ma anajty yajtiyduna'n je naaxhuiñyäj, jac nigü yajtzaachytuna'n y' ajcxy ca'ydi yi jäy ajcxy huidibi tzinaayb ma Sodoma cajp etz ma Gomorra cajp.

Ixhuidijtin pahuidijtin

¹⁶¡Ocmidoogix! Hich yam miich ajcxy nguejxyp majaty yi jäy huidi jibic-huinma'n miid. Jadu'n nipaady nej iich nguexyich cöbixy ma je lobi. Huijy cujc ajcxy mnaypidägiib jadu'n nej tza'n, per yung naxy jadu'n nej muuxy. ¹⁷Mnayguend'adiib ajcxy je' co yi jäy ajcxy xyciyegaangixy

ma ajcxy mijtungmiidpi etz myajhuobaangixy ma je judiojäy ajcxy ñaymujctac, ¹⁸ixti xyajnicxaangixy ajcxy ma je gobernador etz je reydiyc ajcxy miid iich ycixpi; e jim iich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huidibi ca' yjudiojäyity. ¹⁹Co anajty ajcxy xyajc'idigiy je mijtungmiidpi, ca' ajcxy oy mhuinmaayipy nej m'ocnimähuipy. Co anajty paady je tiempo, huin'it iich miich ajcxy myajnimähuipy nej ajcxy mgapxipy. ²⁰E je ayuc huidibi miich anajty ajcxy mgapxpy, ca' miich anajty je' ajcxy m'ayuc'ájtigixy, je Dios Teedy anajty yjihui'n, je Espíritu Santo, xyajcapxp miich ajcxy.

²¹Huin'it yi jäy ajcxy ñaygiyegáanigixy miñ xyipy tüg quëxtijc co huen yaj'ögyii. E je ungdeedy ciyega'n y'ung; je ung'anäg mibidiga'n je ytaj yteedy etz yaj'öcip ajcxy. ²²Tüg'óciy je jäy ajcxy ca' ajcxy xy'ix'anipy xychoga' nipy miid iich nxii ycixpi. E pin xymibijcpich amumdügjot xti mabaad y'ögy, y' ajcxy y'alma tzögipy. ²³E co anajty miich ajcxy jäy xy'ixhuidity xypahuidity ma tüg cajp, nicxcix ma huingbi cajp. Janch tiy'ajt jadu'n nej nimaangixy co ca'ni anajty mgapxhuäcxtäy ayuc tiy'ajt ma tüg'óciy je Israelcajp co nhuimbidityich, iich, je jäy huidibi tzoon tzajpjoty.

²⁴Tüg yaj'ixpijcp i jac nigü mij'ajtin miidity ca'ydi je huidi ixpijcp, e tüg huindzin jac nigü mij'ajtin miidity ca'ydi je' ytumbi. ²⁵Jëb jotcujc idipy je discípulo co jadu'n

yajpaadipy jadu'n nej yhuindzin, e je tumbi jotcujc idipy nej yhuindzin. Pen jäy minamb co iich nmiidich ca'oybi, jac nigi ymina'na'n co miich ajcxy miidity.

Pin jēbi yajtzigīy

²⁶Ca' ajcxy mdzigīy yi jäy ajcxy. Ca' ji ni ti yūch ity nicx ycanigūxīgīy; nañ ni ti ji ycajatuñ ayūch ameech nicx ycajajnejhuīy.

²⁷Huidi iich miich ajcxy ayūch nyajniimaayb, capxpīdzīmīgīx miich yi' mayjäyjtoty, e huidi ajcxy midooyb ameech, capxpīdzīmīgīx miich yi' mic ma tūg cōgop. ²⁸Ca' ajcxy mdzigīhuip je jäy huidib ninicx yaj'ōcp etz ca' huaad yi' ajcxy yaj'ōgy je alma. Yi' miich ajcxy mdzigīyīgīx je Dios huidib pidacp je alma etz je ninicx mijjiinjoty.

²⁹¿Nej ca' jäy ajcxy toogy metz pi'cjoon miid tūgpi pi'cmeēñi? Per ca' ni tūg huaad ycāy naaxhuīñ, pen ca' tzocy je mDios Teedy huidi jiiby tzajpjoty. ³⁰Miich ajcxy mgōhuay ac michoy yi'. ³¹Paady miich ajcxy ca' mdzigīhuipy, jac nigi miich ajcxy mdzoubaady ca'ydi je joon.

Pinjaty ca'p midzōydu'n

Jesucristo mayjäyjtoty

³²Yi jäy ajcxy huidi xymibijcpich etz xyñidiy'ajtyich ma jäy yhuinduu, nañ jadu'n iich yi' nidiy'ajtyich ma iich nDeedy huidibi jiiby tzajpjoty. ³³Per je jäy ajcxy huidi iich xycoyūtzpich ma mayjäy ajcxy yhuinduu, nañ jadu'n yi' ngoyūtzpich ma iich nDeedy yhuinduu huidibi jiiby tzajpjoty.

Miid Jesús ycixpi yjiijity naymidzip'adii

³⁴Ca' miich ajcxy mhuinmay co iich ya ti nmiñich miid co nmōhuaangixy jotcujc'ajtin ya naaxhuīñ. ³⁵Iich ti nmiñich co nyajtziptunipyich jäy miid yteedy; tōxyjäy miid ytaj etz xecy miid yxecy.

³⁶E jadu'n miich ajcxy mdzip'adiiyb mgī'mjuugy mgī'mmigūg.

³⁷Yi jäy ajcxy huidibi tzojcp ytaj yteedy jac nigi ca'ydi iich, ca' yi' ypaadyi co njäy'adiiybich; e pin ymang o ñiix tzojcp nigi ca'ydi iich, ca' ypadyi co njäy'adiiybich; ³⁸e pin ca' yci'mdzojcin y'ijxmajtztäy etz ca' ñaybidägyi ycixjot huinijot ma iich, ca' mihuaadity nicx njäy'adiiybich.

³⁹Pin yjugy'ajtin najtztzogiib, yajtigoyipy yi'; e pin yjugy'ajtin tigooyb miid iich ycixpi, ypaadipy jugy'ajtin huinixi tzajpjoty.

Premio nganar'ajtim

⁴⁰Pin miich ajcxy xycōbijcp, iich yi' anajty xycōbijcp; e pin iich anajty xycōbijcp, nañ ycōbijcpi anajty je huidibi iich ti xyquejxyich ya naaxhuīñ. ⁴¹Je huidibi cōbijcp je jäy huidibi Dios y'ayuc capxhuacxpī, je' co yi' ymiñ miid Dios ycixpi, yi' jadu'mbi je oy'ajtin ypaadipy. Nañ jadu'n je huidi cōbijcp je oybi jäy miid co oy yjäyity, yi' jadu'mbi oy'ajtin ypaadipy. ⁴²Je huidi yaj'ucp tūg vaso ñi ma huenyimpinjäy miid co xymibicyich, janch iich miich nimaaygixy, ypaadipy oy'ajtin.

Juan je Bautista yquexyōybi

11 E co Jesús anajty ti najtzcaxpiydäy je tiyy'ajt

ma je nimajmetzpi ydiscipulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

²E Juan je Bautista hue' je' anajty yajpaady pujxtigoty. E co nejhuiy tijaty mijhuinma'n anajty Jesús ytumyb, chi quejxy metz je' ydiscipulos ajcxy ma Jesús yajpaady.

³Chi Juan ydiscipulos ajcxy y'amidooy Jesús:

—¿Nej miich je' je Cristo huidibi anajty minamb o jëbi iich ajcxy huingbi n'ahuijxcixy?

⁴Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ijxpy mmidooyb co ndumybich. ⁵Miich ajcxy yajmiidmiydäg je Juan, jadu'n nej je huintzpi nyajhuindicxigiyich; je cïmät tecymät nyajtzoocypich; je huidibi jïbic nïbützpa'm ymiid nyajtzoocpyich; je' ajcxy huidibi cönat nyajmidohuäcypich; je öcpi ajcxy nyajjugypijcypich; etz je ayoobtjic, je huidibi yung naxy yjothuinma'n nyajmiidmiydacypich Dios y'ayuc. ⁶Jotcujc yi' ajcxy pinjaty xymibijcpich amumdügjot etz ca' ni nej yjotmetzci' miid iich.

⁷Co Juan je Bautista ydiscipulos ajcxy ñicxni, chi Jesús ytiigiïy nimiydaccoty Juan je Bautista ytung ma je mayjäy, chi yminañ:

—¿Ti miich ajcxy oy m'ixy jim mïjtigïduum? ¿Tüg nähuaax huidibi poj xijpi? ⁸¿Ti ajcxy oy m'ixy? ¿Ti oy m'ixy, tüg jäy huidibi ooy y'oyxöxyity? ⁹¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxxiybi? Janch co ti m'ijxcixy tüg jäy jac mij ca'lydi tüg

Dios y'ayucnajtzcaxxiybi. ¹⁰Je' jada je jäy huidibi Dios nigapxy ma ñecy co Dios jadu'n yminañ:

Cham nguexyich iich

nguexyöyp jayijp ma miich.

Je' yaj'oyïhuip je jäy yjot yhuinma'n miid iich ycixpi, tim jadu'n nipaady nej jïhuïy jäy tül'aa yaj'oyïy co rey ymiina'n.

¹¹Co yi jäy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty iich xymibijcp, yi' jac mij naxam ma Dios y'ane'my ca'lydi Juan.

¹²Maabi Juan je Bautista ytundigïy, ixti chamni janch mayjäy amumdügjot ñejhuïhua'n Dios y'ayuc, je' co ajcxy ytiigïhua'n ma Dios y'ane'my. ¹³Tüg'ócïy ajcxy je Dios y'ayucnajtzcaxxiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴Pen miich ajcxy mibijcpi Moisés ycötujcin etz Dios y'ayucnajtzcaxxiybi ajcxy, Juan je Bautista je' je' je Elías huidibi anajty miinamb. ¹⁵Pinjaty mido'n miid huen mido'mbigipïy iich n'ayuc.

¹⁶Jesús yjacminañ:

—¿Pin miid n'ocyajtügïhuibiyich yi jäy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyïyb ma mayjäy yjuygixy ytooccixy, miyaaxcixy midinaaygixy ymïgügtijc:

¹⁷“Ti njayajxüxyich flauta e ni ca' ti m'ejtzcixy; ti iich ajcxy öcpi njahuinyäxich, e miich ajcxy ca' ti myäxy.” ¹⁸Chi Juan, je Bautista, anajty miin, e je' ca' yca y'ügy. E

miich ajcxy minaangixy co Juan ca'oybi ymiidity. Jada pi'c'ana'tijc nipaady nej miich ajcxy. ¹⁹Chi iich je' je jäy huidibi tsoon tzajpjoty nmiinich, e caaybich uucpich, e miich ajcxy minaangixy: "Ijxcix, cha tüg yëydijc, janch cax janch vino'ucp huidibi migüg'ajtpy yajcuejtpidijc etz pocyjäydijc." Je Dios tiy'ajt ji je' ñiguëxgy.

Je cajn huidibi ca' ycapxymidoogixy

²⁰Chi Jesús ojcoty je maygajpjäy ma anajty may mijhuinma'n ti tuñ, com je mayjäy ca' anajty yjothuimbidaangixy ma Dios. Chi Jesús yminañ:

²¹—iAy miich ayoob ajcxy huidibi tzinaayb jim Corazín! iAy miich ayoob ajcxy huidibi tzinaayb jim Betsaida! Co ixypiy iich ti nduñich jecy'ajty je mijhuinma'n mijtzög'ajtin ma je Tiro etz Sidón cajn, jadu'n nej iich ti nduñich ma miich ajcxy, ti ixypiy je Tiro jäy etz Sidón jäy nijothuimbijtcixy etz ñaaygixy saco nijen nicuyjam ixcuyjam, je' je tiy'ajt co ooy ytajcixy ymaygixy miid ypocy ycxpi. ²²Paady miich ajcxy yam nimaaygixy. Co anajty Dios tiyduna'n je naaxhuiñybi jäy, huin'it miich ajcxy Dios xychaachytuna'n jac nigi, ca'ydi je jäy ajcxy huidibi jecy'ajty tzinay jim Tiro etz Sidón.

²³Miich ajcxy, Capernaum jäy, mnaybidáacigixy jadu'n nej jihuüy mdigihuaangixy jiiby tzajpjoty. Per ca' yjadu'nity. Mdigihuam miich ajcxy ayoodactuuby. Ayo'n tzaachypi mbadaangixy. Co ixypiy iich ti nduñich jecy'ajty je mijhuinma'n mij tzög'ajtin ma

Sodoma cajn, jadu'n nej ti nduñich ma miich ajcxy mgajp, chambaad ixypiy ity yi jadu'mbi cajn, ca' ixypiy Dios cayajtigooy. ²⁴Paady iich miich yam nimaaygixy. Co anajty Dios tiyduna'n je naaxhuiñyjäy, huin'it miich ajcxy myajtzaachytuna'n jac nigi, ca'ydi je jäy huidibi jecy'ajty tzinay ma Sodoma ñaaxjot.

Mingixy ma iich e mbóocxcixipy

²⁵Chi Jesús ytigiiy Dios mijbictzooyb, yminañ:

—Dios Teedy, iich miich n'iibaatpich ngapxpaatpich. Miich miid je mij cötujcin jiiby tzajpjoty etz ya naaxhuiñ. Com miich ti mnajtzcapxiy yi m'ixpijcin ma je ayoobtijc huidibi tzinaayb jotxeemy, e ti myüch yi m'ixpijcin ma yi ixpijcytijc cohuinma'ñydijc. ²⁶Jadu'n, Tat, ti mduñ, com jadu'n miich ti mdzocy ti mjäygidägy.

²⁷Jesús yjacminañ:

—Iich nDeedy ti xyajcädigiydäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tügpajc. Ni pin ca' ijxcapy pin je' nDeedy'ajtpyich, jëyi iich, je Dios y'ung tügpajc, etz jacjadyi huidibi iich, je Dios y'ung, nyajñiguëxigamyich. ²⁸Min ma iich nidüg'óciy miich ajcxy huidijaty taj mayb myajpatp ma mjot mhuinma'n, iich miich ajcxy nmöhuamby jotcujc'ajtin. ²⁹Cöbic miich ajcxy iich n'ane'min iich ngötujcin, jadu'n nej huaj yuub ajcxy cöbicy ycögi'. Ijxpicy ajcxy iich ndiy'ajt etz cuydun iich n'ayuc, com iich nmiidich mecxtujcin etz ca' iich amij agix nayjihuüyijich.

³⁰Ca' iich n'ane'min ymicity, e iich ndung ca' nimijaajity.

**Je discípulos ajcxy moc cojc
yajmujcp pocxxiiduum**

12 Chi tüg xii Jesús yhuidity miid ymigügtijc ma tüg camjot. E hue' anajty sábadó xii, je poocxin xii. Chi Jesús ydiscípulos ajcxy oy anajty yubögyii. Chi ajcxy ytiigiiy trigo tiim nixajtzutp etz yjiicxy ajcxy je ypajc. ²E co je fariseos ajcxy ijxy nej Jesús ydiscípulos ajcxy y'idíitzcixy, chi ajcxy nimay Jesús:

—Oc'ix nej miich mdiscípulos ajcxy y'idích. Hue' ajcxy tumyb huidibi ca' huaad ma sábadó xii yajtuñ.

³Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymigügtijc ajcxy idích jecy'ajty co yuböccoti? ⁴Pues yi' ajcxy tigiyy ma Dios ytijc. Chi cay ajcxy je tzajcaagy huidibi anajty jäy ajcxy ti yajhuindzigiiy Dios. Je' je tzajcaagy huidibi teedy ajcxy anajty paatip cayipy. ⁵¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytijc sábadó xii, e ca' nan tundigooyb je' ajcxy?

⁶Hich miich ajcxy nimaagyixyp, jac nigí mij cötújcin nmídidyich, ca'ydi je cötujcin huidibi je teedy ajcxy yajtuñ ma Dios ytijc. ⁷Pen miich ajcxy ti mhuinjihuüy nej yhuimbizimy jada Dios y'ayuc, co Dios jadu'n yminañ: “Hich ndzojcpy co miich ajcxy miid'idipy pa'ayo'n ca'ydi co ajcxy myegipy huindzig'iñ.” Pen miich ajcxy ti

mhuinjihuüy jada ayuc, ca' ixipy mbocy'ixy ma iich nmigügtijc huidibi ca' ma ti ytundigooy. ⁸Hich, je jäy huidibi tzoón tzajpjoty, nmiidich ane'min, jaydëbi nimäyich je jäy ajcxy ti jëbi tungixy sábadó xii.

Je yëydijc huidiibi anajty yc'itídzip

⁹Chi Jesús choñ jim, ñicxy ma je judíojäy ñaymujctac. ¹⁰E jiiby ma je naymujctac anajty tüg yëydijc huidibi yc'itítz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábadó xii?

¹¹Chi Jesús y'adzooy:

—Pen ya ma miich ajcxy ji tüg jäy huidibi cöbixy yjutcögäy sábadó xii, ¿nej ca' je' nicxy yajpidzimy mic'amy? ¹²Nigí tzobaatp tüg yëydijc ca'ydi tüg cöbixy, paady Moisés ycötujcin ca' capx'aducy co tüg oy'ajtin nduunim sábadó xii, je poocxin xii.

¹³Chi Jesús nimay je yëydijc:

—Xajtiu yi' mgi'.

¹⁴Co xajtiyy yci', chi choocy, e hui'my quipxyjaty miid je yci' oybi. Chi je fariseos ajcxy yjotmätcoty, yhuinma'ñ ixtaagyixy ajcxy nej huaad Jesús ocyaj'o'ccixy.

**Tüg ayucnajtzcaxxiyyin
miid Jesús ycixpi**

¹⁵E co Jesús nejhuiyy nej yi' ajcxy yhuinma'ñ miidity, chi jim choñ. E ooy mayjäy ypanicxi Jesús, Jesús yajtzoocpy anajty tüg'óciy pinjaty pa'm miid. ¹⁶Jesús ane'my je pa'mjäy ajcxy co ca' huaad nigapxy nimiýdägy co yi' je' je

Cristo. ¹⁷ Jadu'n Jesús ane'my je pa'mjäy jigix ycixipy yca'pxipy je ayuc huidibi je profeta Isaias yjaay jecy'ajty, co Dios jadu'n yminañ:

¹⁸ Jada je' iich ndumbi huidi ti nhuin'ixyich. Yi' iich ooy ndzocyich njihuüyich etz ooy njotcujcich miid yi'. Iich yi' nmöhuamybich iich njihu'iñ mic'ajt. Yi' capxhuäcxip iich n'ayuc jadu'n nej ndzaachytuna'nich naaxhuiniyjäy ajcxy miid ajcxy ypocy ycixpi.

¹⁹ Yi' ni ymigügtijc ca' oja'n, ni ycayäxa'n, ni ycatinähua'n, ni pin ca' midoohuipy ma cajn cujc.

²⁰ Ca' yi' tzaachytuna'n ayoobitijc etz huidibi ayo'ndumb ijtp. Etz nañ ni ca' yajtigoya'n huidibi ayoobitijc yco'ögy'ungdijc yjijp'ijxpy. Jadu'n nej jäy cayajhuindigoy tzajcapy huidi huiddyip etz ni cayajpich je mecha huidibi uuxy uuxy tiicxp. Ixti mabaad anajty yajcopicy y'ane'min tudägypi.

²¹ E yi' mayjäy ooy yjijp'ixa'nñii.

Xigixy Jesús co miidity mujcu' ymic'ajt

²² Chi miid miñ ajcxy ma Jesús tüg jäy huidibi huintzip etz uum. Je' anajty miid ca'oybi. Chi Jesús yajtzoogy, e chi y'ijxigy etz ycapxigy. ²³ Co Jesús jadu'n tuñ, chi je mayjäy ytigiiy huinmay'ahuidijt, chi ajcxy yminañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuui nej je jäy huinmay, chi ajcxy yminañ:

—Jadaabi yëydijc yajpidzimy ca'oybi miid je mujcu' huindzin ymic'ajt (ca' yi' yjëjty je Cristo).

²⁵ Per Jesús nejhuuiyb anajty ti je fariseos ajcxy yhuinmaayb, chi yminañ:

—Pen tügpicy tungmiidpi ixipy ñaybijc-huäcxigixy, etz ñaymidziptzoonigixy ixipy ac jëyi, pues cixipy yi' ajcxy y'ane'min. Pen tüg cajn o tügpicy jugymigü ixipy ñaybijc-huäcxigixy, pues ca' ajcxy y'idaangixy tügmucy.

²⁶ Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybijc-huäcxigixy, e je Satanás ymic'ajt ca' y'ida'n. ²⁷ Miich ajcxy minamb co iich nyajpidzimyich ca'oybi miid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mina'n, je jäy ajcxy huidibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yecp co miich ajcxy ti mgapxtigoy co yminaangixy co iich nyajpidzimyich ca'oybi miid Satanás ymic'ajt. ²⁸ Per iich nyajpidzimyich ca'oybi ma pa'mjäy miid Dios yjihui'n ymic'ajt. Paady miich ajcxy nejhuuiyb co ti ymiñ yjäty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigiiy ma tüg micpi jäy ytijc etz pigaani tijaty yi' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb

pijciip tijaty ymiid. ³⁰Pinjaty ca' xymijnicxpetyich, xymidzipich yi'. Pinjaty ca' tuñ miid iich co jäy nyaj'ixpicyich, hue' je' ajcxy jäy yajhuinma'ñyidgooyb.

³¹Janch iich miich ajcxy nimäy co Dios jëbi huinmecxip tüg'óciy pocy huidibi jäy ytungixp etz tüg'óciy jibicpi huidibi jäy ycapxcixp. Jëyi janchtiy co pinjaty capxtigooyb miid je Espíritu Santo, je Dios yjihui'ñ ymic'ajt, ca' Dios huinmecxip nimina. ³²Pinjaty jibic xyñigapxpich xyñimiydaccpich, je' huinmecxam. Per je huidibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yi' ytiim yi' miid yaj'ijxcapy

³³Pen miich ajcxy mnejhuihuamy je quipy pen oy quipy, o pen ca', jëbi mnejhuihuipy co je quipy nicxy ytiim'aty. Pen oy je ytiim, miich mina'nip co oy je quipy. E pen ca' oy ytiim'aty, huin'it miich ajcxy mina'nip co ca' y'oyity je quipy.

³⁴Jibic jäy miich ajcxy, jadu'n nipaady nej jihuüy ahua'n iyujc xy'ung'ajtp. Pen miich ajcxy jibic jäy'ajtp, énej jëbi miich ajcxy oybi ayuc mgapxipy? Jadu'n nej jäy ajcxy yjot yhuinma'ñ miidity, ac tim jadu'n ajcxy ycapxy. ³⁵Je jäy huidibi oy ayuc ycapxpy, ymiid oyjot oyhuinma'ñ paady oy ayuc capxy. Je jäy huidibi jibic ayuc capxp, ymiid jibic jot jibic huinma'ñ, paady jibic ayuc capxy.

³⁶Hich miich ajcxy nimay co anajty paady je xii je tiempo mina Dios tiyduna'ñ je naaxhuiñyjäy, huin'it ajcxy y'adzohuipy miid huen tim

huidibi ayuc huidibi anajty ajcxy ti mgapxy. ³⁷Com nejaty miich anajty ajcxy ti mgapxy je m'ayuc jadu'n miich ajcxy Dios xtytydunip. Com miid yi' mgi'm ayuc yi' miid m'oybidzimipy mhuätzpidzimipy. E nañ jadu'n miid yi' mgi'm ayuc yi' miid mbocycähuipy.

**Jibicjäydijc ajcxy pijctzoogixy
tüg ijsxpejt mijhuinma'ñybi**

³⁸Chi nijëjity fariseos ajcxy etz escribas ajcxy Jesús nimayi:

—Huindzin, n'ixamy iich ajcxy miich tüg m'ijxpejt.

³⁹Chi Jesús y'adzooy:

—Yi jibic jäydijc ajcxy etz ajcxy huidibi ca' mibiga'ñ Dios ypijctzooyb tüg ijsxpejt huidibi tzomb tzajpjoty. Per Dios ca' yega'ñ jadüg ijsxpejt. Ti Dios yecy tüg ijsxpejt ma Jonás. ⁴⁰Com jadu'n nej Jonás jecy'ajty ijsxpejt yecy co y'ijty tugiig xii tugiig tzuum mejyoty ma acx ymoxac, nañ tim jadu'n iich, je jäy huidibi tzoon tzajpjoty, nyegamy ijsxpejt jadachambi tiempo co n'idipyich tugiig xiim etz tugiig tzuum naaxjoty. ⁴¹Je mayjäy huidibi anajty tzinaayb ma Nínive cajn, ti jothuimbijtcixy etz ti ixmach ajcxy huidijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha iich ngapxhuäcxyich Dios y'ayuc ma miich ajcxy, etz jac nigí cötujcin nmiididyich, ca'ydi Jonás; e ca' miich ajcxy mjothuimbity. Paady co anajty Dios tiyduna'ñ je naaxhuiñyjäy, je Nínive jäy miich ajcxy xyajpocycähuam. ⁴²Nañ jadu'n je töxyjäy reina huidibi tzinay jecy'ajty ma madza'cruudz

ypidzimy, yi' je' xādhuaam je jāy
ajcxy huidibi tzinaayb jadachambi
tiempo, etz yajpocycāhuiib ajcxy.
Je reina tzoon jiguēy nicxy
co amido'ida'n je rey Salomón
ma capxhuācxi Dios y'ayuc. Ji
naaxhuiñ jadachambi tūg Dios
ytiy'ajtmīdipi jac nīgi ymijity,
ca'ydi Salomón anajty, e ca' je jāy
ajcxy mijpidāga'n.

**Je jibic espíritu co
jadüg'oc yhuimbity**

⁴³⁻⁴⁴ Yi jāy ajcxy huidibi cham
tzinaayb, quipxyjaty ajcxy mīd je
ca'oybi. Co je ca'oybi ypidzimy ma
je jāy, chi je' nīcxy jīm mīgtigīduum
y'ijxtacy. Co ca' paty ypcxtac,
huin'it ymina'n: "Huimbidaambich
ma je jāy yjot yhuinma'n ma iich ti
n'octzombi." Co je ca'oybi yjāty ma
anajty ti chināy, chi paty je jāy yjot
yhuinma'n ooy yhuātzity etz yajxon
ypedīgity oy oyduñ. ⁴⁵ Chi je ca'oybi
nīcxy oy yajtzoōn jahuixtujc ca'oybi
jac jibicpi ca'ydi je'. Chi ajcxy
ytiğiyy ma je jāy yjot yhuinma'n, e
chinay ajcxy jiiby. Huin'it je jāy
jac'octiy oy yjajtni, ca'ydi jadu'n nej
anajty jayijp'aty.

Jesús ytaj etz y'uch miguēx ajcxy

⁴⁶ Jesús yaj'ixpijcpy anajty je
mayjäy, co oy yja'ty je' ytaj etz
y'uch miguēx ajcxy. Hue' ajcxy
yhui'my tība'y. Je' ajcxy anajty
ymigapxamy Jesús. ⁴⁷ Chi jāy
yajnimay Jesús:

—Yi mdaj etz m'uch miguēx
ajcxy, chiiby ajcxy tība'y, miich
xyjamigapxamb.

⁴⁸ Jesús y'adzooy, nimay je jāy
huidibi ytaj y'ayuc yajnajxi ma yi':

—¿Pin jāy miich ajcxy mdijy co
iich ndaj'adyii etz iich n'uch'adyii
nmigüg'adyii?

⁴⁹ Huin'it Jesús nitziihuiiy je'
ydiscípulos ajcxy e yminañ:

—Jada iich ndiscípulos ajcxy
jadu'n nipaady nej iich ndaj etz iich
n'uch nmigüēx. ⁵⁰ Huen ytimpinity
huidibi ytumyb iich nDeedy
chojcin, huidibi jiiby tzajpjoty, pues
jadu'n yi' ajcxy nipaady nej iich
ndaj etz iich n'uch miguēx.

**Je ayuccapxhuācxi
y'ijxpejt (niipi iixpejt)**

13 Je huin'it xii Jesús choñ
ma je tījc. Chi nīcxy ma
je mejypa' jīm oy y'iñay'ihuüy. ² E
co mayjäy ooy ñaymujci jīm ma
anajty Jesús iñay, chi Jesús ytiğiyy
barcojoty. Per tūg'óciy je mayjäy
yhui'mday ma mejypa'. ³ Jesús
ytiğiyy jāy yaj'ixpijcp mīd jihuimbit
ayuc, yminañ:

—Tūg jāy choñ trigotiim huijp.

⁴ E ma anajty jīm ytiimhuijy, huin'it
je ytiim oy naagity ycāy ma tū'aa.
Chi jada' je joon ajcxy oy ymiñ
etz ypiihuigy je tiim. ⁵ Nijējity
ytiim ycāy ma tzaanīcx ma anajty
hueeni naax. Jada tiim tzojc ymujxy.
⁶ Com hueeni anajty je naax ma je
tzaanīcx, chi co oy xi'an ypadyii,
chi ytiitztay, com ca' anajty je ytictz
yeegity. ⁷ Nijējity tiim oy ycāy ma
ujtz'aayjot ma apyjot, e ujtz'ōctay je
trigo mang. ⁸ Per je tiim huidibi ca'u
ma oy ñaax, je' yon yajxon e tiim'ajt
may'amy; tūg ypi'cpajc iipxmajc
oy yco'ity, jadüg pi'cpajc tugi'px oy
yco'ity, jadüg pi'cpajc migo'px oy
yco'ity. ⁹ Pinjaty mido'n mīd huen
mido'mbicy jada ayuc.

Ti ycixpi je ijxpejt

¹⁰Chi je' ydiscipulos ajcxy
nimijhua'cy Jesús, chi ajcxy yajtiy:

—¿Na'amy co myajtuñ jihuimbit
ayuc co myaj'ixpicy je mayjäy?

¹¹Chi Jesús y'adzooy, yminañ:

—Miich ajcxy jaydëb

mnejhuñhuipy huidibi Dios
ñigapxyp ñimiydacpy coyüch'amy
ma y'ane'min. Jacjadyi jäy ca'
ajcxy huinjihuñhuipy. ¹²Pinjaty
ymiid yajmõhuip ñigi, pinjaty
hueen miid yajpigipy ñigi, oy ixypy
hueen jadim miidity. ¹³Paady
jihuimbit'amy nyajñimaayich;
jaydëbi pinjaty ijxcixy, ñipatpy
nejihuñy ca' ti ijxcixy; etz co ajcxy
midoogixy, ca' ajcxy huinjihuñy,
ñipatpy nejihuñy ca' ti midoogixy.

¹⁴Jadayaabi ytunyii yjadyi jadu'n
nej je profeta Isaías jaaybejty
yajhui'my ma jadu'n yminañ:

Miich ajcxy midohuamy, per
ca' mhuinjihuñhuangixy.

Miich ajcxy m'ixamy, nañ ca'
mhuinjihuñhuaangixy huidibi
ti m'ijxcixy.

¹⁵Com jadayaabi jäy ooy ajcxy
yjot yhuinmañ ti y'ahuimbity
juuñ. Nej ajcxy yjamidoy, ca'
ajcxy ymidohui'mgixy. Nej
ajcxy ja'ixy, ca' y'ijxhui'mgixy.
Nej ajcxy yjahuinjihuñyigixy,
per ca' yhuinjihuñy ma yjot
yhuinmañ. Yi' ajcxy ca'
yjothuimbidaangixy ma iich,
jaydëb nyajñidzögibich ajcxy.

¹⁶Per jotcujc miich ajcxy, co miich
ajcxy ijxhui'my miid mhuiin huidibi
ndumybich, e mmido'mbicy ajcxy
iich n'ayuc. ¹⁷Janch tiy'ajt jadu'n
nej iich miich nimaaygixy. Janch

tiy'ajt co may profetas ajcxy etz
tudägy jäy ajcxy huidibi tzinaayb
jegy'ajty, ooy ajcxy ja'ixañ huidibi
miich ajcxy m'ijxyp cham, per ca'
ajcxy ix. E ooy ajcxy jamidohuañ
je ayuc huidibi miich ajcxy
midooyb cham, per ca' ajcxy midoy.

Jesús najtzcapxiy je ijxpejt ma je niipi

¹⁸Amido'it miich ajcxy, jadu'n nej
yhuimbizimy jada jihuimbit ayuc
maabi je tiim huijpi. ¹⁹Je jäy ajcxy
huidibi amido'ijtp Dios y'ayuc, e
mic'amy je ca'oybi yajpidzimy Dios
y'ayuc ma ajcxy yjot yhuinmañ,
jadu'n ajcxy nipaady nej trigo tiim
huidibi cäb tügujc, e je joon ajcxy
mic'amy ypiimujctay. ²⁰⁻²¹Je jäy
ajcxy huidibi amido'ijtp Dios y'ayuc
janch jotcujc, per co agapxiyb
paady, co tzaachypi minaxy
yajnaxy miid Dios y'ayuc ycixpi,
chi mic'amy ajcxy ixmajtzn Dios
y'ayuc, jadu'n ajcxy nej je trigotiim
huidibi ti ycäy ma tzaanixc, huidibi
ca' oy ytictz miidity. ²²Je jäy ajcxy
huidibi amido'ijtp Dios y'ayuc, e
co ñicxni, chi jäy digooyñi Dios
y'ayuc miid jotcujc'ajtin tzinaayin,
comeeñ'ajtin etz adzojcän. Jadu'n
ajcxy nipaady nej trigotiim huidibi
ti ycäy ujtzjoty, e ca' ytiim'aty
miid co oy y'ujtz'ögy. ²³Je jäy
ajcxy huidibi amido'ijtp etz cöbijcp
yajxon Dios y'ayuc amumdügjot etz
Dios y'ayuc ytumyb ma ajcxy yjot
yhuinmañ, jadu'n ajcxy nipaady
nej je tiim huidibi ti ycäy ma oy
ñaax etz ti ytiim'aty may'amy. Tüg
pi'cpajc iipx majc oy yco'ity, etz
jadüg pi'cpajc tugipx oy yco'ity, etz
jadüg pi'cpajc migo'px oy yco'ity.

**Je iŋxpejt co je jibic ujtz
ymuxy ma je trigo cam**

²⁴Chi Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg yëydijc huidibi trigo tiim huijp ma je' ycam. ²⁵Per co ajcxy yma'öctay nidüg'óciy je cogam, chi ytiğiyy tüg ymidzip ma je ycamjot. Chi je midzip jibic ujtz tiim oy huijy ma je trigo cam. Chi ñicxñi. ²⁶E co je trigo oy yooñ, chi ypijy. Nañ jadu'n je jibic ujtz oy yooñ. ²⁷Chi je ytumbidijc oy yhuindzin yajnimay: “Huindzin, ¿nej ca' ti mnipy ac trigotiim? ¿Nej co jim nañ jadu'n jibic ujtz yajpaady?” ²⁸Chi je cogam yminañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojcpy co iich ajcxy nhuijxigibich je jibic ujtzi?” ²⁹Chi je cogam yminañ: “Ca'. Pen miich ajcxy mhuijxicy je jibic ujtz, ca' jecyity co m'ahuijxmugipy nañ jadu'n je trigo. ³⁰Ixmatz, huen je jibic ujtz yeegy tügmucy miid je trigo, ixti cooni anajty ypidigy je cosecha. Co cosecha paty, huin'it nguexa'ñich je ndumbidijc co huen jayijp pujxigy je jibic ujtz etz axotzipy etz nögipy. E co yajpidictay je jibic ujtz, chi yajpidigipy je trigo e pidägipy ma je tze'x.”

Je iŋxpejt ma je mostazapajc

³¹⁻³²Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg mostazapajc huidibi tüg jäy ñiip ma je' ycam. E je mostaza ytiim je' jac tim mutz

ca'ydi ni huidibi ujtz tiim. Per co je mostaza ytiim ymux etz yoñ, chi y'ahuimbijty jac mij ca'ydi jacjadyii ujtz. E hue' nicxy yjaty janch mij, ixti joon ajcxy oy yqueec miñ yqueec xijpy jim, pidägy je ype'ñ ma je mostaza y'aacx.

**Je iŋxpejt ma je levadura
huidibi ca' y'oyity**

³³Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej levadura huidibi tüg töxyjäy ypidacpy miid je harina, jigix je harina oy ypidigy.

Nej anajty Jesús yajtuñ je iŋxpejt

³⁴Tüg'óciy Jesús yaj'ixpijcy mayjäy, jihuimbit'amy yaj'ixpijcy, e ni ti ca' jäy yaj'ixpijcy cayajnimäy jihuimbit ayuc. ³⁵Jadu'n Jesús ytuuñ, jigix yajcuyduñ je ayuc huidibi je profeta Isaías yjaayhui'm jecy'ajty, co jadu'n yminañ:

İich ngapxamyich ac tim
jihuimbit ayuc. İich
nigapxamybich tijaty huidibi
ca' pin nejhuiy, mabaad Dios
oga'n yajcojy je naaxhuiñybi.

**Jesús capxticxni nej yhuimbizimy
je jibic ujtz ma je trigo cam**

³⁶Chi Jesús capxycijxy miid je mayjäy, chi ñicxy ma tüg tijc. Chi ytiğiyy tigoty miid je' ydiscípulos ajcxy. Chi Jesús ydiscípulos ajcxy nimijhua'cy Jesús, yminañ ajcxy: —Tun may'ajt iich ajcxy xyajhuinjhuiygy je jihuimbit ayuc co ti mnigapxy je jibic ujtz ma je trigo cam.

³⁷Chi Jesús yajnimay:

—Iich, je jāy huidibi tzoon tzajpjoty, jadu'n iich nipaady nej je jāy huidibi niip je oybi tiim ma je ycam. ³⁸Je cam jadu'n nipaady nej tūg'óciy naaxhuiñyāj. Je oybi tiim jadu'n nipaady nej je jāy ajcxy huidibi cōbijcp Dios y'ane'min. Je jibic ujtz jadu'n nipaady nej je jāy ajcxy huidibi cōbijcy ajcxy je mujcu' y'ane'min. ³⁹Je jāy huidibi niipy je jibic ujtz, jadu'n y'i nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰Jadu'n nej je jibic ujtz oy yajpujxigy etz yajpidacy jijnjoty, nañ tim jadu'n nicxy yjaty miid je jāy ajcxy huidibi cōbijcp je mujcu' y'ane'min co anajty je naaxhuiñ cixy ytigoy. ⁴¹Co anajty je naaxhuiñ ycixy ytigoy, chi iich, je jāy huidibi tzoon tzajpjoty, nguexamyich n'ángeles huen yajmujctāy je jāy huidibi je ymigūg yajtundigooyb, etz yi huidibi ajcxy jibic-huinma'n tumb. ⁴²Co yajmujctāhuipy je jibicjāydijc, chi ajcxy yajpidāgipy mijjijnjoty, jiiby ajcxy yāxa'n etz ytiitzmucxy ytiitzqueecy miid je ayo'n ycixpi. ⁴³Per je jāy ajcxy huidibi cuydumb Dios chojcin, idam ajcxy miid Dios Teedy jiiby tzajpjoty. Ymii'idamy ajcxy tūg oy'ajti, jadu'n nipaadip nej je xii ytiicxin yjajin. Pen miich ajcxy mido'n miid, mido'mbije ajcxy iich n'ayuc.

Je y'ijxpejt je meen huidii yūchip

⁴⁴Je Dios y'ane'min jadu'n nipaady nej meen huidibi yūch ijtp ma tūg cam. Per co tūg jāy paady je

meen, chi mic'amy jadūg'oc yūdztigach. Chi ooy yxondāgy. Chi ñicxy etz tooctāy tūg'óciy huidibi ymiid etz juy je naax.

Je y'ijxpejt je perla huidibi tzoohuip

⁴⁵Nañ jadu'n Dios y'ane'min jadu'n nipaady nej tūg ajuuyb adoocpi huidibi ijxtaayb tūg oybi perla huidibi tzoobatp. ⁴⁶E co anajty paady tūg perla huidibi janch tzhou, chi ñicxy tooctigoydāy tūg'óciy huidibi ymiid etz juy je perla.

Je acxmadzi'n y'ijxpejt

⁴⁷E nañ jadu'n Dios y'ané'min jadu'n nipaady nej tūg acxmadzi'n huidibi jāy miid ycojibiiby mejyjoty. Chi jiiby ytigiy huen ytim huidibi acxity. ⁴⁸E co anajty je acxmadzi'n y'uch miid je acx, chi je jāy ajcxy yajpidzimy ma mejypa'áy. Chi iñay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹Tim jadu'n nej ti yjaty miid je acx, nañ jadu'n jada'n, co anajty ycixy ytigoy je naaxhuiñ. Huin'it je ángeles ajcxy ñicxa'n huindu'my naaxhuiñ huin'ixa'n je jibic jāydijc e pidāga'n ajcxy abicy, nañ jadu'n huin'ixa'n je oy jāydijc, e pidāga'n ajcxy nañ jadu'n abicy. ⁵⁰Chi je ángeles ajcxy pidāga'n je jibicjāydijc mij jijnjoty. Jiiby jijnjoty ajcxy yāxa'n ytināhua'n etz ytiitzmucxaangixy ytiitzqueedaangixy miid je ayo'n miid je tzaachypi ycixpi.

Je jāy huidibi jajtp nej oybi etz nej jibicpi yajpidzimity

⁵¹Chi Jesús y'amidooy ajcxy:

—¿Nej mhuinjihuüyb miich ajcxy tüg'óciy huidibi iich ti ngapxich?

Chi ajcxy y'adzooy:

—Huindzin, ti nhuinjihuüy iich ajcxy.

⁵²Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huidibi tzajpjoty tsoon, hue' jadu'n nipaady nej tüg codijc comeñybi huidijaty ymiid yajty nej yajpidzimipy jemybi etz tucpi.

Jesús yajpaady jim Nazaret

⁵³Co Jesús yaj'ixpijctay jada jihuimbit ayuc, chi choon jim.

⁵⁴Co Jesús choon jim, chi ñicxy ma yci'mnaax yci'mgajp. Chi Jesús ytiñiy ma je judio ñaymujctac, e ytiñiy yaj'ixpijcp. Chi je mayjäy jiiby ooy jihuüy huinmay nej yi' yaj'ixpicy, yminañ ajcxy:

—¿Ma jada' jada yëydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ?

⁵⁵Jadayaabi yëydijc hue' yteedy'ajtpy je tzejtzpi, etz ytaj'ajtpy María. E iich ajcxy n'ix'ajtpyich je y'uch ajcxy; Jacobo, José, Simón, etz Judas.

⁵⁶Nañ jadu'n ya chinay ma iich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyity tüg'óciy je mayjäy ajcxy ooy yajmij'aty yi jäy ajcxy huidibi najtzcapxiyb Dios y'ayuc, ca'ydi huidibi y'ayucnajtzcapxiyb ma yci'mnaax yci'mgajp yci'mjiin yci'mdijc.

⁵⁸Ma yci'mnaax yci'mgajp Jesús ca' jaty nej mijhuinma'ñ tunip

anajty, miid co je jäy ajcxy ca' mijpidägyii.

Juan el Bautista co y'ögy

14 Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ.

²E yi' nimay je ymidungmiidpidijc:

—Yijiibi jäy huidibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt miid jaydëb mijhuinma'ñ tuñ.

³Herodes ti anajty ni'ane'mdiy co Juan huen yajmach, e yajpidägyi pujxtigoty. Jadu'n Herodes tuñ miid Herodías ycixpi. Je Herodías je' anajty miid jayjip'aty ti ypicy Felipe, je Herodes y'ajch, chi ti ixmajch Felipe, chi ypijcy miid Herodes.

⁴Juan ti anajty nimäy Herodes co ti ytundigooy co ti picy miid Herodías.

⁵Je rey Herodes ooy anajty jayaj'öga'ñ yi Juan, per tzigiiyb anajty miid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt miidpi, tüg profeta. ⁶Co Herodes yjimijtpetty, chi anajty ñayñixiidiñyüi, e chi Herodías ñiix ñicxy ejtzp ma Herodes yhuinduu. Je rey ooy jäygidacy nej anajty Herodías ñiix y'ejch. Paady Herodes Herodías ñiix nimay:

⁷—Dios iich yam ngapxpatpy co nmöhuamyb ti mdimypijctzooyb.

⁸Chi Herodías nimay je' ñiix co huen pijctzoohui je Juan, je Bautista, ycohuajc ma tüg texy. Chi Herodías ñiix je rey nimay:

—Ndzojcypich co miich xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytigiiy tajp maybi mij cajee. Per co ti anajty Dios capxpaatni, yminaani mayjäy yhuinduu co ymohuamyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuajc, e möhuipy Herodías ñiix. ¹¹ Huin'it je soldado oy je Juan ycohuajc yajminajci jiiby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscípulos ajcxy yja'ty. Chi ajcxy oy yajnaaxtigöy je Juan ñinicx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuiiy ti anajty ti ytuñyii ti yjadyii miid Juan, chi ytigiiy ma tüg barco naydüg, e nicxni ma tüg it ma ca' pin chinäy. Co je mayjäy nejhuiy co Jesús ti ñicxy, chi ajcxy chonday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymiid miin. ¹⁵ Com ti anajty chuu'iiñi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'iiñ, e ca' ya pin china'y, paady capxcíxy miid jada mayjäy ajcxy, jaydëb ajcxy nicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyity co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy yminañ:

—Per iich ajcxy jëyi yeeby nmiidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen iñay'ihuiydaaygixy ma pi'cmiiy'ung nicx. Huin'it Jesús je migooxpi tzajcaagy conöy etz je metzpi acx. Chi ypa't'ijxy jiiby tzajpcíxy, e yajnaxxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxcixy ma je mayjäy. ²⁰ Nidüg'óciy je mayjäy ajcxy ycaay cüxyi. Co je mayjäy ycaayday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yëydijctijc huidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy niihuingíxy

²² Chi Jesús ane'my yi' ydiscípulos ajcxy co huen barco tigiigixy mic'amy, jigix ñicxipy ajcxy jim mejy ninaxy. Nami yi' ydiscípulos ajcxy choñ barcojoty, Jesús ycapxcíjxy miid je mayjäy huen níxcixni. ²³ Co anajty Jesús ti ycapxcíxy miid je mayjäy, chi ñicxy naydüg ma tüg cögop Dios mibijctzoobi. Co ycoodziin Jesús naydüg anajty yajpaady. ²⁴ Co ycoodziin, mejy cujc anajty je barco cujc nicxy. E je ñi ooy anajty ymijjëtzpety ma je barco, je' co ooy anajty mic yjanchpojoy. ²⁵ E co oy ymoñiy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús

anajty ymiin mejyhuingíxy, chi ajcxy ooy ñay'adzigiíy. Ooy ajcxy yaaxqueecy yminañ ajcxy:

—Hue' iich ajt iixmaniiyim.

²⁷Chi Jesús mic'amy ymigapxy ajcxy etz nimay:

—Huinmic jotmic naybidáacigixy, iich yí'. Ca' mdzigiiygixy.

²⁸Chi oy Pedro Jesús ymigapxyii, nimaayí:

—Huindzin, pen janch miichity, ane'mgich co huen iich miich ninicxip adüyöyip mejyhuingíxy.

²⁹Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüyöyip mejyhuingíxy. ³⁰Per co Pedro jihuí'ñybicyu jadun nej anajty ooy mic yjanchpojy, chi ooy chigiy, chi oy oga'n ytigiiyñi quimbi, chi yaaxqueecy, yminañ:

—iHuindzin, iich yajtzóocigich!

³¹Huin'it Jesús oy yci' mimajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³²Co Pedro etz Jesús ytigiiy barcojoty, huin'it je mic poj ñajxy.

³³Huin'it je' ajcxy jilby barcojoty ycojxtinay'ihuiydaay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

**Jesús yajtzoocay je pa'mjäy
ajcxy jim Genesaret**

³⁴Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵E co je jäy ajcxy nejhuuiy co Jesús ti yjäty ma yí' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy

agonbi co Jesús yjimity. Chi je mayjäy miid miin tüg'óciy je pa'mjäy ma Jesús. ³⁶Chi ajcxy cohuaniiy Jesús, pen jeb je pa'mjäy ñidoñyí je yhuít. E tüg'óciy je huidijaty ñidonip je' yhuít, je' ajcxy choocay y'agidactay.

Huidi jäy yaj'ahuimbijty janch jibic

15 Chi ymiin ma Jesús nijëjty fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miin nijëjty escribas, je huindzindijc huidibi ajcxy nijayduty anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

²—¿Na'amy co miich mdiscípulos ajcxy ca' cuydungixy judío ñi'ap costumbre? Yí' ajcxy ycaaygixy y'uuccixy, e ca' jayijp ycibujcixy, ca' ixpujcixy ixjëtzcixy ypocy.

³Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'mgostumbre ma yjapadyii mguydungixy ixypy Dios ycötújcin. ⁴Com Dios ti y'ane'my ma ycötújcin: “Yajmij'at mdaj mdeedy, e pinjaty jibic nigapxy ni'ojiiy ytaj yteedy, ögipy yí'.” ⁵Per miich ajcxy minamb co tüg je yëdyjc jëbi nimäy ytaj yteedy: “Ca' iich miich ajcxy nbubedañ, com ti n'ahuaniiyich ma Dios tüg'óciy tijaty nmiidich.” ⁶Chi huen ytimpinity jadun minamb, ca' ocubedaanip ytaj yteedy, e jadun miich ajcxy myajtigoy Dios y'ane'min com tzachtunaangixy mgi'mgostumbre. ⁷Miich ajcxy naybidaacip jadun nej

jihuüy tudägy jäy, e ca' yjanchity.
Janch tiy'ajt jadu'n nej jecyip Isaías
jaaybejty yajhui'my co Dios jadu'n
yminañ:

⁸ Jadayaabi jäy xyajmij'ajtpich
ahuac aguy, per ca' ajcxy
xyajmij'atyich cixyot huinijot.

⁹ Naadigi' co ajcxy
xyhuin'fiygixyich
xyhuinyáaxcixyich.
Mnayyaj'ixpáicigixy ayuc
tiy'ajt huidibi jäy ajcxy ti cojy
ti maacxy.

¹⁰ Huin'it Jesús huomujctay je
mayjäy, yminañ:

—Amidoo'ijtcixy iich n'ayuc
etz mhuinjihuüygixip. ¹¹ Ca' ji
ni ti jiicxy huidi jäy ypidacpy
ma y'ahuac nicxy yajpocycäyii.
Yi' janchtiy je jibic ayuc huidibi
pidzim ma jäy ajcxy y'ahuac, yi'
ajcxy yajpocycähuüib.

¹² Chi ymiiñ ma Jesús je'
ydiscípulos ajcxy, chi ajcxy
ñimaayi:

—¿Nej miich mnejhuüyb co je
fariseos ajcxy ñijotma'tpy co ajcxy
midoy je ayuc jadu'n nej miich
minañ?

¹³ Chi Jesús y'adzooy, yminañ:
—Huen tim huidibi ane'min
huidibi ca' Dios ti pidägy, Dios
yajtigoyam, tim jadu'n nej jäy ajcxy
huijxigy ujtz huidibi ca' y'oy'ujtzity.

¹⁴ Ixmajtcix yi fariseos etz escribas
ajcxy. Ca' ajcxy huinjihuüy Dios
ytiy'ajt. Jadu'n ajcxy nipaady nej
jäy huintzpi, e co tüg huintzpi
huijtzhuidity jadüg huintzpi, chi
nimetz nicxy yjutcögägixy.

¹⁵ Huin'it Pedro nimay Jesús:
—Yajhuinjihuüyg iich ajcxy jada
jihuibit ayuc.

¹⁶ Chi Jesús yminañ:

—¿Nej miich ajcxy nañ jadu'n ca'
mhuinjihuüy jada jihuibit ayuc?

¹⁷ ¿Nej ca' miich ajcxy mnejhuüy
co tüg'óciy huidibi tigüyb ma
miich ajcxy m'ahuac, je' nicxp ma
miich ajcxy mjet etz ypidzimy ma
ajcxy mninícx? ¹⁸ Per je jäy huidibi
jibic capxp, capxp je' je jibic ayuc
huidibi ymiid ma yjot yhuinma'ñ.
Jada jibic ayuc yajpocychimícp
je jäy. ¹⁹ Yi jibicpi huidibi tzomb
ma jäy ajcxy yjot yhuinma'ñ, yi'
je' jäyyaj'ögi huinma'ñ, je töxyjäy
mígapxtigoyii huinma'ñ, meedzii
huinma'ñ, je indägi huinma'ñ, je
piitz capx huinma'ñ. ²⁰ Yijadu'mbi
jibic-huinma'ñ yajpocycäb jäy ajcxy
ma Dios. Per co jäy ajcxy ycaay
y'ügy, ma ca'ni ajcxy pocy ixpujcixy
jayíjp, ca' je' ypocycäy ajcxy ma
Dios.

Tüg töxyjäy huidibi ca' judíojäy mibíjc Jesús

²¹ Chi Jesús jim chooñ, nicxy ma je
Tiro etz Sidón naaxjot. ²² Jim anajty
tüg töxyjäy chinäy. Jada töxyjäy hue'
anajty cananeajäy, canan judíojäy.
Chi yi' nimiiñ Jesús, chi nimay:

—Huindzin, David y'ap y'oc,
pa'ayoogich. Iich nmiidich tüg
niix huidibi ymiid ca'oybi etz oy
tzaachypi paady.

²³ Per ca' ni nej Jesús y'adzoohui.
Huin'it je' ydiscípulos ajcxy miiñ ma
Jesús, e ycohuaniiy, minañ ajcxy:

—Capxycíx miid jada töxyjäy, com
nigo xypayaax xypadinaayim.

²⁴ Chi Jesús yminañ:

—Dios iich ti xyquexyich jëda'ajty
ma je israelitasjäy huidibi y'alma
tigoyam.

²⁵Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷Huin'it je töxyjäy y'adzooy:

—Janch tiy'ajt jadu'n nej miich mina'ñ, per ixti ycaayb je uc je tzajcaagy y'abu'x huidibi cäb ma yhuindzin mesa.

²⁸Chi Jesús je töxyjäy nimay:

—Janch mij mmibijcin. Hich ndunaamybich jadu'n nej miich mdzocy.

Huin'it hori je töxyjäy ñiix choocy.

Jesús yajtzögy mayba'mjäy

²⁹Chi Jesús jim choon. Chi ñajxy ma Galilea mejypa'. Chi ypejty ma tüg cögop, jim inay'ihuiy. ³⁰E huin'it oy mayjäy miidmiin pa'mjäy huidibi huintz, uum, cümucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajtzoocay. ³¹E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ijxigy, je cümucpy tecymucpyi ti yöyigy. Chi je mayjäy ytigiiy iibaady capxpaady Dios, je Dios huidibi je Israel jäy ymijpidacpy.

Jesús yajcay midaax mil jäy

³²Chi Jesús mijhuoy je' ydiscipulos ajcxy, nimay:

—Ooy nba'ayooyich jadayaab jäy ajcxy. Com cujc midugiig xii ijtcixy ya miid iich etz ca' ajcxy miidity ti ycaayipy. Ca' nguexhuimbida'ñich ajcxy ayuu ma ytiyc, ca' yjetyity yajpa'mgojip ajcxy tü'am.

³³Chi je' ydiscipulos ajcxy minañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

³⁴Chi Jesús yajtiy:

—¿Naag jiiby tzajcaagy miich ajcxy mjacmiidity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵Chi Jesús nimay je mayjäy co huen inay'ihuiydaaygixy naaxcixy.

³⁶Chi Jesús conigy je huixtujcpi tzajcaagy etz je hueenip acx, e yajnax Dioscojuyip ma Dios. Chi tujc-hua'cx etz moy je' ydiscipulos ajcxy. E yi' ajcxy yajhua'cx je jicxy picy ma je mayjäy. ³⁷Chi je mayjäy nidüg'óciy ycaay cüxi. Jesús ydiscipulos ajcxy yajpidigy huixtujc cach cayduc uuctuc tiibi anajty yconaxy. ³⁸E je huidibi ajcxy cay hue' anajty naybáatigixy nimidaax mil, abicy je töxyjäydijc etz pi'ctijc ajcxy. ³⁹Chi Jesús ycapxycixy miid je mayjäy huen ajcxy nícxcixyñi ma ytiyc. Chi Jesús ytigiiy barcojoty etz ñicxni ma Magdala naax jot.

Je fariseos etz je saduceos ajcxy pijctzoogixy tüg ijxpejt mijhuinma'ñybi

16 Chi je fariseos etz saduceos y'oy ajcxy ixty Jesús. Yi' ajcxy ijxta'n octunaangixy miid Jesús, paady ajcxy pijctzoy co Jesús

huen yaj'ixyii ajcxy tüg ijsxpejt huidibi tzomb tzajpjoty. ²Chi Jesús y'ladzooy je' ajcxy:

—Co miich ajcxy m'ixy tzuu yi tzajp tzaptz, chi miich ajcxy minañ com jabom oy tiempo yajpadañ. ³Per co miich ajcxy m'ixy jopy je tzajp tzaptz etz huimbicy, chi ajcxy minañ co ca' y'oyity yi tiempo. Miich ajcxy ooy mnaybidägyii nejihuüy ooy m'ixpicyity ma Dios ytiy'ajt, e ca' yjanchity. Miich ajcxy jëbi yi tzajp myajcapxy, per ca' mnejhuüygixy nej yhuimbizimyi yi mïjhuinmañ ijsxpejt huidibi Dios ytumyb ma jadachambi xii tiempo. ⁴Yi jây ajcxy huidibi cham tzinaayb, ooy yjibicjâyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijsxpejt mïjhuinmañ huidibi tzomb tzajpjoty. Ca' Dios yaj'ixañ ajcxy jadüg mïjhuinmañ, com miid miich ajcxy jaybetyity je mïjhuinmañ ijsxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jây ajcxy y'ixpijcin

⁵Co Jesús etz ydiscípulos ajcxy yja'ty ma jadüg niiba', chi je' ajcxy yjâydigoy je tzajcaagy. ⁶Chi Jesús yminañ:

—Naygüend'ájtigix miid yi fariseos etz saduceos ajcxy, ca' mïjpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷Chi Jesús ydiscípulos ñayñimáayigixy miñ xyipy:

—Paady jadu'n yminañ, je' co ti iich ajt je tzajcaagy njâydigooyim.

⁸Jesús nejhuüy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy minangixy co ca' ajcxy tzajcaagy miidity? Janch hueeni miich ajcxy mmibijcin. ⁹¿Nej ca'ni miich ajcxy mhuinjihuüy? ¿Nej ca' mjâymechyii co iich migoox tzajcaagy nyajhuäcxy etz ni migoox mil je yëydijctijc anajty huidibi ajcxy cay? ¿E ni mga'ajihuüyii ajcxy naag cach cayduc uuctuc ti myajpidigy? ¹⁰¿E ni mga'ajihuüyii ajcxy co huixtujc tzajcaagy nyajhuäcxyich ma nimidaax mil yëydijc ajcxy huidibi caay etz naag cach cayduc uuctuc myajpidigy ajcxy? ¹¹¿Nej co ca' miich ajcxy mhuinjihuüy, co ca' iich yam nigapxy yi tzajcaagy huidibi miich ajcxy ti mjâydigoy, co ti nyajnimaygixy je levadura huidibi je fariseos etz saduceos ajcxy ymiid?

¹²Huin'tit Jesús ydiscípulos ajcxy huinjihuüy co Jesús ca' anajty je' ti yajnimäyii ajcxy co huen naygüend'ájtigixy miid tzajcaagy levadura. Hue' janchtiy Jesús yajnimay ajcxy co huen naygüend'ájtigixy miid je fariseos etz saduceos ajcxy y'ixpijcin.

Pedro nidiy'aty co Jesús y'i' je' je Cristo

¹³Co Jesús yja'ty ma Cesarea Filipo naaxjot, chi Jesús y'amidooy je' ydiscípulos ajcxy:

—¿Nej jây ajcxy yminañ, pínic iich?

¹⁴Chi ajcxy yminañ:

—Nijëjity jây yminañ co miich je' Juan je Bautista. Nijëjity jây yminañ co miich je' Elías, e nijëjity yminañ co miich je' Jeremías o jadüg profeta (huidibi tzinay jecy'ajty).

¹⁵Chi Jesús yminañ:

—¿E miich ajcxy nej minaangixy, pin iich?

¹⁶Huin'it Simón Pedro y'adzooy:

—Miich je' je Cristo, je Dios y'ung.

¹⁷Chi Jesús y'adzooy:

—Jotcuyc miich Simón, Jonás y'ung, je' co ni pin xycayajnimäy jada tiy'ajt, tügpajc je Dios Teedy nDeedyich huidibi jiiby tzajpjoty, yi' ti xyajnejhuüy jada tiy'ajt. ¹⁸Hich miich nimaayb co miich mxii'adiyb Pedro, e hue' yhuimbizimy tzaa (hue' je', je tzaa tija'n je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'nich iich ndzajptijc (hue' yhuimbizimy, ma iich n'ane'min chondäga'n), e ni ca' oybi ymic'ajt ycamimadägiy. ¹⁹Hich miich nmöhuamyb je cötujcín jadu'n nipaady nej tüg ahuaast huidibi miid myaj'ahuädziy Dios y'ayuc ytiy'ajt. Tüg'óciy huidibi miich mgapx'aducpy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ya naaxhuiñ ca' capx'aducy, Dios nañ ca' capx'adugipy jiiby tzajpjoty.

²⁰Huin'it Jesús nimay je' ydiscípulos ajcxy, co ca' huaad ni pin nimäy co yi' je' je Cristo.

Jesús nigapxy je' y'öcín

²¹Ixti huin'itni Jesús ytiigi yajnimay je' ydiscípulos ajcxy co nicxamb jim Jerusalén etz co jim ooy y'ayoohua'n. Jim Jerusalén je judío mijjäydic, je teedytjic huidibi tungmiidpi, etz yi escribas ajcxy ooy chaachytuna'nyii etz yaj'öga'nyii. Per codugiig xii huin'it yjugypiga'n jadüg'oc. ²²Huin'it

Pedro miidnicxy Jesús ahuinguyc, e oy ogy, yminañ:

—Huindzin, ca' Dios tzocy nicx jadu'n mjaty. Miid miich ca' jëbi jadu'n mjadipy.

²³Per Jesús yhuäc-huimbijty, chi nimay Pedro:

—Huinhuaätcich Pedro, je mujcu' miich jadu'n xyajcapxp. Ca' nigoo xy'adzipyich. Ca' miich mhuinma'nybidägy nej Dios tzocy. Yi' janchtiy miich mhuinma'n'ajtpy nej jäy ajcxy tzocy.

²⁴Huin'it Jesús je' ydiscípulos ajcxy nimay:

—Pen je pinjaty xypamina'nich, huen yci'mdzojcin ixmajtztäy etz huen yhuinma'nypidägy co ayoohipy miid iich ycixpi, ixti mabaad y'ögy. ²⁵Huen pinjäy huidibi ca' ayoohua'n miid iich ycixpi, hue' je' yajtigoyamy yi' yjugy'ajtin. Per pinjaty xypanicxpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶¿Ti jäygidaacin yi' co tüg jäy y'ocnayyapadiiyb yi meeñ etz mic'ajtin huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'nyii jëbi jäy y'alma yjugy'ajtin occojuyi? Nigi choohuüty jäy ajcxy y'alma yjugy'ajtin, ca'ydi jac ni ti. ²⁷Hich, je jäy huidibi tzoon tzajpjoty, miinaambich jadüg'oc ya naaxhuiñ miid je ángeles ajcxy etz miid nDeedyich y'oy'ajtin. Huin'it micuejtähua'n tüg'óciy je jäy nej anajty ti ytuungixy, pen oy, o ca' y'oyity. ²⁸Janch tiy'ajt jadu'n nej nimaaygixy co ji ya naagity huidibi ca' y'öga'n ixti cooni

xy'ixipyich jadüg'oc co iich anajty nmiin ane'mbi.

Co Jesús ñinïx yajtigach

17 Codudujc xii huin'it Jesús miidnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ²E jim copcïxy Jesús ñinïx ñaygojtigajtzi ma Pedro, Jacobo etz Juan ajcxy yhuinduu. Jesús yhuiñyijp ytigiiy adïicxp nej je xii ytiicxin. E Jesús yhuít y'ahuimbijty janch poob jadun nej tüg tiicxin. ³E timetiini oy ijxcixy Moisés etz Elías ycapxy miydägy anajty miid Jesús. ⁴Chi Pedro nimay Jesús:

—Huindzin, oy y'oyity co iich ajt ya. Pen miich mdzocpy jëbi iich ajcxy nyaj'oyiy tugiig tijcquemy. Tüg miich mje', tüg Moisés yje', etz tüg Elías yje'.

⁵Pedro capxp anajty, tim huin'ityi tüg joc yajnidigoyday je' ajcxy huidibi ooy adïicxp anajty. E ma je joc yajmidoy tüg ayuc huidibi yminañ:

—Jadayaabi yëydijc iich je' n'ung'ajtpy huidibi ooy ndzocy njihuüyich etz yi' iich miid njotcujcity. Amidoo'it miich ajcxy yi' y'ayuc.

⁶Co Pedro, Jacobo, etz Juan jadun midooy je ayuc choon jocjoty, chi ajcxy ooy chigiiy etz ñayñitzitcidaaci ajcxy.

⁷Huin'it ajcxy Jesús ñimiini etz nidoñ ajcxy, e yminañ:

—Pidiccix, ca' mdzigiigixy.

⁸E co ajcxy y'ijxïgy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähuipy jadun nej ti m'ijxcixy cham, ixti cooni iich anajty ti njugypicyich jadüg'oc ma anajty ti n'ögich.

¹⁰Huin'it je' ydiscípulos ajcxy yajtiy Jesús:

—¿Nej co yi escribas, yi' ajcxy huidibi nijaydutp etz yajnigüejp Dios y'ayuc, yminaangixy co Elías yi' miinaam jayijp etz axam je Cristo?

¹¹Chi Jesús y'adzooy:

—Janch tiy'ajt co Elías ymiinañ etz yaj'oyiydähuamy tüg'óciy miid Dios ycixpi. ¹²Per iich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E nañ jadun iich, je jäy huidibi tzoon tzajpjoty ayoohuaambich ma yi' ajcxy.

¹³Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmiidpi

¹⁴Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuüy ma Jesús yhuinduu, chi yminañ:

¹⁵—Huindzin, iich nmang pa'ayoohuic. Je' co ymiid mo'tpa'm etz oy yaj'iyoooyii. Canaag'oc ti ycäy jiiñjoty nijoty. ¹⁶Paady iich ti nmiidmiinich ma miich mdiscípulos ajcxy, per ca' ajcxy ymadacy yajtzögipy.

¹⁷Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich

ajcxy mmibiga'n Dios, ca' miich
ajcxy mgapxymidoohua'n Dios.
¿Naag xii naag tiempo iich
miich ajcxy njacmimecxtugipy?
Yajmiingix yi yeeg'anäg.

¹⁸Co je yeeg'anäg yajmiidja'ty
ma Jesús, huin'it Jesús ane'my
je ca'oybi co huen pidzim ma je
yeeg'anäg. E mic'amy je' chögy.

¹⁹Jac co hueeñi, je' ydiscípulos
ajcxy miidmiydac Jesús ahuingujc,
chi ajcxy yajtiy ma Jesús:

—¿Nej co iich ajcxy ca' ti
nmadägy nicx nyajpidzimixyich
je ca'oybi ma je yeeg'anäg?

²⁰Chi Jesús yminañ:

—Je' co miich ajcxy hueeni mmibijcin.
Janch tiy'ajt jadu'n nej nnimaaygixy, co
ixyipy miich ajcxy xy'ocmibicyich, ooy
ixyipy jëda'ajty jadu'n nej je jac mutzpi
ujtz tiim, huin'it jëbi ixyipy mnimäy
jadayaabi cop co huen jiihuäcy ya etz
huen nicxy huingduum, chi ñicxip je
cop. Ni ti ji ycatzipity pen janch miich
ajcxy miidity mibijcin. ²¹Jadayaabi
picy ca'oybi pidzimipy co Dios
nmibijctzoohuim mictägy etz ayuu'ijt,
ca' jac ti huinma'n.

Jesús nigapxy jadüg'oc y'öcin

²²⁻²³Co anajty ajcxy yhuidity
tügmutcy jim ma Galilea y'it, chi
Jesús nimay je' ydiscípulos ajcxy:

—Iich, je jäy huidibi tzoon
tzejpjoty, yajcäyegipyich ma jäy. E
yi' ajcxy xyaj'ögibich etz codugiig
xii njugypigipyich jadüg'oc. Co je'
ydiscípulos ajcxy jadu'n midooy, chi
ajcxy ooy yjotmaybaty.

Je cogüeجتin ma je tzajptijc

²⁴Co Jesús yja'ty miid je'
ydiscípulos ajcxy jim ma je

Capernaum cajp, chi huidi anajty
ajcxy meen yajmujcp miid tzajptijc
ycixpi, oy ajcxy ijxcixy je Pedro, chi
ajcxy y'amidooy:

—¿Nej miich mhuindzin ycuejcpy
meen miid tzajptijc ycixpi?

²⁵Chi Pedro y'adzooy:

—Cuejty.

E huin'it hora co anajty Pedro
ytigiy tigoty, chi Jesús jayijp
ymigapxy, ñimay:

—Simón, ¿nej mmina'n? ¿Pin je
rey ajcxy yajcuejcpy? ¿Yi' yjáy o
huingjäyi?

²⁶Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjáy huaad ti
cuejtcixy. ²⁷Per ca' ndzocyich co je
cogüeجتpi nyajcapxmayiym, nicx
miich ma yi mij laguun e cohuidzi'
jiiby mxu'n, e je acx huidibi anajty
jayijp huoomb, je' myajpidzimipy,
e ma y'ahuac jiiby mbaadipy tüg
meen, yajpidzim je meen e nicx
cuet miid iich ycixpi etz miid miich
ycixpi.

¿Pin je' jac nīgi mijip?

18 Je huin'it hora je'
ydiscípulos ajcxy
ymijhuäctay Jesús etz yajtiy:

—¿Pinjäy je'jac nig ymiid je
mij'ajtin ma Dios y'ane'my jiiby
tzejpjoty?

²Chi Jesús mijhuoy tüg je
pi'c'anäg. Chi pidacy je pi'c'anäg
cuje'amy ma yi' ajcxy. ³Chi Jesús
yminañ:

—Janch tiy'ajt iich miich ajcxy
nimäy, pen ca' miich ajcxy
jothuimbijtcixy etz naybidaaccixy
mhuinma'n jadu'n nej jada

pi'c'anäg huinma'n̄ miid, pues ca' mdig'ihuipy ma Dios Teedy y'ane'my jiiby tzajpjoty. ⁴Paady, pinjaty miid yhuinma'n̄ yung nax jadu'n nej jadayaabi pi'c'anäg miid yhuinma'n̄ yung nax, je' je' je huidiib jac n̄gi mij'ajtin ymiid jiiby ma Dios y'ane'my. ⁵Hueñypinity huidibi miid iich ycixpi cōbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngōbicyich, hue' jadu'n nipaady nej jihuüy ti xycōbicyich ti xychocyich.

**Je huidibi ooy ycojotmayity
co nbocycāhuim**

⁶Hueñypinity huidibi jibic-huinma'n̄ ymibidzimy, e yajpocycāy yi jadu'mbi pi'ctijc huidibi ajcxy xymijnixcpejtpich, jac'oy ixypy co yi jadu'mbi jāy ytimyñayyōcxodzīyīi tüg paandzaa etz ñayñajtzjibibihuipy mejyjoty. ⁷Ooy ayo'n̄ity ooy jibicity co ji naaxhuiñybi yajpaady tijaty huidibi yajtundigooby jāy ajcxy. Ni mina xii ca' tigoy y'idipy tijaty huidi yajtundigoy je jāy ajcxy. Per mij ayo'n pada'n̄ miid yi Dios pinjaty cojp tundigooyii. ⁸Pen miich mgi' o miich mdecy xyajtundigooby, jac'oy ixypy co mdim'ixpuxy etz ixjibipy jiguem. Nigi oy co mdig'ihuipy ciduc tecytuc jiiby tzajpjoty etz ca'ydi co mdig'ihuipy miid metz mgi' etz metz mdecy mijjiinjoty huidibi nimina ycapich. ⁹E pen yi mhuiin tug xyajpocycāhuamb, tim yajpidzim etz ixcātz jiguem. Com jac'oy mdig'ihuipy miid tüg mhuiin ma jugy'ajtin huinixiibi, ca'ydi co mdig'ihuipy miid metz mhuiin ma yi jiin huidibi camina xii ycapich.

Je y'ijxpejt, je cōbixy huidibi tigooy

¹⁰Ca' m'ixtijcixy ni tüg pi'c'anäg huidibi xymibijcpich. Yi' ajcxy je' y'ángeles tim ijtiiib jiiby tzajpjoty ma Dios Teedy, iich nDeedy yhuinduu. ¹¹Iich je jāy huidibi tzoon tzajpjoty, ti nmiiñich ya naaxhuiñ, je' co nyajnitzōga'n̄ich je jāy ajcxy y'alma huidibi tigoyam. ¹²¿Nej miich ajcxy mina'n̄? Pen tüg jāy ymiid migo'px cōbixy, etz pen yöydigooyb nidügti cōbixy, ¿nej ca' jēbi ixmach je nimida'px majmocx midaax cōbixy etz nicxy ixtāy je jadügpi huidibi yöydigooy? ¹³E pen ypatpy je tügpi huidibi yöydigooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmocx midaax huidibi ca' anajty ti yöytigooygixy. ¹⁴Tim jadu'n nipaady miid Dios Teedy jiiby tzajpjoty, ca' tzocy co ni tüg jāy y'alma tigoyipy.

**Nej huaad tüg mmigüg
nhuinmeecxim**

¹⁵Pen miich mmigüg xytuñ jibic, miidmiydac ahuingujc e yajhuinjihu'i ma ti ytundigooy, pen xy'ayuchuinjihuüy ti anajty mminaymigügpigyii je mmigüg. ¹⁶Pen ca' xy'ayuc-huinjihuüy, chi huominipy tüg o metz mmigüg huidibi jēbi nidiy'ajt'adipy miich m'ayuc. ¹⁷E pen nañ ca' je' ajcxy ayuc-huinjihuühua'n̄, miidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymiidity. ¹⁸Janch tiy'ajt

iich miich ajcxy nimäy, tüg'óciy huidibi miich ajcxy mgapx'adujcpy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jiiby tzajpjoty. ¹⁹E nañ jadu'n iich miich ajcxy nimäy, pen ya naaxhuiñ miich ajcxy nimetz mnaygápaxigixy co tijaty mmibijctzohuaangixy ma Dios, Dios, iich nDeedy huidibi jiiby tzajpjoty, xymöhuipy huidibi ajcxy mbijctzooyb. ²⁰Com ma miich ajcxy nimetz o nidugiig naymújcigixy, jím iich n'ity cujc'amy ma miich ajcxy.

²¹Chi Pedro y'amidooy Jesús yminañ:

—Huindzin, ¿naag'oc huaad nhuinmeecxyich y'i' ajcxy huidibi xymidundigooybich? ¿Nej nméecxibich ixti cooni huixtuc'oci?

²²Chi Jesús y'adzooy:

—Ca' yhuixtuc'ócity, hue' meecxipy midaax migo'px jamida'px majmocx midaax'oc.

**Je tumbi y'ijxpejt huidibi
ca'p ymigüg huinmeecxy**

²³Dios y'ane'min jiiby tzajpjoty jadu'n nipaady nej tüg rey huidibi huijtz'oyiib miid je ytumbidijc jajadu'ni ajcxy yjacminucxy'adyii. ²⁴Je rey ytimyhuijtz'oyiichondacyñi anajty cuentas, co oy yjädý tüg ytumbi huidibi anajty minuucxy'ajtip canaag millón. ²⁵Com je' ytumbi ca' anajty miidity ti miid migüediib je' yhuindzin. Huin'it je huindzin ane'my co

huen je' ytumbi yajtoocnax quipxyi miid y'ungdöxyijc etz tüg'óciy tijaty ymiid, jaydéb ñuucxy y'adujctähuipy. ²⁶Huin'it ytumbi ycoxtinay'ihuiiy ma yhuindzin yhuinduu etz nimay: “Huindzin, pa'ayoogich, etz iich miich nmigüejtähuipy.” ²⁷Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸E mic'amy co je' ypidzimy pujxtigoty, chi yminaybati tüg ymigüg huidibi anajty miid quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymigüg huidibi miid ytuñ, chi nimay: “Cuet huidibi mnucx'ajtpy ma iich.” ²⁹Huin'it ymigüg ycojxtinay'ihuiiy ma je' yhuinduu. Chi minuucxtaacy nimay: “Pa'ayoogich. iich miich nmigüejtähuipy.” ³⁰Chi je jadügpi ca' mecxtujcin yajtuñ. Chi oy ymigüg pidägy pujxtigoty, ixti cooni anajty micuedyii. ³¹Co je jacjadyii ymidumbidijc oy ixý jadu'n nej ti yajtuñ je' ymigüg, chi ooy ajcxy jihuuiy. Chi ajcxy nicx ma je yhuindzin etz yajnimayday tüg'óciy nejaty anajty ti ijxcixy. ³²Huin'it je' ajcxy yhuindzin oy yajhuoyii je huidibi minuucx'ajtip canaag millón. Chi nimay: “Miich ooy mdzachjibicjäyity. Ti iich miich nhuinmeecxi tüg'óciy je mnucxy, miid co miich pa'ayoohuin mbijctzooy ma iich. ³³E miich nañ jadu'n ixýipy ti mba'ayoy je migüg huidibi miid mmiduñ, huidibi xyminuucxy'ajtp, jadu'n nej iich miich ti nba'ayooy.” ³⁴Chi je huindzin ooy chachjotma'ty, chi pidacy

ane'min co huen yajtzaachytuñ je' ytumbi mabaad cuejttäy tüg'óciy huidibi ñuucxy'ajtpy. ³⁵Chi Jesús ycapxycíjxni, minañ:

—Tím jadu'n nej jada rey ti tuñ miid je ytumbi, nañ tím jadu'n Dios tunipy miid miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdüjot.

Jesús yaj'ixpicy miid co jäy ytöxyijc ixmach

19 E co Jesús capxtay jada ayuc, chi choñ Galilea, chi oy yjädy ma Judea it jim Jordán mij nii nínaxy. ²Chi ooy mayjäy ypanícxí, e jim yajtzoocy huidijaty anajty yuu miid pa'm miid.

³Huin'it nijējity je fariseos ajcxy nimiin Jesús co yajmachcāhuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jēbi tüg yēydijc ixmadzip ytöxyijc miid tím hueeni ti capxy ti ayuc?

⁴Chi Jesús y'adzooy:

—¿Nej ca'ni miich ajcxy m'ixy mgapxy ma ymiin jaybety ma Dios ñecy co je naaxhuiñybi chondacy, co Dios oga'ñ yajcojy tüg'óciy tijaty huidibi j'ajtp co “Dios yajcojy tüg yēydijc etz tüg töxyjäy”? ⁵Nañ jadu'n Dios yminañ: “Je yēydijc y'ixmadzip ytaj yteedy etz pudigihuipy je' ytöxyijc. E je yēydijc etz ytöxyijc tú'ciy idaangixy.” ⁶Paady ca' ñimetzity ajcxy, com je yēydijc etz ytöxyijc tūgmucy y'idaangixy. Com Dios ti huijtmucy je yēydijc miid je töxyjäy, paady ca' huaadity co

jäy ajcxy huijtzhuäcxyp tiibi Dios huijtmucy.

⁷Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg yēydijc jēbi huaad ixmach ytöxyijc, e möhuipy ñinecy ñidiy'ajt e jadu'n jēbi ixmach?

⁸Chi Jesús yminañ:

—Moisés jada cötujcin ti xymooygixy co jēbi m'ixmajtczixy mdöxyijc miid co miich ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹Janch tiy'ajt jadu'n nej iich miich ajcxy nimaaygixy co je yēydijc huidibi yajjayhuäcxp miid je ytöxyjäy, e je ytöxyjäy ca' anajty ti ytundigooyb miid huingbi yēydijc, hue' je' yēydijc ytundigooy co ixmach ytöxyijc etz ypíjctigach miid huingbi. Nañ tím jadu'n pen tüg yēydijc ypicy miid tüg töxyjäy huidibi ñäy ti y'ixmachyii, hue' tundigooyb anajty je yēydijc.

¹⁰Co Jesús ydiscipulos ajcxy midooy jada ayuc, chi ajcxy yminañ:

—Pen jadu'n jēdu'n je tiy'ajt co je yēydijc ca' huaad ixmadzip ytoxyjäy, jac'oy co ca' nbjicim.

¹¹Chi Jesús yminañ:

—Ca' tüg'óciy je jäy huinjihuñy jadayaabi tiy'ajt. Jēyi ajcxy huinjihuñhuip pin ajcxy Dios pidaaci co huinjihuñhuip. ¹²Ji canaagnax je ayuc je huinmañ nej ca' yjēbity ypigipy je yēydijc. Naagity pi'ctijc yma'xung'aty e ca' yca'pxity ñinícxxy, paady ca' picy ajcxy. E nijējity je yēydijc ca' huaad

ypicy, miid jëgixpi co anajty je'
ti ymijaapigyii. E nijëjity yëydijc
hui'my jaybicy miid jëgixp co ajcxy
ytuñ ma Dios ytung, je Dios huidibi
ane'myb tzajpjoty. Pinjaty cöbigamy
iich n'ayuc huen cöbicy.

Jesús conucxy maybi'ctijc

¹³Chi naagity je jäy miidnicxy
y'ung y'anäg ma Jesús jaydëb
yajcñixajipy etz Dios mibijctzoy
miid y' ajcxy ycixpi. Chi Jesús
ydiscípulos ajcxy oty je jäy ajcxy
huidibi anajty miid miimb je y'ung
y'anäg, nimaaygixy co ca' jadu'n
y'oyity. ¹⁴Per Jesús yminañ:

—Huen miid miñ ajcxy pi'c'anäg
ma iich, ca' mjijpcogapxiigixy.
Com pinjaty ymibijcp iich ngapxy
n'ayuc, jadu'n nej jadayaabi
pi'c'anäg ajcxy ymibicy, je' ajcxy
tigihuam ma Dios y'ane'my jiiby
tzajpjoty.

¹⁵Chi Jesús cñixajy je pi'c'anäg
ajcxy. Chi ñicxni.

Tüg yeeg'anägnip comeeñybi miidmiydägy Jesús

¹⁶Chi tüg yëydijc oy ixty Jesús.
Chi y'amidooy:

—Huindzin, çti jada' co oy iich
ndunipyich jaydëb nbaadibich
jugy'ajtin huidibi ca' ycixipy
ytigoyipy?

¹⁷Chi Jesús y'adzooy:

—¿Na'amy co xyñimäyich co oy
huindzin iich? Dios tügpajc oyip,
ca' jac pin. Pen miich mdzojcpy
co mbada'n jugy'ajtin huidibi
ca' ycixipy ytigoyipy nimina
mguydunipy je Dios ycötujcin
huidibi Moisés ycojaay jecy'ajty.

¹⁸Chi je yeeg'anäg yajtiihuimbijty:

—¿Huidibi cötujcin miich mdijp?

Chi Jesús yminañ:

—Ca' migüg myaj'ögipy. Ca'
migüg ytöxyijc migapxtigooyipy. Ca'
mmeedzip. Ca' mmigüg mhuin'iinip.
¹⁹Yajmij'at mdaj mdeedy. Mdzogipy
mjihuihuip miich mmigügtijc, tim
jadu'n nej miich ci'm mnaychogyii.

²⁰Chi je yeeg'anäg Jesús nimaayi:

—Ti nguydündäyich
jadayaabi cötujcin ajcxy maabi
iich nbi'c'atyich. ¿Ti jada
njacyajtigoy'ijtpyich?

²¹Chi Jesús jadüg'oc y'adzooy:

—Pen miich m'idam tudägy,
nicx tootigoyda' huidijaty miich
miid, etz mo' je meen je jäy ajcxy
huidijaty ayoob. Co jadu'n mdunipy,
chi mbaadipy oy'ajtin jiiby tzajpjoty.
Co jadu'n mdooctähuipy tijaty
miich miid, chi miinip jadüg'oc ma
iich nyajpaadyich, e pajamgich.

²²Co je yeeg'anäg jadu'n midooy,
chi ñicxni taj may com ooy anajty
chachcomeeñity.

²³Huin'it Jesús nimay je'
ydiscípulos ajcxy:

—Janch tiy'ajt jadu'n nej
nimaaygixy co ooy ymijhuinma'ñity
co tüg comeeñyjäy ytigihuipy
ma Dios y'ane'my jiiby tzajpjoty.

²⁴Jadüg'oc nmına'ñich co ooy
chipity co tüg comeeñyjäy tigihuipy
ma Dios y'ane'my, ñigi ca' chipity
co tüg camello ñaxipy ma tüg
xu'n'ijx yxutity.

²⁵Co Jesús ydiscípulos ajcxy jadu'n
midoy, chi ajcxy ooy jihuüy huinmay.
Chi ajcxy ñay'amidoohui miñ xyipy:

—¿Pin jëbi paady je' y'alma
nïdzoocin?

²⁶Chi Jesús ajcxy huindicxpejty
etz nimay:

—Je huidibi jäy ajcxy chipjihuiyb, miid Dios ca' ni ti chipity.

²⁷Huin'it Pedro ymina'n:

—Huindzin, iich ajcxy ti n'ixmajtztäyich tüg'óciy huidijaty anajty iich ajcxy nmiid etz nbanicx iich ajcxy miich. ¿E ti jada' iich ajcxy nbaadaamybich?

²⁸Chi Jesús y'adzooy:

—Janch tiy'ajt nmina'nich co anajty je xii je tiempo paady mina Dios yajtigajtztähuipy je tzajp etz naaxhuiñybi, co anajty iich, je jäy huidibi tzoon tzajpjoty, n'ityich ma ngötujctacich oybi jiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picipi Israeljäy ajcxy. ²⁹E tüg'óciy jäy ajcxy huidibi ti ixmajtztäy yjiin ytiic, y'uch ymigüg, y'ung ytöxyijc, y'ung y'anäg, ytaj yteedy, o ycam ytu' miid iich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰Mayjäy ajcxy huidibi cham ymiid mij'ajtin cötujcin, tzajpjoty ca' ajcxy miid'ada'n mij'ajtin cötujcin. E mayjäy huidibi cham ca' miidity ajcxy mij'ajtin cötujcin, tzajpjoty ymiid'adamy ajcxy mij'ajtin cötujcin.

Je naymiduniptijc y'ixpejt

20 Jadu'n Jesús ymina'n: —Je Dios y'ane'min jiiby tzajpjoty jadun nipaady nej tüg cogambi huidibi ooy mij cam miidity. Chi je cogam jopyni choñ ma oy nicxy ixtäy tumbidijc ajcxy

huidibi yajpidigipy yi uva cosecha.

²Chi ycapxytuñ miid nidüg nidüg ytumbi co mujuya'n tüg denario meen tüg xiibi. Chi quejxy nidüg nidüg ytumbi ma je uva cam. ³Chi petyxii je cogam ñicxy jadüg'oc tumbi ixtaayb. Chi paty cajp cujc nijējity tumbi huidibi ca' ti tung miidity. ⁴Chi je cogam je tumbi ajcxy nimay: “Ñicx miich ajcxy tuñ ma iich ngosecha. Cham nmujuyipy jadun nej ytiy'ajtity.” Chi ñicxy ajcxy midumbi. ⁵Chi je cogam ñicxy jadüg'oc cujcxii tumbi ixtaayb. Nañ jadun nicxy jadüg'oc minacyxii. ⁶Nañ tim jadun tzuu jadüg'oc je cogam ñicxy tumbi ixtaayb, chi paty nijējity cajpcujc huidibi ca' ti tung miidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷Chi je' ajcxy y'adzooy: “Je' co ca' iich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma iich nnaaxjot. Cham iya nmujuyipy jadun nej ypaadyii.” ⁸Co oy ycodziinyi, chi je huindzin nimay je huidibi nigop'ajtp je tung: “Ñicx mijhuoodäy je tumbidijc etz mujuyipy. Mujuy jayijp huidibi ti ymiin axam tumbi etz jim nicxy myajcogixiy ma huidibi anajty ti miin jayijp tumbi.” ⁹Chi ajcxy jayijp yajmujuy je tumbi ajcxy huidibi anajty ti ytiigi y tumbi axam. Chi yajmujuy ajcxy jadun nej anajty jäy ñaymujuyii je tüg xiibi. ¹⁰Co miin je tumbi ajcxy je huidibi ajcxy jayijp tigi y tumb. Chi ajcxy jot'ajti co jac'anaxy yajmujuya'n. Per quipxyjaty ajcxy paty tüg meen nidüg'óciy je tumbidijc. ¹¹E co

ajcxy quipxyjaty yajmujuy, chi ajcxy ytiigiij jotma'tpi. ¹²Chi ajcxy nimay je cam huindzin: "¿Na'amy co quipxyjaty iich ajcxy ti xymujuyich miid je huidibi ti miin aham tumbi? Yi' ajcxy tög jaxiğy ti ytuñ, e iich ajcxy tög xii je anbi ti ngöbicyich." ¹³Chi je cam huindzin y'adzooy, nimay nidügti je' ajcxy: "Miich, iich nmigüg, ca' iich jibic ti nduñich miid miich. ¿Nej ca' iich ajt ngapxytuunim co jadu'n nmujuya'n tög denario meeñi? ¹⁴Con yi mmeñ, e nicxni. Jadu'n ndzocyich co quipxyjaty nmujuya'nich miich miid huidibi ti ymiñ aham ma je tung. ¹⁵¿Nej ca' huaad iich nduñich miid iich nmeñ nej ndzócyichi? ¿O co xyajca'oy'ixyich, co iich ooy n'oyjäyity?" ¹⁶E huidibi ajcxy jaccogixiıyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixihuamb. May ooy yjayajhuoomiñ e hueeni huidi huin'jixipy.

**Jesús capxypidzimy
jadü'oc co y'öga'n**

¹⁷E co Jesús anajty ñicxy ma Jerusalén tü'aa, chi miid nicxy ahuingujc je nimajmetzpi ydiscípulos. Chi ajcxy nimay:

¹⁸—Jadu'n nej miich ajcxy m'ijxy mnejhuıy cham iich ajt nba'ttiigiıym jim Jerusalén. Jim Jerusalén iich, je jäy huidibi tzoon tzajpjoty, xyajciyegaamich je teedy mįjtungmiidpi etz escribas ajcxy. Nyajtiyduna'nich etz pidäga'n ajcxy ané'min co n'ögibich. ¹⁹E yi' ajcxy xyciyega'nich ma je huidibi ca' yjudiojäyity, jigix xyñixigibich xyajxigibich, xycoxipich, etz

xyajcruutzpedipich ajcxy. E co n'ögibich, chi njugypigipyich codugiig xii.

**Huidibi Jacobo etz Juan
ytaj ypijctzou**

²⁰Chi je Zebedeo ytöxyijc nimiiñ Jesús miid metz je ymang; Jacobo etz Juan. Huin'it je ungday huingojxtinay'ihuıy Jesús, pijctzoy may'ajt. ²¹Chi yajtiıy Jesús: —¿Ti mdzojcpy?

Chi je ungday y'adzooy:
—Tun may'ajt möhuıpy iich metzpi yi nmang yi jacmįjtung ma miich m'ane'min, jaydeb iñahuıpy ma miich mmıjc, tög a'oy'amy etz jadüg anajty'amy.

²²Chi Jesús y'adzooy:
—Miich ajcxy ca' mhuinjihuıy ti ajcxy mbįjctzooyb. ¿Nej mminaxa'n myajnaxa'n miich ajcxy je tzaachypi huidibi iich nminaxamy nyajnaxamyich? Jadu'n nej jihuıy m'üga'n ajcxy je ta'm nii huidibi iich n'ügamy e mbaada'n je niıbejtin huidibi iich nbadamyb.

Chi je' ajcxy y'adzooy:
—Jëbi.

²³Chi Jesús ymina'n:
—Janch tiy'ajt nej miich ajcxy mina'n co mminájxcıxıpy myajnájxcıxıpy je tzaachypi huidibi nnaxa'nich. Per ca' iich cötujcin nmiidıdyich co iich miich ajcxy nbidägıpy mįjtungmiid, co myajpaadip tög ma iich nmıjc a'oy'amy e jadüg anajty'amy. Hue' janchtiy Dios Teedy ymiid ni'ixi' pinjaty ti huin'ixy jaydeb yajnicxıpy je mįjtung ma iich n'ane'mdac.

²⁴Co je nimajcpi ydiscípulos ajcxy nejhuıy jadu'n nej Jacobo etz Juan

pijctzooy may'ajt ma Jesús, chi ajcxy ooy mijotma'ty Jacobo etz Juan.

²⁵Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuiy co yi jây ajcxy huidibi mijtungmiidpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt miid ma je maybi naax cajp, mic ajcxy ane'my je jây ajcxy. ²⁶Per miich ajcxy ca' mjadu'nity nej je mijtungmiidpi ma je maybi naax cajp. Pinjaty miich ajcxy je mij tung yajnicxip, copicy ñaybidägiyb nej tüg tumbi. ²⁷Pen ji miich ajcxy nidüg nigohuajc'ada'ñ, copicy ñaybidägiyb nej tüg tumbi. ²⁸Com iich nañ jadu'n, je jây huidibi tzoon tzajpjoty, ti nmiñich ya naaxhuiñ jaydëbi nbubedipyich yi mayjây ajcxy. E canan yi' ajcxy xypubedipich. Ngëyegaamyich njugy'ajtin ma yi o'cin miid je mayjây ycixpi, jaydëbi ngohua'nich jây ajcxy y'alma huidibi tigoyam.

Jesús yajtzoocy metz jay huintzpi

²⁹E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjây. ³⁰E jim anajty iñaay nimetz huintzpi tûba'áy. E co ajcxy nejhuiy co jim anajty ñaxy Jesús, chi ajcxy yaaxpi jojcpi:

—Huindzin, David y'ap y'oc, tun may'ajt iich pa'ayoog.

³¹Chi je mayjây ajcxy ojcooty je metzpi jây huintzpi, nimay ajcxy co huen amon. Per je huintzpi ñigi minan'idich:

—Huindzin, David y'ap y'oc, tun may'ajt iich pa'ayoog.

³²Huin'it Jesús ytinayxijp, e yminañ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich miid miich?

³³Chi ajcxy ñimaayi:

—Huindzin, ndzojcpyich co xyajhuindicxiibich.

³⁴Huin'it Jesús pa'ayoogoty ajcxy. Chi ajcxy ñidoni ma je' yhuin, e mic'amy je huintzpi ajcxy y'ijxigy. Chi Jesús ajcxy panicxy.

Jesús ytigiiy jim Jerusalén

21 E co anajty Jesús etz je mayjây ajcxy ti mihuingoni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ²Chi ajcxy nimay:

—Ñicxcix ma je cajp huidibi jim'amy. E jim tüg burro ycoxochity miid y'ung. Coguejttdip ajcxy je burro e yajmiingix ya ma iich. ³E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴Jadayaabi oy jadu'n ytuñyi yjadyi ycixy yca'pxy jadu'n nej je profeta jecyip jaay, co jadu'n yminañ:

⁵Yajnima' je jây ajcxy huidibi tzinaayb jim Sión (Jerusalén), oc'ijxcix, chi miñ ajcxy je mrey, yung nax yjot yhuinma'ñ miidity je mrey, etz burrocíxy miñ. Ma tüg burro mang huidibi ytaj tziy yajjöyp.

⁶Chi je metz ydiscípulos ajcxy cuyduñ nej anajty Jesús ti y'ane'myii. ⁷Yajja'ty ajcxy je burro

miid ymang. Chi Jesús ydiscípulos ajcxy jiibe'n je metzpi burro miid ajcxy yjocxhuit, chi Jesús yaj'iñay je burro mang. ⁸E je mayjāy ooy yajhuinyēbiy ajcxy je tū'aa miid yhuit, chi ajcxy oy ypuxy quipy y'aacx. Chi ajcxy pidacy ma je tū'aa. ⁹E jim ñajxy je burro, e je mayjāy huidibi nicxp jayijp, e nañ jadu'n huidibi anajty mimb axam, ooy ajcxy ytigiiy huambi jihuiyb, chach minangixy:

—iHosana! iGloria a Dios! iOoy ycōmayity Dios! Huen capxpaady idipy jada yēdyjc huidibi mimb ma yi nHuindzin Dios yxii etz miid ymic'ajt. iGloria a Dios!

¹⁰Co Jesús ytigiiy jim Jerusalén, chi tūg'óciy je mayjāy huinmay'ahuidijty, chi ñay'amidóohuigixy miñ xyipy:

—¿Pin yi' yijibi jāy?

¹¹Chi mayjāy y'adzooy:

—Yi' je' je profeta Jesús huidibi tzoon ma Nazaret cajn ma Galilea it.

¹²Huin'it Jesús ytigiiy ma Dios ytiyc. Chi ixquejxtay tūg'óciy je ajuybi adoocpi huidibi anajty yajpatp jiiby. Chi tijhuimbijttay tūg'óciy je mesa ma anajty jāy jim ymeenhuingogongixy, etz nañ jadu'n tijhuimbijttay je muuxytoocpi ñaybejt. ¹³Chi jadu'n nimay ajcxy:

—Jaaybety jadu'n ymiiñ ma Dios ñecy: “ñich ndijc je' yi' ma jāy ajcxy Dios mibijctzoy”, per miich ajcxy hue' yi' mhua'n meetzpi tiyc.

¹⁴E co anajty jiiby tzajptigoty Jesús, chi jiiby ñimiini huidijaty anajty huintz, huidijaty anajty cīma'ty tecyma'ty, chi Jesús ajtzoocay. ¹⁵Per je teedy ajcxy

huidibi mījtungmiid etz je escribas ajcxy ooy mījotma'ty Jesús co ajcxy ijxy nejhuuiy jadu'n nej Jesús anajty tuñ mījhuinma'n. Etz nañ jadu'n ajcxy ijxy co je pi'c'anāg anajty ajcxy yhuaangixy yjihuiygixy jiiby tzajptigoty, ymīnaangixy: “iHuen cōmay'idipy je rey David y'ap y'oc!”

¹⁶Chi je teedy etz escribas ajcxy Jesús nimay:

—¿Nej ca' miich mmidooy nej je pi'c'anāg chach minangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymīna'ñyi?:

Ti may'ixpicy iiy ma je pi'ctiyc ma'xungdijc jaydēbi ajcxy iibaadip capxpaadip Dios.

¹⁷Chi Jesús ycapxycijxy miid je teedy etz escribas ajcxy etz choon jiiby tzajptigoty. Chi ñicxy ma Betania cajn, e jim yajnajxy je tzumbi.

Jesús capxpojcy je higueri ca'p anajty ytiim'aty

¹⁸E co yxiimiy ytiicxgy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹E jim ijxy ma tūba' tūg cop je higueri quipy. Chi ninicxy. Chi pāt'ijxy, per ca' anajty ni tūg ytiim, jēda'ajty je' y'aay. Chi Jesús nimay je higueri quipy:

—iNi ca minaa xii mdiim'adipy!

E mic mīciyi je higueri quipy ytiich. ²⁰E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti ytiich?

²¹Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy miid je mibijcin, etz ca' ajcxy mmibicy aametz jotmetz, jëbi mijhuinma'n mdungixy nej iich ti nduñich. E nañ jadu'n jëbi jac mijpi mijhuinma'n mdunipy ajcxy. Jëbi ajcxy tun cop mnimäy: “Quëg ya, tigi' mejyjoty” e xycapxymidohuipy ajcxy je tun je cop. ²²E tüg'óciy tijaty miich ajcxy mbijctzooyb huen ytimytijyity, pen mmibijcp ajcxy, mbaadip ajcxy.

Jesús ycótújcín

²³Co Jesús yja'ty Jerusalén, chi ytigiiy jadüg'oc ma Dios ytijc. E jiiby anajty yaj'ixpicy je mayjäy, chi ñimiini je teedy mijtungmiidpi etz judío mijjäydijc ajcxy. Chi ajcxy y'amidoohui:

—¿Ma cötujcin ti mbaady co jadu'n mduñ tzajtigoty? ¿Pin jada cötujcin ti xymöy?

²⁴Chi Jesús y'adzooy:

—Nañ jadu'n iich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it iich miich ajcxy nyajnimähuipy ti cötujcin iich miid nduñ huidijaty.

²⁵¿Pin quejxy je Juan, je Bautista, yajniibejtpi, Dios o jäy ajcxy?

Chi ajcxy ñayñimáayigixy miñ xyipy:

—Co ixypipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶Per nañ jadu'n ca' huaad nminaanim co jäy ajcxy yajniibijcy Juan, com nejhuiyim co yi mayjäy mibijccixy co je' anajty Dios tüg y'ayucnajtzcaxiibi.

²⁷E paady ajcxy jadu'n adzooy Jesús:

—Ca' iich ajcxy nejhuiygixy.

Huin'it Jesús yminañ:

—Nañ jadu'n iich ca' nigapxa'ñich pin je' ycötujcin miid nduñich huidijaty.

Je metzpi ung ijxpejt

²⁸Chi Jesús yminañ:

—¿Nej m'oc'ixy m'ocjaygugi' jadayaabi ixpejt? Tüg je yëydijc ymiid anajty metz je' ymang. Chi nimay je mijpi: “Nícx cham m'octuñ ma iich n'uva cam.”

²⁹Huin'it je' ymang y'adzoohui: “¡Ca' nnicxa'ñich!” Chi jaccohueñiyi je' ymang yhuinmaydigajch, chi ñicxy tumbi. ³⁰Chi je ungdeedy oy ixy je ymang mutzpi. Chi nañ jadu'n nimaay co huen nicxy tuñ. Chi je' ymang mutzpi y'adzooy: “Oy, cham nícxibich.” Per ca' ñicxy.

³¹¿Huidi je' nidügti ycuyduuñ nej anajty yteedy tzocy?

Chi ajcxy yminañ:

—Je' ymang mijpi huidibi jayijp nimay.

Huin'it Jesús nimay ajcxy:

—Janch tiy'ajt jadu'n nej nimaaygixy co je huidibi ajcxy yajcogüejtpi etz je töxyjäy ajcxy huidibi tundigooyb miid yëydijc, je' ajcxy tigihuamb jayijp ma Dios y'ane'my jiiby tzajpjoty, ca'ydí miich ajcxy.

³²Paady ycixpi oy ymiin je Juan huidibi jäy ajcxy yajniibejt, Juan yajni'ixiiygixy je mayjäy nej ajcxy jëbi yjothuimbidipy ma Dios. E miich ajcxy ca' mibijcy jadu'n nej Juan yminañ. Per je' ajcxy huidibi yajcogüejtpi etz je

töxyjäydijc huidibi tundigooyb miid yëydijctijc, ymibijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' mibigaangixy.

**Je naymiduuniptijc
jibicjäybi ajcxy y'ijxpejt**

³³Chi Jesús yminañ:

—Oc'amidoo'ijtcix jadayaabi ijxpejt. Ji anajty tüg je huidibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiïy ma anajty jëbi je uvas ñii yajnigidägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiyday, chi je cogam yejcy pijctzoy je ycam ma je jäy ajcxy huidibi naymidunaanip. Chi oy chooni je cogam nicxy viaje tumbi.

³⁴Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyïi je huidibi yi' paadaanip.

³⁵Per je jäy huidibi anajty ti naax pijctzoy, chi ajcxy majch je tumbi. Chi ajcxy ooy huinhuoipy jiphuoipy tüg. Chi ajcxy huingäch jipcäch jadüg. Chi ajcxy je midugiigpi yaj'o'cy. ³⁶Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷Chi yci'm'ung oy quejx cogixiïyñi. Hue' jot'ajti co yajmij'adiïyb je' y'ung. ³⁸Per co ajcxy je tumbidijc ijxpaty je cogam je' y'ung, chi ajcxy ñaygapxi:

“Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy.

E co ajt nyaj'o'cim, chi iich ajt nmihui'mim je cam.” ³⁹Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰Huin'it Jesús yminañ:

—Co anajty ti miiñ je conaax je cogam, çti jada' y'octunipy miid je tumbidijc ajcxy?

⁴¹Chi je teedytijc etz mijjäydijc y'adzooy:

—Je cogam yaj'ögipy yijiibi jibicjäydijc, ca' ajcxy pa'ayoohipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴²Chi Jesús yminañ:

—¿Nej ca'ni miich ajcxy mgapxy ma miiñ jaaybety ma Dios ñecyi? Jadu'n yminañ:

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ijxim yi' ytung.

⁴³E paady jadu'n iich miich ajcxy nimäy co miich ajcxy myajpiga'ñ yi m'it mlugar jiiby tzajpjoty ma Dios y'ane'my etz yajmöhua'ñ je huingbi jäy je huidibi amuumdügjot naygiyejcip ma Dios. ⁴⁴Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuïy jim ycixciday ma je tzaa nïcx, tijhuidz yjajtähuipy. O pen je mij'ane'mbi midziptzoñ je jäy, chi ytigoydähuipy ajcxy, tim jadu'n nej jihuïy je tzaa ñigidaagoodyïi ajcxy, e janch jaam püx nicxy yjaty.

⁴⁵Co ajcxy midooy, chi je teedytije etz je fariseostije huiñihuii co y'i' ajcxy yajñigapxyp, ⁴⁶chi Jesús ajcxy jamadzaañ. Per tzigiiyb anajty ajcxy miid je mayjäy, je' co je mayjäy anajty mibijccixy co Jesús najtzcaxhiyb Dios ytiy'ajt.

Je iixpejt ma jäy anajty pijcpidijc nixiiduñ

22 Chi Jesús jadüg'oc ytigiiy capxp miid iixpejt, yminañ jadu'n:

²—Je Dios y'ane'min jadu'n nipaady nej je rey ymang ocnixiiduñ co ti ypicy. ³Chi je rey quejxhuäxtay je ytumbi co huen nicxy huoomujctaaygixy je huidijaty anajty ti yaj'nimaaygixy co mingixipy ma ytuna'ñyii yjada'ñyii je pijcin. Per ca' je' ajcxy ymiina'ñ ma je pijcin nixiiduñ. ⁴Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nixxpi nyaj'ögyich. E ni'ixi' ijtaayñi, huen miñ ajcxy ma je pijcin ytuna'ñyii yjada'ñyii.” ⁵E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijējity ajcxy ñicxy ma ytundac. Nijējity ajcxy ñicxy tooop yejcp; ⁶e nijējity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy etz ytoydañhiip je ycajp. ⁸Chi je rey nimay je ytumbi ajcxy: “Ni'ixi' ijtäy ma jadayaabi je pijcin yajñixiíduna'ñ. Per je huidibi ajcxy

ti yajñimäy ca' ajcxy mihuaadity co ymingixipy. ⁹Nicx miich ajcxy majaty jäy yjiin ytiyc. Nimaaygixy tüg'öciy pinjaty ajcxy mbaty, co huen miingixy ma je pijcpi.” ¹⁰Chi ñicxy je rey ytumbi ajcxy. Chi ajcxy miidmiinday je mayjäy, je oyjäybi etz je jibicjäybi. Chi y'ujtztay je rey ytiyc miid je mayjäy. ¹¹Huin'it je rey ytigiiy mayjäyjoty, ixa'ñ anajty huidijaty ti yajhuomiñ. E jiiby tüg yëydijc ti iixpaty huidibi ca' anajty ti ñayxoxyii, jadu'n nej jäy nayxóxigixy co ajcxy nicxy ma tüg pijcin. ¹²Huin'it je rey minañ: “Migüg, ¿nej ya ti mdigiy tigoty, e ca' mxojx miidity nej ypaadyii?” E je yëydijc amoñyi je' yhui'my. ¹³Chi je rey nimay huidibi anajty jim pubejtp: “Cixotz tecyxotz jada yëydijc etz pidäg agootztuuby. E jiiby yjihuipy yäxipy, jiiby ytiitz huiñqueedip miid jotmay.” ¹⁴Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüeجتin ñimiydägy

¹⁵Je huin'it tiempo je fariseos ajcxy tuñ quipxycapxy co anajty xihuaangixy nihuambedaangixy Jesús. ¹⁶E jadu'n ajcxy quejxy ma Jesús yajpaady naagity huidibi minixpejt je fariseos ajcxy ytiy'ajt etz naagity huidibi mijñixpejt je Herodes ytiy'ajt. Chi ajcxy Jesús nimay:

—Huindzin, nejhuiyibich iich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ miid comeñyjäy etz

miid ayoobtijc, ca' huin'ixpety myaj'ixpicy. ¹⁷Nejhuñhuamy iich ajcxy nej miich mina'n pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸Per Jesús ñejhuiyb anajty ajcxy yjibic-huinma'n, e chi ajcxy ñimay:

—Ooy miich ajcxy

naybidáacigixy nej jihuñy ooy mdudägyity, e ca' yjanchity.

¿Na'amy co ajcxy xychachjot'ixy xychachhuinma'n'ixyich?

¹⁹Yaj'ijxcich tüg meen huidi miid migüéjtigixy César.

Chi ajcxy mimiiñ tüg meen. ²⁰Chi co Jesús y'ijxy je meen, chi yajtiy:

—¿Pin y'ahuinax e pin yxii cixjaay ma jada meen?

²¹Chi ajcxy y'adzooy:

—Je romano mij'ane'mbi y'ahuinax etz yi' yxii.

Huin'it Jesús je' ajcxy ñimay:

—Mo' je César huidibi yi' yjè'ajtpy, etz mo' Dios huidibi Dios yjè'ajtpy.

²²E co ajcxy jadu'n midooy, chi ajcxy ooy jihuñy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³Je huin'it xii je saduceos ajcxy oy ixxy Jesús. Yi' ajcxy ymina'n co ca' yjugypiga'n je öcpi ajcxy. E jadu'n ajcxy huinma'n pidägy, e yminaangixy:

²⁴—Huindzin, jadu'n miiñ ma Moisés ycötújcin co je yëydijc huidibi ypijychinaayb miid ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy miid je yëydijc ymiguëx. ²⁵Pues

jii ma iich ajcxy anajty tüg quëx je yëydijc nihiuxtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch miid je töxyjäy. ²⁶Nañ jadu'n je mimetzpi yëydijc ix'o'cy ytöxyijc. Nañ jadu'n je midugiigpi yëydijc ix'o'cy ytöxyijc. E jadu'n oytuñyii yjadyii miid je töxyjäy co ti anajty miiddzinay'abidzimdäy je nihiuxtujcpi yëydijc tüg quëxpí. E je nihiuxtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷Chi nañ jadu'n oy y'öcni je töxyjäy. ²⁸E co anajty xii tiempo paty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihiuxtujcpi miiddzinay'abidzimigixy.

²⁹Chi Jesús je' ajcxy y'adzooy:

—Miich ajcxy ca' mhuinjihuñy je tiy'ajt, com ca' mnejhuñyigixy Dios y'ayuc ytiy'ajt, e com ni ca' mnejhuñyigixy je mic'ajt huidibi Dios ymiid. ³⁰Pues co anajty yjugypijccixy je jäy tiibi y'öccixy, chi ca' ajcxy ypiga'n, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹Per je tiy'ajt co jäy ajcxy tiibi y'öccixy yjucypigaangixy jadüg'oc, jëbi mbaatcixy jada tiy'ajt ma Dios ñecy. Dios ci'm jadu'n minañ: ³²“Iich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypi ajcxy.

³³E co je mayjäy jadu'n midooy, chi ajcxy ooy tzachjihuiy tzachhuinmaay je Jesús y'ixpijcin.

Je ane'min huidibi ooy ycopicyity

³⁴E co je fariseos ajcxy nejhuiy co Jesús anajty ti yaj'amoñyi je saduceos ajcxy, chi ajcxy ñayyömujectaayi. ³⁵E jim anajty tüg leyhuindzin huidibi Jesús anajty jot'ijxyp huinma'n'ijxyp, chi y'amidooy:

³⁶—Huindzin, ¿ma yi maybi Dios ycötujcin, huidibi y' jaccopicyip?

³⁷Chi Jesús y'adzooy:

—Tzoc jihui' etz yajmij'at nHuindzin'ajtim Dios miid tüg'óciy m'aa mjet, etz miid tüg'óciy m'alma, etz miid tüg'óciy mhuinma'n.

³⁸Jada je' jadu'n je Dios ycötujcin huidibi jaccopicyip, etz huidibi tim jayijpip. ³⁹Je mimetzpi Dios ycötujcin jahueengi tú'ciy ñaybadyi miid je jayijpi, y' huidibi jadu'n minamb: “Tzojccix jihuiygix yi mmigügtijc, tim jadu'n nej mnaychogyi nayjihuiyi ci'm.”

⁴⁰Jada Dios metzpi ycötujcin jaccopicy jacmic'ajt miid ca' jac huidibi cötujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹E ma anajty jim tügmucy yjac'ijtcixy je fariseos, huin'it Jesús yajtiy:

⁴²—¿Nej miich ajcxy huinmay miid Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³Chi Jesús ajcxy nimay:

—¿Na'amy co David anajty ti ymina'n co Cristo hue' je' y'!

yhuindzin? Jadu'n ti capxy David anajty miid je Dios yjihui'n ymic'ajt, ymina'n:

⁴⁴Je Huindzin Dios nimay iich nHuindzin: “Íña' ma iich n'a'oy'amy, ixti cooni iich miich nyajmimadägip ma je mmidzip ajcxy.”

⁴⁵¿Nej jēbi David ymij'ap'adyi je Cristo? Com David ci'm ymina'n co Cristo y' je' yhuindzin.

⁴⁶E nitüg'aa ajcxy yca'adzohuimbijty. E jadu'n nej je xii tiempo yjacnix anajty ca' ni pin ocjacyajtiyñi huidijaty ayuc.

Jesús xiy ajcxy je fariseos etz escribas

23 Chi Jesús nimay je mayjäy etz y' ydiscipulos ajcxy:

²—Je escribas etz je fariseos ajcxy chachnaygömaayigixy co y' ajcxy jajtp nej capxti'cxipy je cötujcin huidibi Moisés yjaay jecy'ajty. ³Oy co ajcxy mguydunipy jadu'n nej y' ajcxy xyaj'ixpijccixy Dios y'ayuc, capxymidoogix nej xyñimaayigixy per ca' mdungixy huidibi y' ajcxy ytumb, com y' ajcxy oy ycapxcixy e ca' ajcxy cuydungixy. ⁴Yi' ajcxy nigo yajcojciy canaag costumbre huidi je jäy ajcxy ca' mimadäga'n, e ca' ajcxy pa'ayoy je jäy, tim jadu'n nipaady nej jihuiy tüg tziy ti mooygixy jemxypi huidibi ca' je jäy ajcxy mimadäga'n, e yi escribas etz fariseos ajcxy ni ca' ycihuax yajpaadaangixy je tziy. ⁵Tüg'óciy huidi y' ajcxy ytumyb, je' ajcxy ytumyb co huen jäy ajcxy ixyii, jaydēbi yajcōmay ajcxy. Yi' ajcxy yajhuimboc-huiñfiygixy etz ñayyajcihuiñfiygixy Dios y'ayuc.

Nayxojxcixy miid huit yooñjatypi co chachcōmayaangixy. ⁶Ooy ajcxy tzocy iñaybejt ma je' iñāy je ane'mbi ma jāy ajcxy yxiiduñ. Ooy ajcxy tzocy yi cōdumbi iñaybejt ma je naymujctac. ⁷Yi escribas etz fariseos ajcxy oy tzojccixy co ajcxy yajcapxpooocxip huindzigi'n'amy mayjāyduum. Etz nañ jadu'n ajcxy tzocy co jāy ajcxy yajmij'adiiyyb nej huindzindijc ixpicytjic. ⁸Miich ajcxy ca' jadu'n m'a'ixihuipy co ajcxy xytijipy huindzin com nidüg'óciy miich ajcxy mnaymigüg'ájtigixy, etz tūgpajc je' huidibi miich ajcxy mhuindzin'ajtpy y' je' Cristo. ⁹E nañ jadu'n miich ajcxy ya naaxhuiñ, ca' oy ni pin mdeedy'adiiyyb co miid miich ajcxy tūgpajc je mDeedy, huidibi jiiby tzajpjoty. ¹⁰E nañ ni mganaydijiiyyb ajcxy mij ane'mbi, com yi Cristo je' tūgpajc miich ajcxy mmij'ane'mbi. ¹¹Je pin jaccapxymidoob ymigügtjic, je' je' mij'ajtin miid ma miich ajcxy. ¹²Pinjaty huidibi ci'm naygōmayip, tzoýdu'nbaadip je', e pinjaty naybidaacip nicy xeemy, je' je' capxpaady y'idipy.

¹³iAy miich ayoob ajcxy fariseos etz escribas ajcxy! Miich ajcxy mnaybidáacigixy nej jihuüy ooy mdudägyjāy, e ca' yjanchity. Miich ajcxy mgoyüchpy je Dios ytiy'ajtin nej huaad jāy ajcxy ytigiy jiiby tzajpjoty ma Dios y'ane'my. Ni miich ajcxy mgatigiyygixy, e nañ ni mga'a'ixiyygixy co huingbi ytigihuip.

¹⁴iAy miich ayoob ajcxy fariseos etz escribas ajcxy! iMiich ajcxy m'aaniidacp! Miich ajcxy myajcijxtaayi yi

co'ögy ytöxyjāy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nūgi chaachytunip miich ajcxy miid mbocy ycixpi, ca'ydi jac pin jāy.

¹⁵iAy miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'n je m'ixpijcin ma je tūgpi jāy. E co ajcxy je' myajmibicy, huin'it mejtz jadu'nñyi je pocy anajty miidity je jāy, ca'ydi miich ajcxy.

¹⁶iAy miich ayoob ajcxy huidibi jadu'n idiitzp nej tügi huintzpi huinhuoy! Miich ajcxy minamb co pen tūg jāy tuñ yhuandaacin, e iibaati capxpaati Dios ytiyc, chi ca' cuyduñ je huandaacin. Per pen iibatpy capxpatpy je oori huidibi jiiby ma Dios ytiyc, huin'it janchtiy cuyduñ je huandaacin. ¹⁷Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytiyc ma je oori yoxy ity?

¹⁸Nañ jadu'n miich ajcxy mina'n: "Pen tūg jāy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigi'n' tüzich ma je altar ma Dios yajhuindzigiy, chi cuyduñ yhuandaacin." ¹⁹iTzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymiid je huidibi ti yajyoxo o je altar? ²⁰Pinjaty capxpatp je Dios ytiyc ma Dios yajhuindzigiy y'agapxmuctaayb anajty huidijaty jiiby yajpaatp ma Dios yajhuindzigiy. ²¹Pinjaty capxpatp je

Dios ytiyc, ca' anajty jëyi capxpaady
Dios ytiyc, nañ ycapxpatp anajty
Dios huidibi jiiby tzinaayb.

²²Pinjaty capxpatp je tzajp, nañ
capxpatp anajty Dios y'ane'mdac
quipxyi miid Dios huidi tzinaayb
jiiby.

²³iAy miich ayoob ajcxy
fariseos etz escribas ajcxy,
huidi naybidaacip tudägy, e ca'
yjanchity! Miich ajcxy mooyb
Dios je tügpicy je majcpi huidibi
je' paatip, ixti yi tzajnimang, yi
ruda etz je pi'c'ujtz'ay ung. Per
ca' ajcxy mduñcuenti je cõtujcin
huidibi jaccopicity. Miich ajcxy
ca' mdzinäy tiydudägy miid
je migügtijc. Miich ajcxy ca'
mmiidity pa'ayo'n miid je' ajcxy
huidibi ayoob jottigooyb, etz ca'
mmibijccixy Dios. Jada ixypy ajcxy
mbaadumyb, e mooygixy Dios
je tügpicy je majcpi. ²⁴iTzuudijc
locitijc! Miich ajcxy ti m'anajxyp je
uux, e mgojiinnaaxcixy je camello,
je mijpi iyujc.

²⁵iAy miich ayoob ajcxy
fariseos etz escribas ajcxy, miich
ajcxy naybidaacip nej tudägy
jäy, e ca' yjanchity! Jiiby jotjoty
huinma'ñyjoty miich ajcxy miidity
jibicpi. Miich ajcxy miid je
ca'oy'ixii etz je adzojcin. Tim jadu'n
nipaady nej jihuüi myajhuächpy
ajcxy yi tasi ninicx yi texty ninicx,
e chi myajhui'my jibicpi ma tasijot
ma textyot. ²⁶iTzuudijc miich ajcxy!
Jayijp yajhuädz jiiby jotjoty texty
tasi, huin'it hui'm nañ jadu'n huädz
nigix'amy.

²⁷iAy miich ayoob ajcxy fariseos
etz escribas ajcxy, miich ajcxy
naybidaacip nej tudägy jäy, e

ca' yjanchity! Jadu'n miich ajcxy
nipaady nej öcpi jut. Je öcpi jut
nigix janch oy yquëxigy, per jiiby
jutjoty ujtz jiiby miid je öcpi pajc
etz miid jibicpi. ²⁸Jadu'n ajcxy
mguëxigy mayjäyduum nej jihuüi
ooy m'oyjäyity, per jiiby jotjoty
miid jibic-huinma'ñ.

²⁹iAy miich ayoob ajcxy
fariseos etz escribas ajcxy, miich
ajcxy naybidaacip nej tudägy
jäy, e ca' yjanchity! Miich ajcxy
mgo'abotzcxixy yajxon je öcpi
jut ma profeta ajcxy ñaaxtigiiy,
etz mxoxy ajcxy miid je pijy ma
ñaaxtigiiy je tudägy jäy ajcxy,
³⁰e miich ajcxy nayñimaayigixy
miñ xyipy: "Co ixypy anajty
n'octzinaayim jecy'ajty ca'
ngapubejtim co ajt nmij'ap
nmijteedy yaj'ögy je profetas
ajcxy etz je tudägy jäy ajcxy."
³¹Miid jada ycixpi miich ajcxy
nejhuüiyb co miich ajcxy m'ap'adyii
mdeedy'adyii je jibicjäydijc
ajcxy huidibi yaj'öc je profetas.
³²iMiich ajcxy yajcñjxcixy je jibicpi
huidibi ajcxy mmij'ap mmijteedy
yajtzondac!

³³iJadu'n miich ajcxy nipaady
nej mayxoox! Ca' miich ajcxy
madägipy cöguëgipy je tzaachypy
jiiby ayoodactuuby. ³⁴E paady
nguexaamybich ma miich ajcxy
profetas etz huidibi ixpicyp
ma Dios y'ayuc, etz huidibi
xyaj'ixpigamb ajcxy yi Dios ñecy.
Per miich ajcxy myaj'ögamyb
myajcruutzpedamyb nijëjity, etz
nijëjity mgoxamyb mhuobamyb
ajcxy jiiby tzajtigoty etz
m'ixhuidida'ñ mbahuidida'ñ
ajcxy cajp cajp. ³⁵Je mijpocy

xyñigidaccoda'n miich ajcxy,
jadu'n nej je oyjäy ñi'py temy
yojcy jecy'ajty, oga'n chondacy
miid je oyjäy Abel etz ycogixiy
miid Zacarías, je Berequías y'ung
huidibi miich ajcxy mmij'ap
mmijteedy myaj'o'c jiiby tzajtigoty
ma altar. ³⁶Janch tiy'ajt jadu'n
nej nimaaygixy co je mijpocy
ñigidaccoda'n je jäy ajcxy huidibi
tzinaayb jadachambi tiempo.

**Jesús yäxy miid Jerusalén
cajp ycixpi**

³⁷iMiich ajcxy Jerusalén jäy!
iMiich ajcxy Jerusalén jäy!
Jerusalén jäy huidibi jecy'ajty
yaj'ögy je profetitjic etz ycögächpy
ajcxy je Dios ycogapxy. Canaag'oc ti
njayajtügmujectähua'ñich miich ajcxy,
jadu'n nej tzeydaj yajtügmujectäy
je' y'ung ma yqueec päť, per miich
ca' m'a'ixiigixy. ³⁸Oc'ix miich
ajcxy nej mdijc abac yhui'maangixy.
³⁹Janch tiy'ajt jadu'n nej nimaaygixy
co camina miich ajcxy xy'ixipyich
jadüg'oc, ixti cooni paadipy je xii
je tiempo co jäy ajcxy ymina'nipy:
“Cömay yi huidibi miimb miid
nhuindzin Dios yxii etz ymic'ajt.”

**Jesús ymina'n co Dios
ytijc yhuindigoyipy**

24 Ma anajty Jesús ti
ypidzimni ma Dios
ytijc, nicxp anajty, huin'it Jesús
ydiscípulos ajcxy ñimijhuäci. Yi'
ajcxy anajty yaj'ixiydähuamyb
je Dios ytijc, com ooy anajty
chachmijtijcity.

²Chi Jesús yminañ:

—Huindicx miich ajcxy jada
maybi mijjaty ytijc. Miinipy xii

tiempo mina tüg'óciy jada tijc nicxy
yhui'my taj xit, ca' ma tzaamacxy.
Huindigoydähuipy tüg'óciy.

**Je tiy'ajt ma ca'ni naaxhuiñybi
ycixa'ñyi ytigoya'ñyi**

³Chi oy ñicxni ajcxy ma Olivos
cögop. E co anajty jim, Jesús y'iñäy,
chi ñimaayi ameech je' ydiscípulos
ajcxy:

—Hich ajcxy nejhuihuamyb mina
jëdu'n ytuna'ñyii yjada'ñyii. ¿Ti
je' quëxigamb co anajty miich
mhuimbida'n ya naaxhuiñ, e co
anajty je naaxhuiñybi ytigoya'ñ?

⁴Chi Jesús nimay ajcxy:

—Mnaygüend'adiib ajcxy, ca'ydi
pin xyhuin'iingixy. ⁵Ooy mayjäy
ñaybidägáanigixy miid iich nxii,
naybidägáanigixy co je' ajcxy je
Cristo, ymina'na'n ajcxy: “Hich
je' je Cristo.” ⁶Co miich ajcxy
ayuc midohuipy co jäy ajcxy
chachtziptungixy ñayñibidigixy
xi ya, chi ca' ajcxy mdzigíygixip,
com ooy ycopicyity co jadu'n jayijp
ytuniyb yjadiyb. Ca' nan hue'
je' anajty tim cijxp tim tigooyb
je xii je tiempo. ⁷Nayñibidigiiib
naax cajp miid huingbi naax
huingbi cajp, e gobierno miid
huingbi gobierno. E miinip mic'ujx
canaag'it etz mij yuu etz mij
pa'm xi ya. ⁸Jada tzaachypi ayo'n
oga'ni anajty chondägy huidibi
nminaxaanim nyajnaxaanim.
⁹Huin'it xii huin'it tiempo
miich ajcxy myajciyegipy, jigix
xychaachytúngixipy e xyaj'ögixipy.
E tüg'óciy je maynaaxhuiñyjäy
xyca'ixáangixipy, miid iich nxii
ycixpi. ¹⁰Je huin'it tiempo may je
jäy ajcxy yajtigoya'ñ ymibijcin. E

nañ jadu'n ñayca'oy'ixáanigixy
etz ñayñigapxáanigixy
ñi'ojihuáanigixy miñ xyipy. ¹¹Ooy
may quëxigaangixy aaniidaacpidijc
mina'naangixy co Dios y'ayuc
ytiy' ajt nimiydaci, e mayjáy oy
huin'iinaangixy. ¹²E je' co ajcxy
xii jímijt ñajtnñicxiyñi jac tím
nigi jibicpi tunaangixy, ca' ajcxy
y'ocnaychócinipy miñ xyipy.
¹³Per pinjaty tiydudágy panicxp
je mibijcin, je' ajcxy ypaadip
y'alma nidoocin. ¹⁴Copicy co
jayijp yajcapxhuäcxa'n huindu'nybi
naaxhuiñybi Dios y'ayuc ytiy'ajt
jemybi, jaydëbi jáy ajcxy nidüg'ociy
nejhuüy Dios ytiy'ajt. Huin'it je
naaxhuiñybi yciyxni ytiagooyñi.

¹⁵⁻¹⁶Je profeta Daniel jaay
jey'ajty jada ayuc (miich
ajcxy pinjaty capx jada necy
huinjihuüyigixy) ma minañ: Miich
ajcxy co m'ixy pinjaty jibic-
huinma'n tumb nej ca' ypadyii ma
Dios ytiyc, huidibi ooy ycodzigijty,
chi miich ajcxy huidibi tzinaayb
jim Judea, co jadu'n m'ijxcixy, chi
nicx mgueectzóocixipy mic'amy
ma tungop. ¹⁷Pinjaty huidibi
yajpatp ma ytiycnicx ca' nicxy tijaty
yajpidzimy ma ytiyc. ¹⁸Yi jáy ajcxy
huidibi yajpatp camjoty, ca' ajcxy
huimbidipy co yajpidzimipy tijaty
ma ytiyc. ¹⁹Huin'it tiempo ayo'n
ypadamy je töxyjáy ajcxy huidibi
anajty y'ungdzim'ijty, e nañ jadu'n je'
ajcxy huidibi miid y'ungma'xung.

²⁰May'ajt ajcxy mbijctzoohuipy
yi Dios co jada jadu'mbi ayo'n
ca' ytuniyib yjadiyib ma anajty
ytiichtiempojoyty, etz ma anajty
pocxinxijoty. ²¹Huin'it oy ayo'n
jotmay ytuna'nyii yjada'nyii huidibi

nicamina ycatuñyii ycajadyiini
mabi naaxhuiñybi chondágy e
nicamina jadu'n ycajactuniyib
ycajacjadiyib. ²²Pen ca' Dios
capx'aduga'n yijiibi ayo'n xii ayo'n
tiempo, ni pin ca' chögipy. Per
Dios ycapx'adugamy yijiibi ayo'n
tiempo miid je mibijcpidijc yciixpi
huidibi Dios ti huin'ixy. ²³Co yi
jadu'mbi xii tiempo anajty ymiñ,
ca' mmibjccixipy, pen ji pinjaty
xyñimaaygixy: "Ijxcix, cha yajpaady
je Cristo", o "Jim'amy yajpaady
je Cristo." Ca' mmibjccixipy.

²⁴Pues miinip jáy ajcxy huidibi
huin'iinaangixy ymigügtijc. Ci'm
ñayyajnaxáanigixy jadu'n nej jihuüy
je' yCristity, e ymináangixipy co
capxhuäcxy ajcxy Dios y'ayuc,
e ca' yjanchity. Ytunip ajcxy
mijhuinma'n etz mijpi ijxpejt, ixti
jëbi jahuin'ingixip je mayjáy
huidibi Dios ti yhuin'ixyii. Per ca'
Dios a'ixihuipy co yhuin'iiniyib y'
yjáy. ²⁵Ti iich yi' jayijpni nigapxich.
²⁶E co pinjaty ajcxy xyñimähuipy:

"Chim je' je Cristo mijtigidumb",
ca' ajcxy mninicxip. O co pinjaty
ajcxy xyñimähuipy: "Chiiby je'
tigoty yhuingoyüch", ca' ajcxy
mmibigipy. ²⁷Hich je' je jáy huidibi
tzoon tzajpjoty, nhuimbidaambich
ya naaxhuiñ miid je tiicxin je
jájín, jadu'n nej je huidzuc huidi
tiicxp xiibidzimyb ixti xiigidágy.
²⁸Ma je öcp ninicx yajpaady jim
ñimujctähua'n je luud ajcxy.

Nej jada' je' Dios y'ung ymiinipy

²⁹Co anajty ti ñaxy je ayo'n
xii ayo'n tiempo, huin'it je xii
ycoodziygidäga'n, je po' ca'
ytiicxa'n, je madza' ycädähua'n etz

janch mic je tzajp yücxa'n. ³⁰Co yi jadu'mbi ytuniyb yjadiyb, chi quëxiga'n tzajpjoty je iixpejt co iich, je jäy huidibi tzoön tzajpjoty, nhuimbida'nich ya naaxhuiñ. E chi tüg'óciy je mayjäy tájip máyip yjihuĩhuipy yäxipy, chi ajcxy iixipy je jäy huidi tzoön tzajpjoty miñ anajty jocjoty miid ymic'ajt y'oy'ajt. ³¹Chi nguexipyich ángeles ajcxy co huen mic yaxxüxy ajcxy ytrompeta, jigix yöymujctähuipy tüg'óciy pinjaty huin'ixyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jünboj pidzimyb, ma tichpoj pidzimyb.

³²Jim miich ajcxy iixpejt mbigipy ma je higuery quipy jadu'n nej je xii tiempo ymiñ cidägy. Co je higuery quipy jadüg'oc pidägipy je' y'aay'ung, huin'it miich ajcxy nejhuĩhuipy co yhuingoni mina ypottigiyni. ³³Tim jadu'n nej tiy'ajt mbijccixy ma je higuery quipy co jada ajcxy jadu'n iixipy nejhuĩhuipy co yhuingoni anajty je xii je tiempo jün'aguy tijc'aguy. ³⁴Janch tiy'ajt jadu'n nej nimaaygixy co tüg'óciy ytuna'nñii yjada'nñii ma ca'ni anajty je jäy y'öctäy huidibi anajty jactzinaayb huin'it tiempo. ³⁵Je tzajp etz je naaxhuiñybi cixam tigoyam yi', per iich n'ayuc ca' ycixa'n ytigoya'n nimina.

³⁶Ca' ni pin nejhuĩy je xii je hora mina nhuimbida'nich ya naaxhuiñybi. Ni je ángeles ajcxy canejuĩy, ni je Dios y'ung canejuĩy. Tügpaic je Dios Teedy nejhuĩy.

³⁷Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadiipy co anajty

nhuimbityich, yi jäy huidibi tzoön tzajpjoty, ya naaxhuiñ. ³⁸Jecy'ajty co anajty ca'ni je ayo'nduu ymiñ ya naaxhuiñybi, hue' je' mayjäy ajcxy chinay aguic jotcuic, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiiy Noé barcojoty. ³⁹Je mayjäy ajcxy ca' ajcxy cuenttuñ co ayo'n miina'n anajty, ixti cooni je ayo'nduu miin e öctay ajcxy je jäy niijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'n miid je jäy ajcxy huidibi tzinähuip jac jiini co iich anajty nhuimbityich ya naaxhuiñ jadüg'oc. ⁴⁰Je huin'it tiempo co nhuimbidityich jadüg'oc ya naaxhuiñ, chi metz yëdyic yajpaadipy ma ytundac, tüg je' yajminicxa'n, e tüg je' yhui'ma'n. ⁴¹E mejtz töxyjäy yajpaadip anajty yjich, tüg je' yajminicxa'n, e tüg je' yhui'ma'n.

⁴²E paady miich ajcxy ni'ixi ijtcix, xyjijp'ixipyich com ca' mnejhuĩygixy mina miich ajcxy je mHuindzin ymiina'n. ⁴³Mnejhuĩygixy miich jada co ixyipy je ungdeedy nejhuĩy ti hora je meetzpi miina'n, ca'p je' ymähuipy, e ca'p a'i'xihuipy co je meetzpi ytigihuipy tigoty. ⁴⁴Nañ tim jadu'n miich ajcxy ni'ixi ijtcix, je' co iich, je jäy huidibi tzoön tzajpjoty, nhuimbida'nich ma ca' ni pin anajty nejhuĩy.

Je tumbi tudägyi etz je huidibi ca'p ytudägyity

⁴⁵¿Huidibi tumbi je' ya huidibi tumb miid yhuindzin janch

cixyjot huinijot huidibi miid
ixpijcin, huidibi je' yhuindzin
mooyipy ane'min ma ytijs, huidibi
yajnidagihuipy ma ymigütijs
caayin uucin mina ypadyii?

⁴⁶Janch jotcujc je tumbi co
yhuimbidity je' yhuindzin, e je'
cuyduñ jadu'n nej je' yhuindzin ti
ñimäyii. ⁴⁷Janch tiy'ajt jadu'n nej
nimaaygixy co je huindzin ytumbi
yajnigohuajc'adyii tüg'óciy huidibi
ymiid. ⁴⁸Pen je tumbi jibicjäybi
mina'n jotjoty huinma'n'yoty:
“Huäcxijpni iich je nhuindzin.”

⁴⁹E chi nimaajtztägip ymigütijs,
e ytiğihip caaybi uucpi miid
amügyjäydijs; ⁵⁰chi je tumbi
yhuindzin minipy ma ytijs huidi
xii mina je tumbi ca' anajty aa'ixy
jijp'ixy e ni je hora anajty canejhuüy.
⁵¹Chi huindzin tzaachytunip je'
ytumbi, etz ypidägipy miid je
jacjadyii jäy ajcxy yajpaady huidibi
naybidáacigixp nej tudägyjäyity e
ca' yjanchity. Jiiby ayoodactuuby
yjihua'n yäxa'n etz huinmucxa'n
huingueeda'n ytiitz miid jotmay.

Je iixpejt ma je majcpi töxy'anäg

25 Co anajty nhuimbityich
jadüg'oc ya naaxhuiñybi
jadu'n nipaadip nej je nimajcpi
töxy'anäg co ñicxy ajcxy
ñayjijpcobadihuáanigixy miid
je yëdyjc huidi pigamb. Chi
minicxy ajcxy aceite lámpara co
yajticxaangixy. ²⁻⁴Nimigoox je
töxy'anäg huidi cohuinma'nity
etz ahuing minicxy jadüg quiig
ujtz miid aceite. E nimigoox je
töxy'anäg ca'pi ajcxy cohuinma'nity,
e ca' ajcxy ahuing minicxy jadüg
quiig aceite. ⁵E je yëdyjc huidibi

anajty pigamb huäcxijpni ooy, chi
je töxy'anäg ajcxy ooy ytiğiyni
mä'uuybi. ⁶E mijcuctz ajcxy
midoy co tüg jäy mic mina'n: “Chi
miin je yëdyjc huidibi pigamb,
nicx jijpcobadiygixy.” ⁷E huin'it
je nimajcpi töxy'anäg ajcxy
ypidictay. Chi ajcxy yjiin ni'ixiiy
nidüg nidüg. ⁸Chi je nimigooxpi
huidibi ca' ycohuinma'nity
nimay je nimigooxpi huidibi
cohuinma'nip: “Iich ajcxy hueeni
mooygich yi m'aceite, co pidzaanip
iich ajcxy njiin.” ⁹Chi y'adzooy
je cohuinma'n'ybi ajcxy: “Ca'
nyega'nich, je' co ca' iich ajcxy nje'
yhuaadihua'n. Nicx miich ajcxy juy
jim ma ytoogyii.” ¹⁰E ti anajty ajcxy
ñicxy aceite juuyb je huidibi ajcxy
ca' ycohuinma'nity, co oy yjäty je
yëdyjc huidibi pigaanip. Chi je
cohuinma'n'ybi ajcxy miid tigi
tigoty je yëdyjc huidibi pigaanip.
Chi tijs yaj'agi. ¹¹E com jecyñi
oy yhuimbity ajcxy je huidibi ca'
ycohuinma'nity. Chi ajcxy yminañ:
“iHuindzin, Huindzin, ocyaj'ahuädz
mdijc!” ¹²Chi je' y'adzooy: “Ca' iich
miich ajcxy n'ixy'adyii.”

¹³Chi Jesús yminañ:

—Nayñi'ixiiygix, je' co
ca' mnejhuiygixy mina iich
nhuimbida'nich jadüg'oc ya
naaxhuiñ.

Je iixpejt ma je meen

¹⁴Co iich anajty nhuimbida'nich
jadüg'oc ya naaxhuiñybi, jadu'n
nipaadip nej jadayaabi iixpejt, co
anajty tüg comeenyjäy chona'n
viajetumbi, chi je' ytumbi ajcxy
mooy je meen co huen cuend'ajtcixy.
¹⁵Je ymidügpi tumbi moy migoox

mil meen. Je mimetzpi moy mejtz mil. E je ymidugiigpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶Je tumbi huidibi c'idigiyyi migoox mil meen, ytigiy ajuybi adoocpi. Chi je' ymeen y'ung'ajty jamigoox mil. ¹⁷Nañ jadu'n huidibi c'idigiyy mejtz mil, ytigiiy tumbi miid je meen. Chi je' ymeen y'ung'ajty ja mejtz mil. ¹⁸Je huidibi c'idigiyy tüg mil hue' oy pidägy je meen tützjoty. Chi taji, e yützi je yhuindzin ymeen. ¹⁹E com jecyñi oy yhuimbity je huindzin. Chi ytigiiy cuenta yaj'oyiib miid je ytumbi ajcxy. ²⁰Chi miin jayijp je huidibi anajty ti c'idigiyyi migoox mil meen. Chi je tumbi yajc'idigiyy je' yhuindzin majc mil meen. Chi yminañ: "Miich ti xymooyich migoox mil meen, e iich ti nyaj'ung'atyich jamigoox mil."

²¹Chi je' yhuindzin minaañ: "Janch jotcuje iich cham co jadu'n ti mduñ miid je hueenbi meen. Miich ooy mdudägy etz oy ti mduñ, e paady njacmöhuaryb jacmay. Tigi' ma iich, e xondäg miid iich."

²²Chi ymiñ je huidibi anajty ti c'idigiyyi mejtz mil meen. Chi nimay je yhuindzin: "Miich xymooyich mejtz mil meen, e ti nyaj'ung'atyich jamejtz mil." ²³Huin'it je' yhuindzin ñimaayi: "Janch jotcuje iich cham, co jadu'n oy ti mduñ miid iich nmeen, e paady njacmöhuaryb jacmay. Tigi' xondäg miid iich."

²⁴E co oy yja'ty je huidibi c'idigiyy tüg mil meen, chi nimay je' yhuindzin: "Huindzin, hue' ndijyich miich myëdyjc'aty janch jibic jäy. Miich cosecha myajpidicpy

ma ca' ti mnipy etz miich mgosecha myajpidicpy ma ca' ti ti mhuijy.

²⁵Paady ooy ndzigiyich co je meen ngayaj'ung'adipyich. E co miich mhuimbida'ñ, mdzogamy je mmeen, e paady je mgi'mmeen ti nyüchich, je' co ndzigiyich co nicxy nyajtigooyich miich mmeen. Cha je meen huidibi ti xymooyich."

²⁶Chi je' yhuindzin ñimaayi: "Jibic tumbi miich, ooy mnuuxity. ¿Nej ti mnejhuüy miich co iich cosecha nyajpidigyich ma ca' ti ti nnibyich, etz cosecha nyajpidigyich ma ca' ti ti nhuijyich? ²⁷Oy co ixipy miich je iich nmeen ti myejc'anuucxy, e jim ixipy y'ung'at. E cham co ti nhuimbityich cham ixipy je nmeenich xyc'idigiyyich miid nimeen'ung."

²⁸Chi je huindzin nimay je jacjadyi tumbidijc: "Pijci ajcxy yi meen huidi ymiid, e mooygix yi huidibi majc mil ymiid. ²⁹Je huidibi oy tumb jacyajmöhuaryb je' anaxy, e ymiid'adamy je' conaxpi. Je' huidibi hueen miid yajpigamb je' huidi ymiid, je' co ca' oy ti ytuñ miid je hueenbi. ³⁰Yi jiibi tumbi huidibi ca' oy ytuñ, pidäg ajcxy agootztuuby ma yjihiipy yäxipy, ma ytiitz huinmuucx huingueedip miid jotmay."

Co anajty naaxhuiñyjäy ajcxy yajtiyduñ

³¹Co iich, je jäy huidibi tzoon tzajpjoty, nhuimbity iich anajty jadüg'oc ya naaxhuiñybi, huin'it n'ixtäga'ñich ma iich n'ane'mdac etz ane'ma'ñich miid iich nmij'ajtin etz n'oy'ajtin. ³²Chi tüg'óciy je naaxhuiñyjäy yajtügmujectähua'ñ

ma iich. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy.

³³Nbidägaamybich a'oy'amy je jäy ajcxy huidibi oy ti ytungixy miid iich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy miid iich. E yi' ajcxy jadu'n nipaadip nej chiibi.

³⁴Chi nnimähuibich yi jäy ajcxy huidibi a'oy'amy: "Miingix miich ajcxy huidibi Dios Teedy ti xyconuucxy ajcxy. Je'äjtigix ane'mdac huidibi ijtp ni'ixi miid miich ajcxy ycixpi maabi naaxhuiñybi chondägy. ³⁵Ma anajty iich nyuubögyii miich ajcxy ti xyajcaayich; ma anajty iich ndidziyii, miich ajcxy ti xyajniñ'ügyich; ma anajty iich nihuidityich, miich ajcxy jättac ti xymöyich; ³⁶ma anajty iich je nhuit ti nyajmayjatyich, miich ajcxy ti xymöyich je huit; ma anajty iich nbigyijich, miich ajcxy ti xycuend'átyich; etz co anajty iich pujxtigoty nyajpaady, miich ajcxy ti xycogapxiyich."

³⁷Huin'it ymina'na'n je jäy ajcxy huidibi oy ti ytungixy miid iich: "Huindzin, ñmina iich miich ajcxy ti n'ixy ayuu, e ti nyajcay? O ñmina iich miich ajcxy ti n'ixy co mdidziyii, e ti nyajniñ'ügy? ³⁸Ñmina iich miich ajcxy ti n'ixy co miich mnihuidity, e ti nmöy jättac? O ñmina mhuit ti myajmayjaty, e ti nmöy je mhuit? ³⁹Ñmina iich miich ajcxy ti n'ixy, co miich mbigyii, e oy ti ngüend'aty? etz ñmina iich miich ajcxy ti n'ixy co pujxtigoty myajpaady, e oy ti

ngogapxiy?" ⁴⁰Iich, je mij'ane'mbi, n'adzohuimbidityich: "Janch tiy'ajt jadu'n nej nnimaaygixy co yi jäy ajcxy huidibi oy ti ytungixy miid pinjaty huidibi xymijnicxpejtpich, nañ jadu'n oy ti ytungixy miid iich. Ca' ñējity co jäy ajcxy yminañ co ca' ypinity je jäy huidibi xymijnicxpejtpich."

⁴¹Chi iich, je mij'ane'mbi, nimähuibich je jäy ajcxy huidibi yajpatp: "Huinhuäctuutcich miich ajcxy jibicjäydijc. Nicxy miich ajcxy mijjiinjoty, huidibi ijtp ni'ixi miid je mujcu' ycixpi etz miid je' y'áñeles ajcxy ycixpi. ⁴²Ma anajty iich nyuubögyii, ca' miich ajcxy xyajcaayich; ma anajty iich ndidziyii, ca' miich ajcxy xyajniñ'ucyich; ⁴³ma anajty nnihuidityich, ca' miich ajcxy xyajjättägyich; ma anajty iich nhuit xytigoy'ijtigich, ca' miich ajcxy huit xymooyich; etz ma anajty iich nbigyii e nyajpaadyich pujxtigoty, ca' miich ajcxy xycogapxiyich." ⁴⁴E chi je' ajcxy ymina'na'n: "Huindzin, ñmina iich ajcxy miich ti n'ijxcixy co anajty miich yubögyii tidziyii, o co anajty mnihuidity? ñMina ti n'ijxcixy co ca' mhuit miidity, o co mbigyii, o co anajty pujxtigoty myajpaady, e ca' iich ajcxy miich nbubejty?"

⁴⁵Chi iich, je mij'ane'mbi, n'adzohuañich: "Janch tiy'ajt jadu'n nej nnimaaygixy. Huen tim pinity huidibi ca' miidity pa'ayo'n miid je' ajcxy huidibi xymijnicxpejtpich, oy jäy yjamina'n co ca' ypinity, iich miich ajcxy anajty jadu'n ti xytuñich." ⁴⁶E jada ajcxy nicxip huinixii ayoodactuuby, e

yi tudägyipi ajcxy nicxip ma yi jugy'ajtin huinixiibi.

**Je huinma'ñ nej anajty
Jesús madzaangixy**

26 Co Jesús nigapxtay tüg'óciy jadayaabi ayuc, chi nimay yi' ydiscípulos ajcxy:

²—Miich ajcxy mnejhuiyb co huixtic je amayxii, je pascua xii. Pascua xiijoty iich, je jäy huidibi tzoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'oga'ñich ajcxy.

³Je huin'it xii je teedy huidibi tungmiid ajcxy, je escribas, etz je mijjädijc ajcxy ñayyömujectayi ma je' ytiba' je teedy huidi jacmijtungmiid huidi anajty yxii Caifás. ⁴E jim ma Caifás ytiba' jim ajcxy huinma'ñy'ixtay nej jëbi yajmachycägixy Jesús miid anii etz yaj'ögaangixy. ⁵Chi ajcxy ñayñimaayi miñ xyipy:

—Ca' y'oyity co xiijoty nmajtzim Jesús. Ca' jecyity co je mayjäy xymijotma'ttayim etz ytigihuip ajcxy huambi jihuuiyb.

**Tüg töxyjäy pidacy aceite
ma Jesús ycohuajc**

⁶Jesús anajty yajpaady Betania ma Simón ytijc, je Simón huidibi anajty ymiid je jibic nibüdz pa'm. ⁷E ma anajty Jesús yca, huin'it ymiin tüg töxyjäy miid tüg quig ujtz miid perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quig, e yajcöyogiy Jesús je perfume huidibi ooy oy yxuugy. ⁸Co Jesús ydiscípulos ajcxy jadu'n ijxy, chi ajcxy mijotma'ty je

töxyjäy. Chi ajcxy ñayñimaayi miñ xyipy:

—¿Ti co jada perfume huidibi ooy oy xuugy ayoy? ⁹Tzou ixypy ooy jada yajtoocy, jaydëbi ixypy miid yajpobet je ayooobitjc.

¹⁰E co Jesús nejhuiy nej ajcxy yminañ, chi nimay:

—¿Na'amy co m'amayiy jadayaabi töxyjäy? Yi' huidibi ti tuñ, je' yi' tüg oybi. ¹¹Je ayooobitjc ca' ytigoy'ida'ñ ma miich ajcxy nimina. Huen huidibi xii huen huidibi tiempo jëbi miich ajcxy mbubedipy ayooobitjc. Hich ca' n'ida'ñich jecy ya miid miich ajcxy. ¹²Jada töxyjäy ti pidägy ma iich nninix perfume huidibi ooy oy xuugy, jayijp ca'ni nnaaxtigiyich. Jadu'n je' jijp'ijxpy mina nnaaxtigihua'ñich. ¹³E huentimma'amyity je Dios y'ayuc anajty yajcapxhuächy huindu'my naaxhuin jim yajnigapxa'ñ jadu'n nej je töxyjäy ti tuñ cham miid iich, e jadu'n je mayjäy jäymedzipy jada töxyjäy.

**Judas cïyecy yi Jesús
ma ymidzip agojiix**

¹⁴Chi nidüg je' ydiscípulos huidibi yxii Judas Iscariote oy nimäy je teedy mijtungmiidpi, ¹⁵niimay ajcxy:

—¿Ti ajcxy xymöhuibich co ngïyegipyich Jesús?

Chi ajcxy moy iipxmajc plata meen. ¹⁶Co ajcxy meen ymooy, chi mic'amy Judas yhuinma'ñ'ixtay nej jëbi cïyecy Jesús ma ymidzip.

Jesús y'adzuu'ajty pascua xiijoty

¹⁷Je ymidügpi xii, je amayxii, je pascua xii ma anajty yajcay je

tzajcaagy huidi ca' levadura miidity, huin'it je' ydiscípulos ajcxy nimiñ Jesús. Chi ajcxy yajtiy:

—¿Ma mdzocy co iich ajcxy ni'ixi'huip huidi mgayamy je pascua xii cixpi?

¹⁸Chi Jesús y'adzooy:

—Nícx miich ajcxy jim Jerusalén ma tüg jäy ytijc, e mnimähuip: “Íich nHuindzin jadu'n minamb co yhuingoñ je' yxii yhora, e paady ma miich mdijc yí' tuna'ñ je pascua xii adzu'ajtin miid ydiscípulos ajcxy.”

¹⁹Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ixi' ajcxy je pascua adzui'ibi.

²⁰E co chu'iiy, chi Jesús y'ixtacy ma je mesa miid je nimajmetzpi ydiscípulos. ²¹E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xyciyegaambich ma nmidzipich.

²²Huin'it ajcxy yajtay taj may. Chi ajcxy yajtiy:

—Huindzin, ¿nej iich jada'ji?

²³Chi Jesús y'adzooy:

—Yi huidi miid ndocxmucyich, yi' je' jadu'n xyciyegaambich ma nmidzipich. ²⁴Janch tiy'ajt co iich n'öga'ñich, jadu'n nej je profeta jaay jecy'ajty. ¡Ay ayoob je yëydijc huidi xyciyegaambich! Jac'oy co ca' ycama'xung'aty je huidibi xyciyegaambich.

²⁵Chi Judas yminañ:

—Huindzin, ¿nej iich jada'ji?

Chi Jesús y'adzooy:

—Miich jadu'n minamb.

²⁶E ma anajty ajcxy ycay, huin'it Jesús tzajcaagy conigy. Chi yajnaxxy Dioscojuyip. E chi jada'

tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' iich je nnin'cxich.

²⁷Huin'it Jesús ciyigy je y'ügy. Chi yajnaxxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸yi' je' iich je nni'pyich. Yi' ñigapxy co Dios ti yaj'aducy je jemybi ayuc. E iich nni'py ytema'ñ yoga'ñ miid je mayjäy ycixpi, jaydëbi ajcxy paadip je huinmecxin miid je ypcy ycixpi. ²⁹Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua xii ügy, ixti cooni je xii tiempo paadip co iich ajt n'uucim huinjemybi je pascua xii ügy ma iich nDeedy y'ane'lin.

Jesús nigapxy co Pedro ycoyütza'ñiyi

³⁰E co ti y'iidäy, chi ajcxy choon ñicxy ma Olivos cögop. ³¹Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaaybejty jadu'n miñ ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.”

³²E co anajty iich njugypicyich jadüg'oc ma anajty ti n'ögyich, chi jayijpni nnicxa'ñich ma Galilea, e jim naybaatim nidüg'óciy.

³³Chi Pedro yminañ:

—Oy yi jacjadyiibi migügtijcch xyjadim'ixmajtztäy, per ni camina xii iich miich n'ixmadzipy.

³⁴Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey

yaxigy, miich tugiig'oc mina'nip co ca' xy'ixy'adyiijich.

³⁵Chi Pedro yminañ:

—Oy iich ndim'ögip miid miich, ni camina ngaminá'nibich co ca' miich n'ix'adyii.

E nidüg'óciy je' ydiscípulos ac tim jadu'n yminañ.

Jesús mibijctzoy Dios jim Getsemaní

³⁶Chi Jesús ñicxy miid je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'iña', miin iich n'ocnicxyich jim'amy Dios mibijctzoobi.

³⁷E chi Jesús ñicxy miid Pedro etz nañ jadu'n miid je Zebedeo ymang nimetzpi. E jim Jesús ñayjihuiiyi janch taji may mij cajee. ³⁸E chi jim yajnimay je nidugiigpi discípulos:

—Nayjihuiiybich taj may ma njot nhuinma'ñ, ixti mabaad anajty n'ögich miid tájin máyin. Hui'm miich ajcxy ya miid iich etz ca' mmaagixy.

³⁹Huin'it Jesús ñajtzöyöiyi mijci'm jahui'. Chi jim ñaygojxtinaydaci naaxcixy, e ytiigi y Dios mibijctzoobi, yminañ:

—Dios Teedy, iich nDios, pen jëbi jadu'n, mduñ may'ajt pjcigich jadayaabi tzaachypi ayo'n, per ca' yjadu'nity nej iich ndzojcin mdunipy, jadu'n mdunipy janchtiy nej miich mdzojcin.

⁴⁰Huin'it Jesús yhuimbijty jim ma anajty ti yajhui'my je nidugiigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora miid iich

ycixpi? ⁴¹Hui'mi' ya, juugy m'idipy etz mibijctzoo Dios, jaydëb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mninëcx ca' ymadäga'ñ nicxy tuñ oybi.

⁴²Chi mimetz'oc Jesús ñicxy oy Dios mibijctzoy, yminañ:

—Dios Teedy, pen copicy co iich nbaadibich je ayo'n, huen jadu'n yjadiiyb miid iich nej miich mdzojcin.

⁴³Chi jadüg'oc Jesús huimbijty ma je nidugiigpi discípulos, e oy pátnibi maab ajcxy, je' co ca' anajty ajcxy mimadägy mähuii. ⁴⁴Chi yajhui'my ajcxy, e midugiig'oc ñicxy Dios mibijctzoobi. E nañ tim jadu'n oy minaanip jadu'n nej anajty ti y'ocminamb. ⁴⁵Chi jadüg'oc huimbijtni jim ma je nidugiigpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina iich, je jäy huidibi tzoön tzajpjoty, nyajciyega'ñich ma yi jibicjäydijc ajcxy. ⁴⁶Pidëccix, tzoc jámim, chi ymiin je huidibi xyciyegaambich ma nmidzipich.

Tzумы mach ajcxy Jesús yajnicxy

⁴⁷Jesús capxni anajty jim co yjaty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas miid ja'ty mayjäy, je huidibi anajty ti quexy je judío teedy mijtungmiidpi etz je mijjäydijc. E je mayjäy hue' anajty ajcxy miid ypujx etz quipy. ⁴⁸Judas, je huidibi anajty cïyecp Jesús, ti anajty jayijp yecy tüg ijxpejt huidibi miid jëbi ajcxy ijxcapy Jesús. Jadu'n jayijp Judas ycapxtuñ miid je' ajcxy, e yminañ:

—Je jäy huidibi anajty ndzücxypich, yí' je' Jesús. Májtzcix.

⁴⁹Huin'it Judas nimijhuägy Jesús co capxpocxa'ñ, chi yminañ:

—iHuindzin!

Chi tzücx.

⁵⁰Chi Jesús ñimayi:

—Migüg, ¿na'amy co xyñimijhuägyich?

E co jadu'n ñimay, chi mic'amy yí' ajcxy majch Jesús. Chi ajcxy yajnicxy tzumy mach.

⁵¹E huin'it nidüg je Jesús ymigüg, juudy je ypujx. Chi tatzpujxtucy je teedy mijtungmiidpi ytumbi. ⁵²Chi Jesús ñimay je' ydiscípulo:

—Pidäg yí mbujx ma ytijc. Com pinjaty tziptumb miid pujx, nañ jadu'n y'ögipy miid pujx. ⁵³¿Nej ca' mnejhuüy co iich jëbi nbijctzooyich cham adzu'x may ángeles, je huidibi xyñihuá'nibich ma nmidzupich?

⁵⁴¿Per nej ycixipy yca'pxipy nej miñ jaaybety, jadu'n nej cham ytuñyí yjadyí miid iich ycixpi?

⁵⁵Chi Jesús ñimay je mayjäy:

—Miich ajcxy ti xyñidzoniyich miid je pujx miid je quiipy. ¿Nej mdijy iich meetzpi o jäy yaj'öcpich? ñich jabom jabom anajty iñäyich nyaj'ixpicyich miich ajcxy jilby ma Dios ytijc. E ca' miich ajcxy xymajchich. ⁵⁶Huinjihuí' miich ajcxy co tüg'óciy yam ytuñyí yjadyí ca'px tím jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpidijc yhuinduu

⁵⁷Je' ajcxy huidibi anajty ti mach Jesús, yajnicx ajcxy jim ma Caifás

ytijc. E jim ma Caifás ytijc ma anajty ti ñayyöymujctáayigixy je escribas etz je mijjäydijc ajcxy. ⁵⁸E je Pedro anajty axam nicxy jigüëgy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy miid je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹Je teedy ajcxy mijtungmiidpi etz tüg'óciy je judíojäy mijtungmiidpi ajcxy huinma'ñ ixtaaygixy nej jëbi Jesús yajpocycägixy miid ajcxy xihuín, e jadu'n jëbi mooygixy yí o'cin. ⁶⁰Mayjäy ñihuambejty Jesús miid anii, per ni pin anajty ca' miidity tiy'ajt co Jesús anajty ti ytundigooy miid judíojäy ajcxy ycötujcin. Jac com jecy miin metz testigos miid aanii. ⁶¹Je' ajcxy yminañ:

—Jadayaabi yëydijc minañ co jëbi nyajhuindigooyich Dios ymijtzajptijc, e codugiig xii ti anajty nyaj'oyiyich jadüg'oc.

⁶²Huin'it je teedy mijtungmiidpi ytinayigy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³Per Jesús ca' y'adzooy. E huin'it je teedy mijtungmiidpi ñimaayi:

—Ñimaayg iich ajcxy Dios ycixpi, pen janch miich je' je Cristo je Dios y'ung.

⁶⁴Chi Jesús yminañ:

—Miich jadu'n minamb. Nañ jadu'n iich miich ajcxy ñimäy, co iich je jäy huidibi tzoön tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuñ.

⁶⁵Chi je teedy jacmijtungmiidpi oy yhuít huindzecxy huinma'ch, chi yminañ:

—Jadayaabi yëydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e minañ: ⁶⁶¿Nej miich ajcxy minañgixy?

Chi ajcxy yminañ:

—Ti ycapxytigooy, copicy co y'ögipy.

⁶⁷Chi ajcxy huindzuju jįptzuju etz cojxy ajcxy. Chi jacjadyi huingojxy jįpcojxy. ⁶⁸E chi ajcxy nimay:

—Pen janch co miich je' je Cristo octiygax pñ ti xycoxy.

Pedro yminañ co ca'p Jesús ix'y'adyii

⁶⁹Je huin'it moñi Pedro anajty iñay tñägujc. Chi ñimiini tñg töxy'anäg tumbi, chi ñimaayi:

—Miich nañ jadu'n ti mhuidity miid Jesús je Galilea jäy.

⁷⁰Chi Pedro yminañ mayjäyjoty:

—Ca' nhuinjihuüyich ti mgapxy.

⁷¹Pedro hue' anajty pidzimñip co ñimiini huingbi töxy'anäg. Chi je töxy'anäg nimay je' ymügütiyc:

—Jadayaabi yëydijc ti yhuidity nañ jadu'n miid Jesús je Nazaretpi.

⁷²Chi Pedro jadüg'oc coyüch je Jesús cixyot huinijot yminañ:

—Ca' n'ixy'adyiijich yjiibi yëydijc.

⁷³Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty miid mhuidity yi Jesús, com yi m'ayuc yi' xyajniquëxpc.

⁷⁴Chi Pedro tigiyy capxp janch oy ñinej minañ huinijot:

—Ca' n'ix'adyiijich yi yëydijc.

E tim huin'ítiiy je tzey yaxigy.

⁷⁵Chi Pedro jäymejtzcoody jadu'n nej anajty Jesús ti ñimäyii: “Ma ca'ni anajty tzey yaxigy cham coodz, miich tugiig'oc xycoyützibich.” Chi Pedro pidzimy tiba', e jiiby oy yaxy mibaad yjotcidägy.

Chi Jesús yajcäyeycy ma Pilato

27 E co oy yxiimiy yticxiy, chi je teedy mijtungmiidpi etz je mijjäydijc ajcxy quipxycapxy co yaj'ögaangixy Jesús. ²Chi ajcxy yajñicxy cixoch oy ajcxy cäyeycy ma Poncio Pilato je gobernador.

Judas ñayyöctiiyi

³Co je Judas je huidibi anajty ti cäyeycy Jesús, co ixxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meen ma je teedy mijtungmiidpi etz mijjäydijc ajcxy. ⁴Chi Judas nimay je teedy mijtungmiidpi etz je mijjäydijc ajcxy:

—Hich ti ndundigooyich co ti ngäyeycyich yi tudägyjäy ma miich ajcxy.

Chi je' ajcxy y'adzooy:

—Ti iich ajcxy n'occuent. Miich yi' mnigixp tiibi mduñ.

⁵Huin'it Judas cohuijty je meen jiiby tzejtigoty. Chi ñicxy. Chi ñayyöctiiyi.

⁶Huin'it je teedy mijtungmiidpi yajpidigy je meen. Chi ajcxy ñayñimaayi miñ xyipy:

—Jadayaabi meen ca' yjëbity co nbidaacim ma ofrenda ñigidägy. Je' co yi' yjëjity je huidi ni'py ti tzoo'adyii.

⁷Huin'it je teedy ajcxy tuñ je quipxycapxy co juyaangixy

miid je meen tüg naax huidibi jäy ytiyp, tütznaax it, ma ajcxy yajnaxtigihuipy pinjaty ca' ycogajpity jim Jerusalén. ⁸Ixti chambaad jadu'n xii'adyii jejimbi it: Ni'py naax. ⁹E jadu'n yciyx yca'px nej je profeta Jeremías yminañ: “E jadu'n ajcxy je' yajpidigy meen iipx majcpí plata meen (je' choou nej anajty ajcxy Israeljäy ti yajnigödugiy), ¹⁰e miid je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹²Je judío teedy ajcxy huidibi miytungmiidpi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy.

¹³Chi je Pilato ñimay Jesús:

—¿Nej ca' mmidooy nej yi' ajcxy yxiyi?

¹⁴Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuiiyni ti ycapxipy.

Jesús ycödujcy y'o'cin

¹⁵Je gobernador jadu'n anajty ycostumbre miidity co jimijt jimijt najtzmazäy tüg machyjäy pascua xiijoty, je huidibi je mayjäy ti ytimychojcpy. ¹⁶E jim anajty tüg je machjäy huidibi anajty ajcxy ixy'ajttaayb, e yxiijity Barrabás. ¹⁷E

co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co iich nnajtzmazäyhuibichi? ¿Najtzmazäyich Barrabás o Jesús huidibi jäy ajcxy ytiyp je Cristo? ¹⁸Pilato ñejhuiyb anajty co mañ'ájtingix anajty ti cïyejccixy Jesús.

¹⁹Jimni anajty iñäy Pilato me je ycötujctac co je ytöxyijc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co iich amygoodz ti ngumäyich janch jibic miid yi' ycixpi.”

²⁰Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmazäy Barrabás etz huen yaj'öccixy Jesús. ²¹Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazäyhuibich?

Chi je mayjäy y'adzooy:

—Najtzmazäy Barrabás.

²²Chi Pilato y'amidooy je mayjäy: —¿E nej ndunipyich yi Jesús, huidibi jäy ytiyp je Cristo?

Huin'it ajcxy nidüg'óciy y'adzoday:

—iYajcruutzpet yi Jesús!

²³Chi Pilato yminañ:

—Pues, ¿nej ti ytundigooy?

Per je mayjäy nigoob y'adzoday:

—iYajcruutzpet! iYajcruutzpet!

²⁴Pilato yjapubedaan Jesús, per co ijxy nejhuiy co je mayjäy ca' ni nej niducy. Hue' ajcxy oy ytigiiy huambi jihuiybi, chach ñayñajtztiigixy miid jot'an. Huin'it Pilato capxyñiguejxy je

huädz nii. Chi ytigiiy cǐbujp ma je mayjäy yhuinduu, e yminañ:

—Ca' iich ngo'adzohuipyich jadayaabi tudägyyëdjic y'o'cin. Miich ajcxy yi' mgo'adzoohuipy.

²⁵Chi je mayjäy y'adzoday:

—iich ajcxy ngo'adzohuipyich yi' y'o'cin miid n'ung anäg etz n'ap n'oc.

²⁶Chi Pilato najtzmazdiy je Barrabás. Per Pilato ane'my co huen Jesús yajhuojp. E co yajhuojtay, chi cǐyejcy, co huen yajcruutzpedyii.

²⁷Chi Pilato ysoldados ajcxy yajniçxy Jesús ma agujtǐjc. E jiiby tüg'óciy soldadtǐjc ñayyömjuci ma Jesús. ²⁸Chi je soldado ajcxy je' yhuít yajniñenducy. Chi ajcxy yajniñeny je tzapx huit huidibi je rey ajcxy yajtuumyb. ²⁹Chi ajcxy tacy tüg corona miid apy. Chi ajcxy yajcöjeniy ma Jesús. E huin'it ajcxy a'oy'amy yajcǐgabiyy tüg je paxy. Chi ajcxy huingojxtinay'ahuüiy. Chi ajcxy nixiicy yajxiicy, e yminaangixy:

—iOoy ymijity yjanchity, je judíos ajcxy yrey!

³⁰Chi ajcxy huindzujy jǐjptzujy. Chi ajcxy yajcǐgajptucy je paxy, e yajcöhuojpǐgy ajcxy. ³¹E co ajcxy nixiictay yajxiictay, chi yajniñenducy je rey yhuít etz yajniñeny je yci'm huit. Chi ajcxy yajniçxy ma yajcruutzpedaangixy.

Co Jesús yajcruutzpejti

³²E jim ma anajty hueeni ti ytüyöy, jim ti paty tüg Cirene yëdjic anajty yxiijity Simón. Chi ajcxy adzip nimay Simón co huen jaccapi Jesús ycruudz.

³³E co ajcxy yja'ty ma tüg je it yxiijip Gólgota, jadu'n yhuimbizim

Öcpi Cohuajc Cögop. ³⁴E jim ajcxy Jesús jayaj'tüga'ñ vino temhuidity miid tzooy, jǐgix ca' jihuühuip je tzaachypi. Per co uucmajch, chi jihuüñybijc co ca' y'oy'uucnity.

³⁵E co anajty ajcxy yajcruutzpety Jesús, chi je soldadtǐjc suerte iǐxy, pǐn jëbi ocjë'adyii Jesús yhuít, chi yciǐxy yca'pxy jadu'n nej je profeta cojaay jecy'ajty: “Yajhuäcxipy ajcxy iich nhuit e miid iich nhuit yciǐpi iǐipy ajcxy suerte.” ³⁶E jim anajty ajcxy iñaaygixy cuend'ajtcixy. ³⁷Je xǐhuin ayuc huidibi ajcxy yjaay ma Jesús ycöduu jadu'n yminañ: “Jadayaabi je! Jesús, je judíos ajcxy je yrey.”

³⁸Quipxy miid Jesús ajcxy yajcruutzpejty metz meetzpi. Tüg a'oy'amy, e jadüg anajty'amy.

³⁹Je mayjäy huidibi ajcxy naxiıyb anajty ma Jesús, ooy anajty oy ycöjigiñ, nixigy yajxigy ajcxy Jesús, ⁴⁰ymina'ñ ajcxy:

—Bah, miich huidibi Dios ytǐjc jidaanip, e codugiig xǐi huingbi myajpidǐga'ñ. Miich ci'm cham naygohuäñi, e minac cruudzcǐxy, pen janch miich Dios xy'ung'adyii.

⁴¹Nañ jadu'n je teedy ajcxy huidibi mǐjtungmiidpi, etz je escribas, etz je fariseos ajcxy etz je mǐjjäydjic nixiicy yajxiicy ajcxy Jesús, ñayñimáaygixy miñ xyipy:

⁴²—Huingbi ti cohua'ñ, e ca' jaty nej ci'm ñaygohua'niıyb. Pen janch co yi' jëjity je Cristo je Israel jäy rey, huen minacy jadachambi ma cruudz, huin'it nmibijcim. ⁴³Yi' ti pidägy ymibijcin ma Dios; huen jadachambi je Dios yajniñdzögyii, pen janch Dios chogyii; yi' ti ymina'ñ co Dios y'ung'adyii.

⁴⁴Nañ jadu'n je metzpi meetzpi ajcxy huidibi cruudzpejt quipxy miid Jesús nixiicy yajxiicy ajcxy ooy Jesús.

Jesús y'ögy cruudzcáxy

⁴⁵Co yucjxiijiy, chi ycoodziyday tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxii. ⁴⁶Huin'ítij Jesús ycapxyqueecy janch mic yminañ: —Elí, Elí, ¿lama sabactani? —yi jadu'mbi ayuc hue' yhuimbizimy: Dios Teedy, Dios Teedy, ¿ti co ti xy'ixmachich?

⁴⁷Nijëjity jáy huidibi anajty jim yajpatp huingon ma Jesús co jadu'n midoogixy Jesús y'ayuc, chi ajcxy yminañ:

—Jadayaabi yëydijc cham yaaxtaayb je profeta Elías.

⁴⁸Huin'it nidüg jáy ñicxy janch poyígy etz oy yajtzoón je pixy. Chi je pixy yajxoogy miid je xun vino. Chi pidacy je pixy ma je paxyjijp. Chi yujctijy ma Jesús y'ahuac co huen ügy. ⁴⁹Huin'it nijëjity ajcxy yminañ:

—Ixmatz, tzoc ajt oc'ijxim, pen nimiinip Elías, pen janch yajnidzögyii.

⁵⁰Jadüg'oc Jesús yaaxqueegy janch mic. Chi oy y'o'cni. ⁵¹Co Jesús y'o'cy, tim huin'ítij jim ma Dios ytijc je mapxy yhuít yciitzhua'cxy tinä'amy. E nañ jadu'n je naaxhuiñybi ooy chuyuy miid uyx micpi etz je mijjatychaa oy jiitzhua'cxy. ⁵²May öcpi jut y'ahuach etz yjugypijcy mayjáy tiibi anajty y'o'ccixy tiibi anajty mibijccixy Dios. ⁵³Co Jesús yjugypijcy, chi je may'öcpi tiibi

anajty jugypijccixy etz tiibi anajty pidzimgixy ma öcpi jut, chi ajcxy ytigiíy ma je Dios ycajp, je Jerusalén. E mayjáy ajcxy ijxy. ⁵⁴Co je mic uyx oy ñaxy etz jac tijaty anajty ti ytuñyii ti yjadyii, chi je capitán etz miid jadyii ymigügtijc huidibi anajty cuend'ajtp Jesús ooy ajcxy chigiy yjihuiy, e minaangixy: —Janch tiy'ajt co yijiibi yëydijc Dios yi' anajty y'ung.

⁵⁵May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti miiddzoon jim Galilea. Yi' anajty ajcxy Jesús ypubejtp. ⁵⁶E ma je' ajcxy jim anajty chooñty, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigiíy

⁵⁷Co oy chuu'iiyñi ycoodziíyñi, huin'it chooñ ma Arimatea tüg comeeñjáy huidibi yxii José. E je' ymijnicxpejty anajty Jesús. ⁵⁸Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. ⁵⁹Chi José ycädiíy Jesús ñinicx. Chi huinmojch miid tüg poob sávana. ⁶⁰Chi yajnaaxtigiíy ma je yci'm jut jemybi huidibi anajty ti yajtzejtztüty ti yajpädüty ma tüg tzahuingueetz. Chi adiguejctujcy je öcpi jut miid tüg tzaa. ⁶¹Chi José ñicxni. E jim yhui'my María Magdalena etz je jadügpi María, y'iñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigiíy

⁶²E com jabom ma anajty Jesús ixiiybi ti y'ögy, ma anajty ti

ni'ixiydäy miid je sábado xii ycixpi, chi je teedy ajcxy huidibi tungmiid etz je fariseos ajcxy ñayyöymujci ma je Pilato. ⁶³Chi ajcxy yminañ:

—Huindzin, yi' iich ajcxy njäymejchpyich co je aniidacpi yminañ ma anajty yjuugyity co codugiig xii jugypiga'ñ jadüg'oc co anajty ti y'ögy. ⁶⁴E paady tunmay'ajt quexipy soldados ajcxy ma Jesús ti ñaaxtigiy huen cuend'ajtcixy ixti cooni tugiig xiibi paadipy. Ca' yjegyity co ñiminiib adzuum agoodz je' ajcxy huidibi mijnicxpejtíp etz tzimguëgipy ajcxy Jesús ñinícx. E chi nicxy jäy yminañ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayijpi.

⁶⁵Chi Pilato ajcxy nimay:

—Miich ajcxy miid tüg picy soldados huidib cuend'ajtp ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

Co Jesús yjugypijcy

28 E com jabom co yximiy yticxiy je domingo xii, huin'it ñicxy María Magdalena etz je jadügpi María ma Jesús ñaaxtigiy. ²Chi tüg mij uix ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguü. Chi y'ixtacy ma tzaa nícx. ³Janch adiicxp je ángel anajty yhuinjip jadu'n nej huidzuc, e je yhuít janch

poob'ögy. ⁴E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵Huin'it je ángel y'adzooy je metz töxyjäy:

—Ca' miich ajcxy mdzigiy. Hich nejhuiybich co miich ajcxy m'ixtäy Jesús je huidibi ajcxy yajcruudzpejty. ⁶Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtigiy. ⁷Nícx miich ajcxy jottigooyb ma je' ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mmiidnaybadiiyb.” Hich miich ajcxy yam nnimaaygixy.

⁸Huin'it je töxyjäy ajcxy chooñ janch poyigy ma anajty ti ñaaxtigiy Jesús. Chi ajcxy ñicxy miid tzigi'ñ, per agujc jotcujc. Poyigy ajcxy oy tiy'ajt yecy ma je discípulos ajcxy.

⁹E jim anajty je metzpi töxyjäy ytüyöy, timetini Jesús ñayguëxici ma je' ajcxy yhuinduu. Chi Jesús ajcxy capxpocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigiiygixy.

¹⁰Jesús minañ:

—Ca' mdzigiiygixy. Nícx miich ajcxy nima' je nmigügtijcich co huen ajcxy nicxy jim Galilea, e jim naybadiiybich miid yi' ajcxy.

Huidibi ajcxy je soldadotijc ñigapx

¹¹E tüyöybñi anajty je töxyjäy nimetzpi co nijējity je soldados ajcxy chooñ ma Jesús ñaaxtigiy ñicxy jim Jerusalén, miidmiydäga'ñ je teedy huidibi tungmiidpi nej anajty ti ytuñiyi ti yjadyii ma Jesús ñaaxtigiy. ¹²E huin'it je teedy ajcxy ñayyöymujctayí miid je mijjäydijc,

tunaangixy quipxy capxy. Huin'it je teedy ajcxy etz je mijjädijc moy ajcxy je soldados may meen. ¹³Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzimgueeci Jesús ñinïcx. ¹⁴Etz pen ymidooyb anajty yi gobernador, iich ajcxy ngapxjotcidägich, jigix ca' nej xytúngixipy.

¹⁵E huin'it ajcxy je soldados ycidigiyyi je meen. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judíojoy capx je ayuc.

Huidibi Jesús yajnībije ydiscípulos ajcxy

¹⁶E jadu'n ajcxy ñicxy je nimajctügpi Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimáayigixy. ¹⁷E co ajcxy ijxpaty

Jesús, chi ajcxy oy huindzigiiy. Per jim nijējity huidibi ca' mibijcy co anajty yjējity. ¹⁸Huin'it Jesús ymijhua'cy ma yi' ajcxy, e nimay:

—ñich ti nyajmōyich je cōtujcīn jiiyby tzajpjoty etz ya naaxhuiñ. ñich ti nyajmōyich je mij cōtujcīn, jaydēbi n'ane'myich jiiyby tzajpjoty etz ya naaxhuiñ. ¹⁹E paady nicx miich ajcxy huindu'my naaxhuiñ capxhuāxcix je ayuc, jaydēbi jāy ajcxy xymibigipyich. Tüg'óciy jāy ajcxy huidibi xymibijcpich myajniibedipy ajcxy miid Dios yxii, Dios y'ung yxii, etz miid je Espíritu Santo yxii. ²⁰Miich ajcxy myaj'ixpigipy je mayjāy co copicy cuydunipy ajcxy iich ngōtujcīn tüg'óciy jadu'n nej ti n'ane'myich miich ajcxy. E miich ajcxy mnejhuiyby co nmīid'ityich miich ajcxy huinixii huinitiempo, ixti mabaad naaxhuiñybi anajty ycixpi ytigooy. Jibaad ycixy. Amén.